

嘉定縣續志序

上承乾二十有二年三孽靖亂萬
國來同載輯干戈振興文教詔
修一統誌勅內大臣駐江南省
奉宣休命督造南省通志檄郡
邑各纂所屬志書上之限三月



肆厘柒絲壹忽玖微陸織捌沙本年奉部改

折白糧正耗春辦等米壹萬陸千叁百捌拾貳
石玖斗肆升玖合叁勺捌抄壹撮叁圭壹粟貳
顆每石折銀壹兩伍錢共編前數

不在丁田另徵匠班銀陸百貳拾陸兩捌錢伍分

康熙拾陸年

增編康熙拾伍年審增人丁銀陸拾叁兩捌分玖
厘伍忽捌微肆織壹沙玖塵叁渺壹漠玖埃玖
陸巡

陸巡

賦役



總計派徵

本色米麥豆壹萬捌千柒百玖拾叁石陸斗伍升

折色合叁勺壹抄肆圭玖粟玖顆

折色起存地丁銀貳拾陸萬玖千壹百貳拾肆兩

不玖錢叁分陸厘玖毫壹絲伍忽陸纖貳沙貳塵

柒渺叁漠壹埃

百肆平料什...

計白...

...

告成甚盛典也檄下海隅日出
之邦罔不率俾在上爲吳東門
下吏叨令嚮城詎敢隕越以稽
王章謹諏日聘士刻期開局以
從事焉顧嘉定新志成于前令
趙侯雪乘先諸邑報最綜核頗

詳已十易春秋矣當時簪筆之
士猶有存者祇奉部文蠲脩束
帛特延請許潛壺闕瞿亭吳鐵
菴汪三儂諸公黃髮皤皤天留
碩果用爲祭酒秉持史筆相與
旁搜博采晨夕編摩如出一手


事半功倍無煩築室夫天道人
事物理三年一小變十年一大
變此十年中其不變者川原城
郭社稷廟宇及六曹典制四時
月令不須嗣續其隨時而變者
無如賦役自軍興以來司農告
匱羽書孔棘時旱潦爲殃徵輸
不繼當事奉文設法仰副
軍需暫爲便宜不無溢額嚶之
民幾于嗟萋楚而嘆流薪矣余
初蒞茲土心竊閔之適值止戈
之日遂釐剔諸項悉禁不行今

續編所載皆從舊額而以新增
附註永以爲鑑蓋今日勞民痛
定思痛哀鳴嗷嗷皆各縣所無
而嘉民獨受其殃不敢不繪圖
哀籲以俟 各憲之請命焉甫
一月而書乃告竣知我罪我一
不敢居至于士紳記載之勞贊
勩之烈曷可泯諸嗚呼十年以
來風氣之何以由衰而盛人民
之何以由散而聚廢物之何以
由耗而豐災禳之何以由沴而
消俗尚之何以由漓而淳則

聖君賢相之所丕變而時雍
撫司牧之所綢繆而拯救誠
如天如日而在上風官填海惟
精衛是視何以告無罪于光化
之下也謹序

肯

大清康熙二十三年甲子秋八
月江南蘇州府嘉定縣知縣
臣聞在上題



纂修嘉定縣續志姓氏

總裁

江南蘓州府嘉定縣知縣聞在上

纂修 西平陽府聞喜縣知縣許自俊

山西平陽府聞喜縣知縣許自俊

禮部 觀政進士闕選

浙江湖州府武康縣知縣吳康侯

布 諸生汪國价

參閱 安 學 備 畢 天 興



嘉定縣儒學教諭畢天庚

訓導任國鑄

翰林院編修黃與堅

陝西鞏昌府推官張輔

浙江杭州府知府顧岱

山西平陽府蒲縣知縣朱元裕

內閣掌典籍事中書舍人顧焯

縣觀政進士錢顧琛

黃振鳳

廣西平樂府荔浦縣知縣毛贊

舉人程遠

朱文龍

徐匡

士趙俞

董德其

主孫致彌

周日接

舉陸元輔

薦

武進士 馬天翼

汪日熹

諸生 潘潤

唐懋倣

貢士 陳唐碩

唐頎

顧賓王

副榜 汪穉實

西平樂 孫謀 徐名世

監貢候選 朱祥發

徐錫葉

戴慶長

王宗濰

侯開國

戴鑑

顏鑽

程暹

校賦

徐嘉彥

嘉定縣續志目錄

卷之一

縣志 縣志 縣志

卷之二

水利

卷之三

職官

學校

寺觀

選舉

墳墓

祠祀

名宦

古蹟

孝義

卷之四

人物



卷之三

列女

潛德

隱逸

流寓

仙釋

方技

卷之四

藝文

藝文

卷之五

藝文

碑記

藝文

書目

嘉定縣續志卷之一



賦役

舊志開載人丁田米本折錢糧數目於康熙拾貳年止

本縣輿圖疆域山川風俗諸編無有更易前志已

經詳載獨每年額徵糧米悉照頒發會計由單

派徵其間或增或減歲有不同故於康熙拾貳

年以後各項欸目備細考稽首列之如左

一本縣戶口人丁大總

康熙拾貳年

人丁柒萬叁千陸百陸丁

賦役

康熙拾叁年

增編康熙拾壹年審增人丁貳千伍丁

康熙拾伍年

審增人丁肆千貳拾柒丁

康熙貳拾年

審增人丁壹百陸拾玖丁

實在人丁柒萬玖千捌百柒丁

康熙貳拾壹貳拾貳年

人丁與貳拾年同

一本縣田地大總

康熙拾貳年

不等田蕩塗壹萬貳千柒百柒拾貳頃肆拾捌畝

陸分捌厘壹毫

實熟平米叁拾柒萬柒千伍百貳拾柒石柒斗肆

升玖合伍勺肆抄貳撮

康熙貳拾年

豁免坍荒田蕩塗壹百叁拾柒頃陸拾捌畝貳分

貳厘肆毫

平米叁千陸拾叁石壹斗貳升陸合玖勺貳抄

實在不等田蕩塗壹萬貳千陸百叁拾肆頃捌拾
畝肆分伍厘柒毫

平米叁拾柒萬肆千肆百陸拾肆石陸斗貳升貳
合陸勺貳抄貳撮

康熙貳拾壹貳拾貳年 田米與貳拾年同

一派徵本折錢糧大總 查照各年由單會計數目編入

康熙拾貳年

總計派徵

本色起存米麥豆叁萬伍千壹百柒拾陸石陸斗

捌合陸勺玖抄壹撮捌圭壹粟壹顆

折色起存地丁銀貳拾陸萬捌千柒百壹拾叁兩

肆錢伍分叁厘肆毫叁絲貳微叁纖叁沙玖塵

玖渺肆漠陸埃

不在丁田另徵匠班銀陸百貳拾陸兩捌錢伍分

另徵優免人丁充餉銀貳拾伍兩肆錢壹分伍厘

陸絲柒忽壹微肆纖捌沙叁塵捌渺

康熙拾叁年

增編會試舊舉人盤纏新科中式文武舉進坊儀

等銀貳百玖拾肆兩叁錢伍分陸厘肆毫捌絲
柴忽玖微玖織玖沙玖塵玖渺玖漠捌埃此項
奉部遵照已酉庚戌二科名數核定三年均
編至期文武均給永著爲例
增編康熙拾壹年審增人丁銀叁拾兩肆錢捌分
肆厘肆毫捌絲伍忽玖微玖沙捌塵柒埃

補編壬子癸丑二科舉進生員牌坊盤纏等銀貳
百陸拾兩壹錢貳厘此項於歲科併考事案內
補編次年卽減

總計派徵

本色米麥豆叁萬伍千壹百柒拾陸石陸斗捌合
陸勺玖抄壹撮捌圭壹粟壹顆內除白糧正耗
等米壹萬陸千叁百捌拾貳石玖斗肆升玖合
叁勺捌抄壹撮叁圭壹粟貳顆漕項蘇太鎮各
倉行月并南糙撥省衛行月共米捌千叁拾捌
石陸斗陸升捌合叁勺玖抄陸粟叁顆肆粒麥
叁百陸拾陸石伍斗陸升壹合叁勺玖抄均不
蠲免外其餘解南兵糧局恤米豆壹萬叁百捌

嘉慶縣志 卷之一
拾捌石肆斗貳升玖合伍勺叁抄肆圭叁粟伍
顆陸粒、遵奉

上諭蠲免一半、共蠲米豆伍千壹百玖拾肆石貳斗
壹升肆合柒勺陸抄伍撮貳圭壹粟柒顆捌粒、
實徵米豆伍千壹百玖拾肆石貳斗壹升肆合
柒勺陸抄伍撮貳圭壹粟柒顆捌粒

連前不蠲欸項、共徵米麥豆貳萬玖千玖百捌拾
貳石叁斗玖升叁合玖勺貳抄陸撮伍圭玖粟
叁顆貳粒

折色起存地丁銀貳拾陸萬玖千叁百貳拾叁兩
捌錢壹分壹厘肆毫柒絲壹忽貳微玖纖貳沙
壹塵柒埃伍渺壹漠、內除漕項協濟各倉、并蘇
太鎮三衛民七淺船折色軍儲、及省衛運軍行
土備月等銀、叁萬伍千叁百柒拾柒兩肆錢壹分柒
厘貳毫叁絲壹忽柒微捌纖貳沙貳塵叁埃壹
渺壹漠、白糧經費、并總協部官公費役食銀、壹
萬肆千肆百玖拾柒兩捌錢叁厘伍毫陸絲貳
忽叁微優免丁銀、捌拾陸兩伍分玖厘陸毫貳

絲柴忽捌織貳沙捌塵陸渺玖漠不蠲外其餘
起存地丁銀貳拾壹萬玖千叁百陸拾貳兩伍
錢叁分壹厘伍絲壹微貳織柒沙壹塵叁埃柒
渺壹漠遵奉

上諭蠲免一半該蠲銀壹拾萬玖千陸百捌拾壹兩
貳錢陸分伍厘伍毫貳絲伍忽陸織叁沙伍塵
陸埃捌渺伍漠伍逡

實徵銀壹拾萬玖千陸百捌拾壹兩貳錢陸分伍
厘伍毫貳絲伍忽陸織叁沙伍塵陸埃捌渺伍

漠伍逡

上運前不蠲欵項共實徵銀壹拾伍萬玖千陸百肆
柒拾貳兩伍錢肆分伍厘玖毫肆絲陸忽貳微貳
織捌沙陸塵陸渺伍漠伍逡內該派徵銀壹拾
肆伍萬壹千陸百捌拾兩陸錢伍分壹厘壹毫肆
查絲玖忽壹微伍織貳沙貳塵陸埃叁渺貳漠捌
下逡錢柒千玖百陸拾壹貫捌百玖拾肆文柒分
玖厘柒毫柒忽陸微叁織肆沙叁塵貳埃柒渺
其兵餉錢續奉部文爲固請暫停兵餉搭錢

之例等事停止。本年奉蠲欵項內續奉部文將永折漕糧銀補徵解司。不在丁田另徵匠班銀陸百貳拾陸兩捌錢伍分。查本年由單內刊載爲欽奉。上諭事奉。總督部院阿。憲牌內開康熙拾貳年拾貳月初捌日准。戶部咨開。

康熙拾貳年肆月拾貳日捧接。上諭諭戶部江南蘇松常鎮淮揚六府連年災荒民生困苦與別處不同朕心時切軫念除今年錢糧已經派撥兵餉外其六府屬康熙拾叁年地丁正項錢糧特行蠲免一半以昭朕存恤災黎至意爾部卽將應蠲免數目察明確議具奏特諭欽此欽遵該臣等查得蘇松常鎮淮揚六府屬州縣衛所康熙拾叁年分除漕白二糧輕賈經費銀兩并淮安等倉行月等糧以及不在丁田雜項錢糧不蠲外其應徵地丁正項起存銀兩南白正耗米豆遵奉

上諭應蠲免一半仍於由單註明奉

与程志
不符候
考

上諭蠲免拾叁年錢糧一半字樣。曉諭小民務使得
沾實惠等因。本縣奉蠲前數。

康熙拾肆年

遇閏增編米叁百壹拾貳石叁斗貳升叁合叁勺
增編銀伍百玖拾捌兩捌錢叁分玖厘壹毫肆絲
總計派徵

本色米麥豆叁萬伍千肆百捌拾捌石玖斗叁升
壹合玖勺玖抄壹撮捌圭壹粟壹顆

折色起存地丁銀貳拾陸萬伍千壹百伍拾捌兩

壹錢貳分陸厘柒絲叁忽捌微壹纖柒沙叁塵

玖埃叁渺陸邊錢肆千伍百肆貫肆百貳拾貳

文肆分壹厘貳毫肆絲柒忽肆微柒纖捌沙壹

塵玖埃肆渺

不在丁田另徵匠班銀陸百貳拾陸兩捌錢伍分

康熙拾伍年

奉文改折白糧正耗春辦等米壹萬陸千叁百捌

本拾貳石玖斗肆升玖合叁勺捌抄壹撮叁圭壹

粟貳顆

總計派徵

本色米麥豆壹萬捌千柒百玖拾叁石陸斗伍升

玖合叁勺壹抄肆圭玖粟玖顆

折色起存地丁銀貳拾陸萬捌千肆拾陸兩伍分

玖厘叁毫叁絲四織貳沙叁塵玖渺叁漠貳邊

伍巡錢壹千壹拾柒貫陸百伍拾文壹分肆厘

壹毫貳絲肆忽玖微柒織捌沙壹塵玖渺柒漠

伍埃

白糧改折銀貳萬肆千伍百柒拾肆兩肆錢貳分

肆厘柒絲壹忽玖微陸織捌沙本年奉部改

折白糧正耗春辦等米壹萬陸千叁百捌拾貳

石玖斗肆升玖合叁勺捌抄壹撮叁圭壹粟貳

顆每石折銀壹兩伍錢共編前數

不在丁田另徵匠班銀陸百貳拾陸兩捌錢伍分

康熙拾陸年

增編康熙拾伍年審增人丁銀陸拾叁兩捌分玖

厘伍忽捌微肆織壹沙玖塵叁渺壹漠玖埃玖

邊陸巡

總計派徵

本色米麥豆壹萬捌千柒百玖拾叁石陸斗伍升

玖合叁勺壹抄肆圭玖粟玖顆

折色起存地丁銀貳拾陸萬玖千壹百貳拾肆兩

玖錢叁分陸厘玖毫壹絲伍忽陸纖貳沙貳塵

柒渺叁漠壹埃

白糧改折銀貳萬肆千伍百柒拾肆兩肆錢貳分

肆厘柒絲壹忽玖微陸纖捌沙本年仍折白糧

正耗春辦等米壹萬陸千叁百捌拾貳石玖斗

肆升玖合叁勺捌抄壹撮叁圭壹粟貳顆每石

折銀壹兩伍錢共編前數

不在丁田另徵匠班銀陸百貳拾陸兩捌錢伍分

康熙拾柒年

遇閏增編本色米叁百壹拾貳石叁斗貳升叁合

叁勺

折色銀伍百玖拾捌兩捌錢叁分玖厘壹絲伍忽

總計派徵

本色米麥豆壹萬玖千壹百伍石玖斗捌升貳合

陸勺壹抄肆圭玖粟玖顆

折色起存地丁銀貳拾陸萬玖千叁百壹拾伍兩
柒錢玖分伍厘陸毫叁絲陸忽玖微玖纖陸沙
捌塵玖渺壹漠錢肆百柒貫玖百捌拾文貳分
玖厘叁毫陸忽伍微叁纖捌沙貳塵

白糧改折銀貳萬肆千伍百柒拾肆兩肆錢貳分
肆厘柒絲壹忽玖微陸纖捌沙

不在丁田另徵匠班銀陸百貳拾陸兩捌錢伍分
查本年錢糧于頒佈由單之後續奉

部文蠲免坍荒地連閩共銀貳千叁百玖拾玖
兩肆分伍厘玖毫陸微陸纖壹沙肆塵叁渺柒
漠伍埃奉有戶部爲坍荒賠累無追等事江
南清吏司案呈奉本部送戶科抄出該本部覆
江撫慕題前事等因康熙貳拾年陸月貳拾
貳日題柒月拾叁日奉

旨該部具奏欽此欽遵於本月十四日抄出到部該
臣等查得江寧巡撫慕疏稱蘇松常三府
坍荒地共有貳千叁百伍拾陸頃伍拾叁畝

零每年應徵米伍萬陸千肆百陸拾壹石貳斗
零請從康熙拾叁年起將錢糧豁免等因前來
查蘇松常三府歷年未完錢糧前經該撫題請
應從康熙拾柒年起將坍荒地錢糧豁免會
同九卿詹事科道以長洲縣坍荒地既稱丈
清並無缺少其太倉等九州縣坍荒地行令
丈明具題在案今太倉等九州縣田地既經該
撫親身丈明委係坍荒但請自康熙拾叁年起
將錢糧豁免不便准從應照先題于康熙拾柒

年起應徵錢糧蠲免仍將蠲免過錢糧數目造
報查核至此坍荒地內有可種成熟田地該
撫卽行設法勸種徵糧又烟墩馬路營房等公
占田地貳拾頃貳拾陸畝零錢糧亦應蠲免等
語查烟墩馬路營房等公占田地向係舊有並
無蠲免錢糧之例此公占田地錢糧請蠲之處
應毋庸議者也康熙貳拾年捌月初陸日題本
月初捌日奉

旨依議欽此欽遵抄部送司奉此相應移咨案呈到

部擬合就行爲此合咨前去查照本部覆奉
旨內事理欽遵施行

本縣坍荒不等田壹百叁拾柒頃陸拾捌畝貳
分貳厘肆毫

缺科平米叁千陸拾叁石壹斗貳升陸合玖勺
貳抄

照米驗派蠲免本折錢糧除折色各項照蠲外
其本色米麥豆因完解在前奉有憲行不准
蠲免

康熙拾捌年

總計派徵

本色起存米麥豆壹萬捌千柒百玖拾叁石陸
斗伍升玖合叁勺壹抄肆圭玖粟玖顆

奉文復辦白糧正耗等米肆千貳百壹拾貳石
壹斗叁升壹合貳勺陸抄

折色起存地丁銀貳拾陸萬捌千捌百壹拾陸
兩柒錢柒分伍厘肆毫捌忽貳微壹纖壹沙貳

塵貳渺肆漠玖埃玖透陸巡錢叁百壹拾貫貳

拾叁文陸厘捌毫玖絲貳忽貳微捌纖捌沙貳塵

白糧改折、除復辦本色外、該銀壹萬捌千貳百伍拾陸兩貳錢貳分柒厘壹毫捌絲壹忽玖微陸纖捌沙

通共銀貳拾捌萬捌千玖兩捌錢柒分伍厘陸毫伍絲玖忽壹微貳沙壹塵柒漠玖遠陸巡、內搭錢叁百壹拾貫貳拾叁文陸厘捌毫玖絲貳忽貳微捌纖捌沙貳塵、內續于坍荒賠累無追等

事案內、奉准部文、准蠲坍荒地銀貳千叁百玖拾肆兩肆錢玖厘叁絲柒忽玖沙叁塵叁渺壹漠玖埃、其本色米麥豆、因完解在前、不准蠲免

實徵銀貳拾捌萬伍千陸百壹拾伍兩肆錢陸分陸厘陸毫貳絲貳忽玖纖貳沙柒塵柒渺伍漠壹埃玖遠陸巡

不在丁田另徵匠班銀陸百貳拾陸兩捌錢伍分康熙拾玖年

遇閏增編本色米叁百壹拾貳石叁斗貳升叁合叁勺

折色銀伍百玖拾捌兩捌錢叁分玖厘壹絲伍忽
奉文復辦白糧正耗等米貳千陸百壹拾玖石貳
斗陸升玖合陸勺壹抄叁撮柒圭肆粟肆顆肆
粒

總計派徵

本色起存米麥豆貳萬壹千柒百貳拾伍石貳斗
伍升貳合貳勺貳抄肆撮貳圭肆粟叁顆肆粒

折色起存地丁銀貳拾陸萬玖千叁百捌拾叁兩
貳分捌厘肆毫貳絲叁忽貳微壹纖壹沙貳塵
貳渺肆漠玖埃玖遠陸巡又錢叁百肆拾貳貫
陸百玖文陸厘捌毫玖絲貳忽貳微捌纖捌沙
貳塵

白糧改折除復辦本色外該銀貳萬陸百肆拾伍
兩伍錢壹分玖厘陸毫伍絲壹忽叁微伍纖壹
沙肆塵

通共銀貳拾玖萬叁百柒拾壹兩壹錢伍分柒厘

壹毫肆絲叁忽肆微捌纖伍沙伍塵陸漠玖埃
玖遠陸巡內錢叁百肆拾貳貫陸百玖文陸厘
捌毫玖絲貳忽貳微捌纖捌沙貳塵內于坍荒
賠累無追等事案內豁免坍荒銀貳千叁百玖
拾玖兩肆分伍厘玖毫陸微陸纖壹沙肆塵叁
渺柒漠伍埃其本色米麥豆因完解在前奉有
憲行不准蠲免

不在丁田另徵匠班銀陸百貳拾陸兩捌錢伍分
康熙貳拾年

總計派徵

本色起存米麥豆貳萬壹千肆百壹拾貳石玖斗
貳升捌合玖勺貳抄肆撮貳圭肆粟叁顆肆粒
內于坍荒賠累無追等事案內蠲免米壹百伍
拾貳石肆斗捌升伍合壹勺壹抄捌撮叁圭捌
粟玖顆肆粒

折色起存地丁銀貳拾陸萬捌千柒百肆拾柒兩
貳錢叁分捌厘捌毫叁絲肆忽貳微壹纖壹沙
貳塵貳渺肆漠玖埃玖遠陸巡又錢叁百柒拾

玖貫伍百伍拾玖文陸分肆厘貳毫玖絲貳忽
貳微捌纖捌沙貳塵

白糧改折除復辦本色外該銀貳萬陸百肆拾伍
兩伍錢壹分玖厘陸毫伍絲壹忽叁微伍纖壹
沙肆塵

通共銀貳拾捌萬玖千柒百柒拾貳兩叁錢壹分
捌厘壹毫貳絲捌忽肆微捌纖伍沙伍塵陸漠
玖埃玖邊陸巡內千冊荒賠累無追等事案內
豁免冊荒銀貳千叁百玖拾肆兩肆錢玖厘叁
絲柒忽玖沙叁塵叁渺壹漠玖埃

不在丁田另徵匠班銀陸百貳拾陸兩捌錢伍分
康熙貳拾壹年

除蠲免冊荒起存銀貳千壹百玖拾伍兩貳分捌
毫叁絲玖微叁纖肆沙伍塵捌渺壹漠玖埃又
蠲白折項下銀壹百玖拾玖兩叁錢捌分捌厘
貳毫陸忽柒纖肆沙柒塵伍渺又蠲本色米麥
豆壹百伍拾貳石肆斗捌升伍合壹勺貳抄貳
圭捌粟伍顆陸粒不派外

實徵本色米麥豆貳萬壹千貳百陸拾石肆斗肆
升叁合捌勺叁撮玖圭伍粟柒顆捌粒

起存折色銀貳拾陸萬陸千玖百叁拾壹兩柒錢
柒分柒厘陸毫肆絲陸忽壹微玖織玖沙伍塵
貳渺伍漠玖遠陸巡

白糧改折銀貳萬肆百肆拾陸兩壹錢叁分壹厘
肆毫肆絲伍忽貳微柒織陸沙陸塵伍渺

不在丁田另徵匠班銀陸百貳拾陸兩捌錢伍分

康熙貳拾貳年

增編康熙貳拾年審增人丁銀貳兩陸錢肆分柒

厘陸毫叁絲捌忽玖微叁織肆沙壹渺柒漠壹

遠貳巡

增編閏月銀伍百玖拾肆兩貳錢貳厘壹毫伍絲

不壹忽叁微肆織柒沙捌塵玖渺肆漠肆埃

增編閏月米叁百玖石柒斗捌升玖合貳勺壹抄

捌撮玖圭肆粟肆顆

實徵本色米麥豆叁萬伍千貳百石玖斗捌升柒

合叁勺壹抄玖撮柒圭伍粟貳顆玖粒本年白

糧奉文全運

起存地丁銀貳拾陸萬柒千伍百貳拾捌兩陸錢
貳分柒厘肆毫叁絲陸忽肆微捌纖壹沙肆塵
叁渺陸漠伍埃捌巡

不在丁田另徵匠班銀陸百貳拾陸兩捌錢伍分
查舊志開載萬曆肆拾柒年賦役全書欵目本
縣額徵稅徭折色銀壹拾捌萬肆百伍拾伍兩
貳錢。今康熙貳拾貳年分由單會計額徵地丁
折色銀貳拾陸萬柒千伍百貳拾捌兩陸錢。又

額外蘆課銀貳千壹百叁兩伍錢伍分零。較之
舊額共新增銀捌萬玖千壹百柒拾陸兩玖錢
伍分。其中欵項前志一一叙明有各屬所同者。
如地畝經費四部本折物料等項。共銀叁萬叁
千伍百貳拾柒兩肆錢。有特派嘉邑者。如改折
官布加價。并鋪墊扛費。共銀貳萬捌千捌百捌
拾兩壹錢柒分。加漕銀貳萬陸千柒百陸拾玖
兩叁錢捌分零。此嘉邑賦額偏重之由也。以下
下之壤。輸上上之賦。用是民生日蹙。國課日逋。

官民交病、夫江南賦額、蘇松獨重、登奉撫憲具題請豁浮糧、祇以軍需孔亟、未奉

俞允、今四方底定、宦戶加徵已奉

恩蠲、扣裁欵項、漸奉開復、正清釐國賦、民慶更生之會、倘得司計者按欵清查、去其太甚、以救其顛沛、斯嘉民萬萬年之幸矣

附考雜稅

嘉邑幅輦不滿百里、歲輸地丁銀貳拾陸萬柒千伍百餘兩、本色米叁萬伍千貳百餘石、土硃賦重

民不堪命、其外更有雜稅、共計伍千陸百兩有奇、有無額而新增者、有舊額少而今加多者、有懸額無追里排攤賠者、有爲本項留用錢糧反資別用者、總以軍興孔亟、漸次加增、事出權宜、原非一定不易、今將各項始末備細開列於後、日後奉文停止、請減請豁、庶有所考

一本縣蘆地灘田共貳萬玖百肆拾陸畝柒分肆厘柒毫內

上田壹萬壹千陸百叁拾貳畝肆分伍厘玖毫每

畝課銀壹錢伍分

下田壹千伍百柒拾肆畝柒分捌厘柒毫每畝課銀伍分

密蘆陸百陸拾畝伍厘壹毫每畝課銀壹錢貳分
下灘蘆壹千伍百陸拾畝叁厘壹毫每畝課銀伍分

上地肆百捌拾玖畝肆分伍厘伍毫每畝課銀柒分

下地伍百柒拾叁畝柒分柒厘每畝課銀叁分

水蕩玖畝壹分陸厘每畝課銀肆分貳厘叁毫

泥灘肆千肆百肆拾柒畝叁厘肆毫每畝課銀壹分伍厘玖毫叁絲捌忽

共該課銀貳千壹百叁兩伍錢伍分伍厘壹毫壹絲伍忽捌微玖纖貳沙

查蘆課一項緣明時長江一帶蘆洲悉屬勳產不

在州縣衛額之中順治四年添設蘆政司專理此

項并查各省屬新漲沙塗起科是時蘆政巴馬江院

盛臨縣查勘將吳淞江劉河淤漲沙塗及七八都

輕則漕田吳寶二所太倉衛軍蕩概入蘆課坐派
課銀壹千貳百玖拾叁兩陸錢自後五年一丈遞
爲增減凡沿海新漲沙塗概歸蘆課漸增至貳千
壹百叁兩零惟是嘉邑地濱江海坍漲靡常向來
以漲補坍猶苦不足縣額今額外之蘆課日增漕
田之坍糧日缺雖於康熙五年及二十年兩案具
題豁免坍荒田壹百陸拾捌頃肆拾叁畝有奇而
旋勘旋坍民有失業之徵輸官有無徵之奏考其
中利弊歷經各憲題明在案總之蘆課漕田盡爲

公帑倘得以向後之陞漲盡補坍缺而蘆課止照
現額徵解則漕田得以漲補坍漕額可無虧缺矣
一水鄉鹽課竈丁草蕩倉基正銀陸百叁拾柒兩捌
錢叁分壹厘陸毫內鹽課銀叁百兩壹分貳厘灶
丁銀貳百伍拾捌兩壹錢貳分伍厘水鄉草蕩倉
基銀柒拾玖兩陸錢玖分肆厘陸毫外加車珠
銀壹拾兩捌錢肆分肆厘

查本縣鹽場坍塌竈戶故絕自嘉靖年間以來蓋
百有餘年矣而鹽課竈丁今猶輸納者出自里排

攤賠也。查舊志有清浦場。明初額設排催柴拾叁名、竈戶伍千柒百餘丁、草蕩貳萬陸千餘畝。歲辦課銀壹千壹百柒拾柒兩叁錢壹分貳厘。水鄉蕩銀柒拾玖兩陸錢玖分肆厘陸毫。歲督樵採煎辦。與沿海叁拾陸場一例。照引給商。嘉靖以後。海潮內侵。場蕩坍洗。水不成鹽。商引遂絕。而歲辦課銀如故。後奉以漲補坍之例。告將本蕩對港。崇明知排草沙蕩撥補。是時本縣知縣高薦。崇明知縣何懋官奉醮使者。徵行會勘。具悉灶戶疾苦。議將崇明知

備用羨餘。新漲沙塗二項。共銀捌百柒拾柒兩叁錢。于彼縣徵抵本場額課。在本縣止存課銀叁百兩壹分貳厘。水鄉草蕩倉基車珠銀玖拾兩伍錢叁分捌厘陸毫。崇禎年間。灶催黃墅等。又以灶蕩坍沒。額課無抵。控憲批發本縣查勘。八都糧里將草蕩鹽課倉基車珠等銀。議編本都民灶排年照畝均完。免其浚河雜差。詳憲相沿爲例。其灶丁舊額銀貳百伍拾捌兩壹錢貳分伍厘。今灶戶貳百陸丁半。每年每丁徵銀壹兩貳錢伍分。蒙

鹽法道給帖本灶免其浚河雜差歷年照數徵解
鹽院掛驗轉發鹽法道兌收掣批造冊呈送

鹽院復命考核

一本縣學租銀叁百兩叁錢柒分伍厘捌毫

查本縣學田壹拾頃玖拾陸畝叁分玖厘叁毫厘
基柒拾壹畝柒分陸厘肆毫捌絲每年照會計完
納稅徭正賦外共科租銀叁百兩叁錢柒分伍厘
捌毫以資修理學宮諸生課程筆劄及貧而不給
于婚喪者之用順治十三年緣部議裁減廩糧

拾肆年操江撫院蔣題為學校教養無資敬陳

學租給廩之法等事將學租酌補裁扣廩糧周恤
貧士戶部覆將租銀止准濟貧生外餘銀解

部隨于拾伍年奉學道查將學租田數報部每

年額徵銀兩除修學濟貧等項外餘銀起解學道

聽候解部充餉至康熙十九年奉文裁半解司

充餉餘解學道聽候批給修學濟貧等用

一典稅

查典稅一項向無定額按年查徵順治九年奉文

查報起稅每年每戶稅銀伍兩凡遇民間報稅卽查取里隣執結備申 布政司請給印帖并報本府一並入冊仍送 撫院達部徵稅倘有貲本消乏亦據該典呈稟繳此核查確實申 憲除稅至康熙拾陸年奉文增稅每戶增完稅銀壹拾伍兩彙解 布政司交收每年造入請杜官吏侵漁等事案內奏銷達 部

一牛驢猪羊稅

查前項稅銀向無定額按年查報科稅先年每戶

徵稅叁錢康熙拾陸年奉文每戶增稅壹錢續又行令扣算各牙賣買每兩完稅叁分俟年終徵完彙解 布政司交收每年造入請杜官吏侵漁等事案內奏銷達 部

一酒稅銀捌拾兩酒坊捌戶每戶完銀拾兩

一烟稅無定額以各烟舖銷賣烟筋日逐報納歲終結算起解

查前項稅銀于康熙拾玖年奉文起徵遵照

部議定例凡釀酒槽坊每坊完稅拾兩收賣烟舖

每觔完稅貳厘解 司充餉于事平之日停止至
康熙貳拾壹年奉 布政司丁通詳

督撫兩部院請 題免徵奉 督院移商

安撫部院咨覆內開准 戶部覆開滇南雖已蕩
平大兵尚未凱旋不便遽行停止等因轉咨前來
則是前項加增起稅銀兩仍應俟大兵盡回之日
再爲酌奪可也等因咨 院行司仰縣遵照在卷
一漁課銀壹拾伍兩壹錢柒分捌厘肆毫遇閏月加
銀叁錢貳分玖厘於本縣所轄河港漁船人戶出

納順治玖年間奉 按院秦 具題蠲免停徵

一田房稅銀陸百兩

查田房稅向無定額任民齋契投納年終結算解
司康熙拾陸年爲兵餉之缺額等事奉

前撫都院馬 坐派銀陸百兩每年起解

布政司撥解兵餉

一牙行稅銀貳百叁拾叁兩貳錢伍分

查牙行稅舊額銀壹百伍拾伍兩伍錢康熙拾陸
年加增一半銀柒拾柒兩柒錢伍分共編前數每

年起解 布政司聽候撥餉

一門攤稅

查舊志本縣額編鈔銀貳百伍拾玖兩陸錢陸分貳絲捌忽陸微、每年于城市鄉鎮舖店門面派徵、支給太鎮兩衛官軍、并本縣官吏俸鈔之用、至萬曆貳拾伍年、奉府會議、每年于里甲銀內派徵、其門攤鈔銀、盡行蠲免、

本朝康熙拾伍年為軍需浩繁等事奉 部文開臨

街平屋、每間貳錢、樓房每間肆錢、止徵一次、其時

奉 憲行委本府師督糧到縣查勘、臨街平屋貳萬捌千貳百貳拾貳間、樓房叁千貳百伍拾玖間、半、共徵銀陸千玖百肆拾捌兩貳錢、解布政司充餉、康熙貳拾年、又奉 部文為請 旨事、再徵一

次、酌量加增、平屋每間叁錢、樓房每間陸錢、共該徵銀壹萬肆百貳拾貳兩叁錢、其銀解司聽候撥餉、嘉邑海陬僻壤、非比上年民居稠密、門攤一項、今昔懸殊、蓋緣前督糧師 臨縣查勘、不論城市鄉鎮舖店門面、盡窮簷僻巷比屋而編之、致增前

數貧戶難完。在康熙拾伍年已有變賣者。有折卸者。有坍塌以及火廢者。種種不一。至貳拾年缺額愈多。乃奉文仍照舊額科徵。以致有額無追掛欠。難以徵辦。

一官戶加徵

康熙拾伍年陸月初肆日奉

布政司信牌該奉

督撫兩部院憲牌開准 戶部密咨爲軍需方虞匱

乏臣誼共當急公請勅遄議通行曉諭官畷地稅

之法下不致擾民間上可仰裕 國用事等因到

院准此合亟飭行仰司查照 部覆奉

旨事理速查各州縣見任官員鄉宦納糧地畝池塘山塲等項於今年起每兩加徵銀叁錢俟事平之日停徵等因備行到縣本縣遵於康熙拾伍年起至貳拾年止共徵五年康熙貳拾壹年分奉

恩詔停止

- 一本縣內城塹租銀壹拾伍兩陸分貳厘捌毫
- 一吳淞所外城濠塹租銀壹拾捌兩肆錢捌分

一寶山所外城濠塹租銀壹拾兩伍錢

查前項塹租銀兩向抵本縣水旱門關橋道及吳淞城樓砲架每歲小修工料等費於康熙拾肆年奉

布政司撥抵

督部院書吏紙張之用

一請復城邑併立鎮邑緣由

明嘉靖癸丑倭亂知縣萬思謙募民築城其好義出貲有功畚鍤者立在城四門共十三箇排年供里長保正巡邏承值之用百年相安至明末清初

供億濫觴康熙十一年蒙藩憲慕訪聞檄行清散城排甦困奈保正乏人承充飛報排門每年一百五十六家身驚獸散害切剝膚官府巡邏承值捉襟露肘知縣陸龍其因士民潘潤徐名世丘德元錢响錢豫陸瑞許奇張第等籲撫叅詳革里長

留保正減田請復俞允嗣蒙知縣馬雲會編審議減田數存三之一復在城額設十三箇外并各鎮吳淞俱從田起差量役分派概禁飛報大害康熙二十年九月通詳各憲蒙本府陳藩司丁開奉

前撫憲慕 批該司詳覆嘉定縣復立城鎮各畝
田地輪充保正禁革供億等項勒石永遵緣由如
詳飭行一切供億盡行禁革嗣後如有濫行取擾
察出叅拿究處仍勒石永遵繳奉行勒石在卷
各鄉設立鎮畝獨殷家行兵馬絡繹不絕消乏彫
零人民逃散蒙知縣陸龍其勘除保正不立鎮畝
禁革一切濫派地方始得寧謐

一沿海免濬緣由

通邑排年輪充塘長開濬河道惟沿海一帶於順

治十年因有烽墩橋道木椿土堡等項每年脩築
之費宇秋崗裳騰日月盈昃閏餘成歲有問殷推
十七號全免濬河其衣周二號有橋無墩免夫三
分之二至康熙二十一年奉昭武將軍楊按臨親
勘界內復增造營房砲臺烟籠工費浩繁奉
各憲亦邀全免皆爲防禦邊疆起見因時制宜與
內地濬河並稱要務不可偏廢者也

督撫

一本縣有下區荒田數頃康熙二十二年立法招徠
召民開墾示

爲召募墾荒緩徵助給事照得始字號荒田原不
過二千餘畝除經開墾千畝外尚存千畝本縣親
行履勘查有兩傍俱經種熟而中間拋置荒蕪者
甚爲可惜細查前此逃排或因新舊錢糧並徵或
因缺少貲本耕種遂爾棄業流離失所合行出示
召募爲此示諭通邑人民并逃排人等知悉作速
各認舊產仍歸故土如無開墾工本并牛種農具
或公正查報或自行投稟本縣查明一槩捐貸給
發其積年舊欠錢糧准於冊內註明緩比其二十

三年分新糧亦寬至明年八月間開徵倘有久逃
不回者其拋荒田畝不論遠近人等願承種者報
明註簿給與印帖開墾成熟永遠管業不許本人
復回爭執至於新舊錢糧一體寬比緩徵勿懷疑
懼勿再觀望自失機會特示

一禁革扣櫃

本縣前有剗設每糧長開徵梨板油硃赤曆水脚
奏銷鳳奏漕奏加派每排年耗米棉布赦冊公費
朝覲冊費一十二項名色每歲截扣櫃銀糧里沈

行等具控。撫院余准批本府趙審明出示禁革。隨有紳衿許自俊等控府勒石永遵。准行本縣蒙知縣聞實心釐弊。卽奉勒石永禁。豎立縣門碑諭闔邑士民糧排里書花戶人等知悉。遵照憲禁扣櫃十二款。凡糧排輸納正賦糧米。遵奉藩憲達部由單。按畝科則計算完糧。並不許額外扣櫃。倘有蠹胥仍蹈前轍。設立前項派扣糧排者。立拏重處。申解各憲施行。

邑令徵糧歲奉司發由單不得稍爲增減。但徵比之法不可不求盡善。納戶自封則免侵尅。懸牌示比則免守候。木皂行追則免需索。其限倍完則免刑責。四者免而民力寬矣。浮費省則正供完用寬。正所以用嚴也。在上海陬末吏撫字催科兩無所當。惟殫厥心以祈免罪戾而已。山陰聞在上識



當計... 山... 五... 廣... 其... 之...

水利

嘉邑以地臨邊海一日兩潮河沙易淤歲派塘夫
一年一濬此因民之力濬民之河原屬力役非銀
差也順治九年間以折夫濫觴大為民害奉

按院秦憲行勒石永禁康熙十八年五月二十

八日奉

巡撫部院慕憲票為嚴禁濫折河夫之弊以資

水利事內開照得嘉邑濱海一隅斥鹵沙瘠賦繁

役重民困未甦本部院素所稔悉是以任藩時曾

散在城排年田地歸併各鄉都以均力役使無偏
枯之累至若河夫一項原係通縣額設需供開濬
要河以時宣導實屬水利攸關乃訪有等奸民串
通縣蠹與圖濫折夫銀得以遂其侵漁之壑動
連名上控假稱以公濟公冒支折乾私相中飽其
有紳衿地棍縣衙胥蠹及上司衙門人役濫免河
夫或包攬開濬縣差押扇勒索門面折東管河衙
官每一塘長勒取見面及經承皂快等役需索使
費至築壩早工立有坐啣名色并客宦干求以作

抽豐種種弊害竟視河夫一役爲射利之藪以致
頻年應濬之河淤塞不通田地拋荒人民逃竄悉
由於此深可痛恨除已往姑置不究併出示禁約
外合行嚴飭爲此仰縣官吏照牌事理卽將應治
河道每年秋成農隙之時該令親行丈勘遇有壅
塞要河卽行詳明修濬務須會集紳衿耆里從公
酌議止許用夫不許折銀亦不得徇私致將幹河
停濬混開小河濫竭民力并不許借名公用折乾
分肥如遇有水之年河道旣已疏通自應免濬以

息民力亦不得巧借名色濫折一夫其一應陋規
弊害盡行革除勒石永禁如敢仍踵前弊或經本
部院訪實或被旁人首告官聽飛奏役拿杖斃斷
不姑貸思之慎之文到先具勒石遵依報查須至
牌者等因并發告示一道遵行在卷知縣聞有鑒
於是誓神詳 憲禁絕折乾并力興濬呈爲敬陳
濬河利弊懇 憲採擇勒石永爲遵守事竊惟縣
令身親民社痛癢相關凡地方利弊自當實心興
除不辭勞怨務期有濟垂之永久然非秉公而無

私正已以率人則覬覦者有之阻撓者有之利未
舉而弊先滋欲求其工竣也難矣幸逢

憲臺廉明砥俗 各憲清慎率先爲下吏者不乘
此千載一日之遇爲地方百姓洗心勵志興利除
害者非人也嘉邑地瘠民貧厥田惟下厥賦惟上
花稻之荒熟由於河道之通塞茲因僻近海濱潮
汐衝擊易於淤積例必開濬旱則可以屛救潦則
可以洩瀉是濬河一事誠爲嘉邑第一要務然每
歲額設塘長五百餘名河夫一萬六千有奇力役

不爲少矣前此亦常議疏濬究至作輟中廢者則以未求其實而清其源之故也其弊在於縣令不能潔已奉公以濬河爲漁利之藪官藉口於吏曰公費幾何吏藉口於民曰私費幾何於是承行有費差承有費彼此交徵苛求無忌勢必出於折乾免濬而後已至薦紳巨族遵法出夫者固有避役求免者亦不少更有豪強積棍或倚勢力而掣肘官府或串經承而卸役窮民以至爭築壩而免開濬奸胥蠹吏從中濫冒分侵徃徃築壩與開河所費相等是欲利民而反病民矣

甲職

選授嘉定卽

知開河爲大利然已積久爲大弊而未敢輕議晝夜圖維欲求實効而端本源則自

甲職

始謹擬擇

日集紳衿里民誓於城隍神廟如聞在上萌一毫私意希取分文者本身前程永遠不吉後世子孫滅絕不昌必期心口如一始終不渝聿竣此工以爲

國計民生實受利益之舉至於要河之孰緩孰急派夫之無偏無枯挑濬務深濶分段得均平嚴禁包

攬折乾之弊釐察胥役需索之端委員協理稽核
怠勤種種細欸另備清冊同呈
憲覽第恐積習相沿錮弊未能猝革勢豪梗法卑
員難使遵從必求

憲臺威靈飭示俾知懾伏趁此晴冬農力休暇水
涸河清便於興工挑濬更祈
鈞檄鑄勒珉石建
立通衢使千萬襪後永禁折乾之例常收開濬之
功則嘉邑六百三十里億萬戶生靈均沐
憲臺溥博之恩於世世矣

計開

一審緩急

膠邑應濬諸河不下三十餘處里民分額各
憲亦不下十餘呈但民力有限詎能一時並舉
董工員役未免顧此失彼近集士民公議莫急
於南橫瀝東馬路北橫瀝等處俱奉
憲批查
議開濬第南橫瀝尚可通舟楫至東馬路將漸
成平陸矣况濬本身大河必疏通其附近支河
而後有益於腹裏田畝甲職
現在親詣河干查

勘緩急從東而南以及西北次第循濬四年之內一邑之要河可以悉舉仍週而復始永無旱潦之虞此斟酌緩急之勢非有先後之偏也

一杜折乾

每歲河夫原爲濬河而設一遇不肖有司奸胥猾吏或借軍興修城船工等名色或遲至交春東作方殷詳請免濬爲由於是民以開河爲勞苦請托鑽營避役偷閒官以徵夫爲得計恣意徇情飽橐批允遂至有限之河夫半歸無窮之

慾壑不知折一夫之價值卽少一夫之力役往往作輟廢弛者俱由是也今當首絕此弊如有勢豪蠹棍壓制于求者立報各憲拿究處死庶事有濟而功可期矣

一均分段

仁政必自經界計畝以定力作古人慎之者恐有偏枯不平勞逸不均之失也濬河原係大役欲其無此盈彼縮之累當先講分段丈尺之公何則河底不能有淺而無深河岸不能有狹而

無濶若不於分段時量河額之難易而分開河
之多寡則有偏枯勞逸之累然假手胥役必至
矇混作奸屆期卑職親丈酌派釘樣椿繫水線
手自註冊使民知出於至公而後經營可必其
子來耳

一禁包攬

嘉民既刁且黠故徵糧則有包排與訟則有包
告遇開河則有包夫攬濬之徒此其人田無寸
土家無餘丁常武斷於鄉曲更遊手而好閒或

交通蠹歇積保或線索墨吏奸胥愚民貪些小
便益且亦畏其克惡每每設席立議包攬充當
彼則惟利是漁羣黨瓜分不過招募幾名無籍
丐徒荷鍤負土點名塞責苟且了事而已卑職

嚴訪得實當立斃杖下以除從來有名無實之
弊

一慎築壩

有濬河之役卽有築壩之役任力役者派之濬
河願壩工者派之築壩二者總屬大工不可偏

費祇因築壩之費省於濬河塘長避繁就簡一
屆議濬請托求批以致冒濫不均今日築壩之
說莫如均派但河有幹支壩有大小需費有多
少派夫亦有多寡卑職親驗工之難易於各塘
長名下均派一例公築不許纖毫偏枯亦不苟
徇情面庶幾濫冒杜而弊害絕矣

一停差役

該管經承每當開濬糾合皂快先議差票或賄
托要津或餽繳公費坐名圖里浮貼僉差如查

工點夫有票釘椿繫線有票風旗號段屏水掘
批完工結狀有票種種名色不勝悉舉若輩既
費資本必圖厚利橫索苛求夫小民肩此重務
胼手胝足苦已難勝豈堪復受此重重朘削一
應差票革除不行公議每里中舉報謹厚有身
家者共董其事有不得不差者卽僉其名催呼
承應去其妄費竭蹶公事亦鳩工之善策也

一除切補

紳衿田畝現奉 憲行清散一體當差無不悅

服至議及開河更爲

國計民生起見俱懷踴躍爭先之意向爲蠹胥作奸
不論非紳非衿捏名註冊名曰切夫至各衙門
胥役承差亦各濫冒切免而開濬遂成故事矣
至於沿海七八兩都充烟墩馬路修橋營房諸
差向奉恤免此情理之至公乃好事之輩於免
濬之外又欲扣補濬夫名曰補夫於彼地小民
無益而徒滋中飽今俱一概停止以示至公不
偏之意

一禁協理

幹河旣多支河亦繁不可責成於一時自當按
隅舉行但冬仲至春季不過二三月民力空閒
爲日無多勢必晝夜鳩工兼程督理若使一人
奔馳保無顧此失彼自當詳委佐貳分爲襄理
者也前此開濬盡委其責於衙官未免職小不
足以彈壓豪強且未必皆寡慾愛鼎之侶今不
專任而分任之卑職親任河干不時稽核卽糴
殮日用隨帶自給不取於民倘有違禁干私揭

報各憲以憑叅處果能潔已奉公實心辦事
完工之日請憲獎勵鼓舞後効此約舉八端
陳其大概至於因地措施隨時制宜俟批允之
日再爲酌行者也案於

康熙貳拾壹年拾壹月初七日詳奉

總督部院于批據詳濬河各欸事宜井井有條
革除錮弊利益民生洞若觀火真大經濟之才
也可喜可羨仰江蘇布政司查照通詳仍轉
行遵照以觀厥成

巡撫都院余批如詳舉行務期始終如一方見
該縣之實心實政此繳

布政使司丁批據詳濬河八議果否可以興剔
力行仰蘇州府確議詳報奪冊併發

蘇松常道祖批開通水利誠爲該邑最急之務
仰候兩部院示行具報繳

本府正堂陳批仰候各憲批示具報繳

本府貼堂孫批條議中斟酌時宜分晰利弊可
謂詳且悉矣足徵留心民瘼果能心口相應造

福於嘉民非淺也事關濬河盛舉仰候轉詳批
示行繳
是役也於康熙貳拾壹年季冬興工於貳拾貳
年仲春告竣呈報 各憲蒙

總督江南江西等處地方文武事務兼理糧餉操
江兵部尚書兼都察院右副都御史于 憲牌
行縣內開本月初三日據該縣呈報濬過各河
完工緣由到部院據此爲照河道爲通邑脉絡
自應疏濬以利攸往但奉行不善適以累民茲

係于清
該縣
情疏
河一節
而處
置咸
宜則
其經
濟之
才已
可

該縣相時興工既不病農且量工獎賞又分勤
情疏河一節而處置咸宜則其經濟之才已可
概見合頒勸戒書一冊以示獎勵爲此票仰該
縣官吏照票事理卽將此書查收公餘披閱嗣
後益勵廉隅盡心職守本部院斷不靳薦拔慎
勿勤始怠終有負本部院一片期望熱衷也須
票康熙貳拾貳年五月初六日計發勸戒書四
本

濬河本以利民也一興濬而弊叢之是利之而害

十矣 在上 於節年停濬之後急為修舉務去其蠹

斯役者而後從事焉指陳八款所以云救也語曰

害除則利興豈不信哉 山陰聞在上識

...

...

...

...

...

...

嘉定縣續志卷之二

學校

本縣學宮自順治十三年前任知縣劉弘德修葺之後迄今三十載明倫堂尊經閣兩廡禮門等處漸次坍塌康熙二十一年五月十九日烈風暴雨文廟坍塌前縣案經通報各憲以工費浩繁未經修舉今知縣聞在上會同闔邑紳衿糧里設法興修於康熙二十二年五月二十七日通詳各憲蒙撫部院余檄行將本縣三甲河夫銀十分徵三



修葺學宮。從來有司未有通行修復者。今知縣聞奉文興舉。將前後殿宇堂廡門坊亭舍盡行改剏。于康熙二十二年十一月初七日興工。皆侯親自督理。遴選耆碩秉公協贊。故傑構煥然。費省而功倍。工成之日。另有碑記以識不朽。募修寺觀。人皆不惜金錢。聖宮頽廢。則無有過而問之者。豈二氏之教果靈于至聖乎。抑縫掖弟子不若緇黃之善于募告也。嘉學之傾敗也久矣。勢必鞠爲茂草。今奉憲行以河夫修葺此文。教誨

興之一會在上。濫竽茲土。恪遵憲檄。敢不殫心。

受事以竣。大工但期邑大夫士相與扶掖。聿觀

成所至願也。山陰開在上識

鄉賢祠

明兵部職方司郎中殷都

鄉約義學

查嘉靖十四年知縣李資坤於縣治東建四門小學。鄉聚以鎮名者十有六。亦各建小學。至萬曆元年改四門小學爲理刑公署。嗣後各鎮小學相繼

將
傾廢知縣聞于每月朔望敦請老儒於四門公所

上諭十六則反覆解喻以廣教化復設義學捐俸延
師生員王昇等訓迪民間子弟一時文教蔚然興
起嘉邑以奏銷之後子衿寥落以致歲科縮額今
已濟濟多英科名漸盛通學生員王晦等呈懇廣
額知縣聞在上詳請 督學道趙 言辭懇摯蒙
批仰候閱文定奪繳茲發科案視前額頓加二倍
錄取七十二人士類懽騰

職官

知縣

陸龍其

字稼書浙江嘉興府平湖縣人庚戌進士十四年任有傳

馬雲會

字賡臣奉天遼陽人鑲藍旗官監生十六年任捐納候補京職

聞在上

字爾達浙江紹興府山陰縣人吏員二十一年任

縣丞

沈懋賡

江西贛州府會昌縣人歲貢十四年任

姚元弼

順天府昌平州人例監十六年任

桂天申

江西廣信府上饒縣人歲貢十八年任陞雲南曲靖軍民府南寧縣知縣

李芬芳

山西平陽府翼城縣人例監二十一年任

蕭文炳

江西建昌府南城縣人歲貢二十二年任

主簿

職兼水利管糧

王鼎臣

順天府霸州保定人歲貢十三年任

洪天爵

山東兗州府濟寧州人吏員十八年任

典史

魏贊

直隸保定府定興縣人吏員十六年任

宋璉

浙江紹興府蕭山縣人吏員二十年任

教諭

戴芳

前志已載今陞四川遵義府仁懷縣知縣

畢天庚

江南太平府蕪湖縣人舉人二十三年任

訓導

任國鑄

江南徐州蕭縣人拔貢十六年任

雜職

陳存

浙江紹興府會稽縣人江灣司巡檢


李如璋

江西建昌府南豐縣人江灣司巡檢

張廷鑾

浙江杭州府錢塘縣人顧逕司巡檢

康熙癸丑以來不過十數年間官斯土者自縣尹



以下師儒丞簿之屬其為姓名爵里凡幾易矣一披其籍而所為居官之治狀歷歷在人口頰不似夫年世之荒遠而難稽也可不畏與山陰聞在上識

選舉

史魯 字紹曾弘治辛酉舉人正德戊辰進士由山西蒲州籍歷官至鹽運司使致仕

蔡昂 字衡仲由淮安籍正德庚午舉人甲戌進士廷試第一甲第三人授翰林院編修歷

侍讀右春坊右贊善禮部右侍郎

管律 字應詔由寧夏衛籍正德乙卯舉人庚辰進士任刑科給事中

單鉞 字德威由武功衛籍嘉靖壬午舉人癸未進士任戶部主事

吳俊 字士英由武功左衛籍嘉靖戊子舉人辛丑進士任刑部主事

許從龍 由崑山籍嘉靖癸卯舉人癸丑進士終吏科給事中

張九一 字助甫由河南新蔡籍嘉靖己酉舉人辛丑進士終都察院右副都御史以詩文名

侯山 字仁甫由貴州普定衛籍正德庚午舉人任四川大足縣學教諭

已上八人原載韓志者趙志疑其外籍刪去

今仍補錄

徵辟三人

康熙十七年春

詔天下內外官薦舉博學宏詞進士黃與堅許自俊

文學陸元輔應

召入京頒廩粟次年春三月

御試太和殿

賜宴體仁閣應制上璿璣玉衡賦省耕詩與堅授翰

林院編修纂修明史自俊以原授職選山西平陽

府聞喜縣知縣元輔不就職放還山

陞選

顧岱 籍見前志今任
杭州府知府

朱元裕 籍見前志今任山西
平陽府蒲縣知縣

毛贊 籍見前志今任廣西
平樂府荔浦縣知縣

呂鏗 籍見前志今任廬州
府巢縣儒學教諭

顧賓王 籍見前志今選鳳陽
府定遠縣儒學訓導

進士

十五年丙辰科 彭定
求榜

顧焯 內閣中書
今補典籍

十八年己未科 歸允
肅榜

錢顧琛

黃振鳳

舉人

十四年乙卯科

解元施振銓

徐 匡

字漢衡例監中式

朱文龍

字方賡元裕子

顧 琛

字獻侯本姓錢

十七年戊午科

解元宋衡

趙 俞

字文饒貢中式

黃振鳳

字元聲

董德其

字岷瞻

孫致彌

字凱似監生順天鄉試中式是年夏同內大臣嚶奉使朝鮮元化孫

二十三年甲子科

解元潘宗洛

周日接

字介蕃

考之往牒嘉邑科目之盛蟬聯不絕而近日稍以不振章逢之士侘際不聊至有歸咎黷宮之形勢者吾謂學者矢心堅猛濟河焚舟以期必克揣摩既成未有不一發入彀者文章應運雖造物不得而限制之矧地理乎蒞任以來見諸士莫不閉門攻苦摩厲以須其為掉鞅連鑣彙征雲路可坐而竣之耳

山陰聞在上識

近聞以來文途否塞賓興之數視他邑加縮以致
士子鍛羽菰蘆未由騫翥在上目睹蕭條桂林削
色爲之力請文宗懇祈廣額幸蒙俞允得以驟增
二倍一時都人士相向彈冠爭思奪錦豈其厄運
猶纏文明未啓榜發之日僅登一俊而邑中知名
英髦向稱東箭南金悉遭擯落披覽賢書不免有
玉泣珠沉之嘆嗟嗟不鳴則已一鳴驚人飛則
已一飛冲天古人言之矣三年一瞬吾願尚其勗
諸 在上又識

貢生

唐 頎

字德倩 十五年貢

施麟瑞

字玉符 十五年恩貢

趙 俞

字文饒 十七年貢

沈于暹

字公度 十九年貢

徐 基

字中 有二十年貢

申毓來

字子翼 二十三年貢

例貢

韓士琦

字天申 甲子副榜 貢本姓張慶孫子

朱 岵

字翼孫 八年拔貢 松江府學訓導

李 栻

字易官

朱維楨

字皇士

錢 嶙

字介丘 廩生

呂蓮頤

字香令 由府學

瞿有恒

字聖基

張介眉 字壽民由崑山籍績溪縣學

陸沈暘 字登桑廩生松江府籍候選教諭

張映珣 字廸九 戴子來 字文庶 由府學

程里 字雲萬 沈一鶚 字彥斐

滕文昭 字繡孫

例選

戴鑑 字水揆考授州同 旨即選亮子

曾紹弘 字誕先太倉 戴慶長 字宗遠考授 縣丞光裕孫

王宗濰 字維水考授 石 蕭 字天彩順天 府霸州州判

朱祥發 字視節崑山 徐錫葉 字桐封考授州 同學謨元孫

許瑄 字文若考授 金 彰 字亦九考

程暹 字搢扶考 顏 鑽 字懋簡考

范鶴翔 字聞九考 蔡 藩 字吉士考

程時彥 字聖功考 俞 鈞 字平一考

王天爵 字震祥考 程 佩 字昭令考

陳一儒 字鴻彥考 朱 旭 字復旦考

金 憲 字希黃考 丘 德滋 字潤昭考

江東陽 字致遠考 金 聲 字正音考

選舉

王梓 字孝移 考授州同泰際子

黃廷鏞 字宏聲 考授州同

陳珩 字節佩 考授縣丞一儒子

潘廷說 字用霖 考授州同

程昌 字益言 考授縣丞

胡元慶 字履上 考授主簿

郁李 字小白 考授吏目

江旭 字晉臣 正白旗官學教習

朱銘 字又兼 考授州同生員 援例

侯開國 字大年 考授州同 震賜曾孫

沈靜 字寧遠 考授州同

張覲光 字漢昭 考授州同

汪岱實 字柱東 正藍旗安親王貝子府教習 咨吏部候選 允貞孫 价子

戴三錫 字玉上 咨吏部候選

張雯錦 字青城 考授州同

李廷詮 字一臣 吏部候選

汪文懿 字青部 吏部候選 允貞孫 价子

潘祖修 字亦世 吏部候選

汪點 字異三 吏部候選

張凝祉 字餘度 咨吏部候選

程遴 字敷庭 吏部候選

侯來宜 字天岑 吏部候選 震賜曾孫 峒曾孫

朱士熊 字自衡 考授州判

陳有常 字德文 考授州同

唐煒 字赤符 吏部候選

程秉鉞 字佐皇 吏部候選 考生員 援例

張壽錦 字赤城 吏部候選

張方建 字賓日 吏部候選

張方遇 字泰逢 吏部候選

徐廷璧 字玉符 吏部候選 考生員 援例

盧秦湘 字西銘 吏部候選 考生員 援例

陳常 字時夏 咨吏部候選

程明綸 字天章 吏部候選 州同生員 援例

郁珖 字西符 吏部候選

張晉 字晝三 吏部候選 增廣生 援例

陸國棟 字彥中 吏部候選

沈傳 字又文 吏部候選

武科

陸廷鑑 字晉璆 授州同

汪熹 字兩明 壬子科丙辰進士

曹錫命 字子三 壬子科壬戌進士

盛王佐 字聖昭 崑山籍 巳酉科

趙禧 字茲履 乙卯科

張雲錦 字霞城 乙酉科

范周鼎 字乙卯 科

蕭璞 字午科 戊戌

姚鳴臯 字懋吉 由松江籍 戊午科

楊挺英 字午科 戊戌

唐名芳 字令貽 辛酉科

金璜 字來宗 辛酉科

黃永爵 字辛酉 科

武秩

謝庸登 丙辰會魁 歷任山東鐵崖參將 陝西甘肅鎮番副總兵

許効仁 明朝世籍 百戶定國將軍 康熙二年授寶山營守備

王安世 宛平籍 原任福建督標 援勦後營 署守備 事功加左都督 仍記餘功 五次現在候補

吳勝 康熙十七年隨征福建 叙功咨部 授都督僉事

雜進

沈曦 字方旭 考授經歷

沈曄 字公煥 考授經歷

朱琦 字廷奇 杭州批驗所大使 性忼直 為里毫所斃 子羽吉 矢志報仇 百折不回 未取

王寧世 字期生 由功拔任 陝西寧羗州管河州同 未取

沈徵初 字亦園 由隨征供事 官吏部候補 張鴻 字來賓 考授經歷 河工効用

高于蕃 字翰周考授經歷

潘渭 字大源考授經歷

朱淦 字懋昭由江寧撫院辦事咨部考授主簿父燁係先朝耆里時有復漕之令同須大

任等叩關請命得以復折嘉民賴之

沈仕 太平府儒學訓導累舉孝行 朱應選 字士芳監生鴻臚寺序班

戎鎮

吳淞營康熙十三年改定經制

叅將一員

中軍守備一員

千總二員

把總四員

馬戰兵八十名

步戰兵一百八十五名

守兵五百九十七名

各官自備馬二十四匹

戰馬八十四匹

沙船八隻

官兵馬匹歲該俸餉乾銀一萬四千三百九十

三兩五錢三分四厘額米三千一百三石二斗

叅將

孔守義

陝西人康熙十三年八月任

副將管叅將事

傅鵬翔

北直開州人由武舉康熙十九年五月任

中軍守備

王廷綵

浙江人由武進士康熙十六年十一月任

王永勝

陝西人康熙十九年五月任

陳愷

陝西人康熙二十二年六月任

封贈

許大達

以子自俊康熙二十年單恩勅贈文林郎知縣

朱洪基

以子元裕康熙二十年單恩勅贈文林郎知縣未收

考之往牒嘉邑科目最號蟬聯而近日稍以不振至有歸咎學宮之形勢者吾願學者破釜沉舟以期必得雖造物不得而限制之况地理乎今日士子閉門攻苦莫不摩厲以須科名鼎盛可坐而俟之耳 山陰聞在上識



寺觀

大悲菴

在羅店鎮東有碑記大理寺卿常熟錢朝鼎謨民人胡應淳捐貲買朱氏園建造

聖化菴

又名祖師堂里民陳國珍建後年遠傾頹子尚仁重修

娘娘廟

在演武場內西隱寺東知縣馬雲會建造

大悲菴

在婁塘鎮南民人方摺始祖家廟

竹香菴

在東四都南廣僧罕聞住此

白衣觀音菴

在義民毛添安墓左添安于正統年間捐穀賑飢建義民坊

廣生亭

在西城上邑紳士放生于此僧天立建

半山菴

在西門外龍宇號二都邇字圩生員徐文葵捐建僧超鑑徒正因焚修

草深菴

在安亭鎮西詩僧成蔭脩建以鉢資置十

地藏殿 在東四都一畝里人王相鳩葺子俊於康熙癸亥增修有公占基地八分著籍

半憇菴 在結字號十都江灣鎮民程啓賢建造

真孝菴 在南翔鎮東十二都芥字號僧實意建造

法雨菴 在大場鎮東十一都霜字號僧寂真建造

曲江亭 在十都走馬塘南岸鎮民盛同賢建禮部盛符升舉人盛王佐題其額

普明菴 在鱗字十九都黃渡鎮西僧意雲建

問津菴 在文字號十九都四畝黃渡鎮僧三元建

慈雲菴 在一都長橋下里人趙萼修建周遭有救生河邑侯馬有禁約碑記

嘯梅菴 在出字一都十一畝辰字圩十號里人王日新僧古雲募建今延破幻焚修

甘露菴 在十一都夜字號僧祖機建造里人其振先助成

拈花菴 在一都公孫涇上里人趙世祚修建

祠祀

東隅城隍土地祠 在城一畝金沙塔院內

西隅北聖土地祠 在三都宙字號五畝講院內

西隅北聖土地祠 在西門鎮三都帝字號二十四畝即妙音菴後藥師殿鎮民陸光祚建

蕭都監土地祠 在南翔鎮東林院西順治十四年里人戴子樓捐地建康熙二十二年

錢顧琛有記

西隅南聖土地祠

在出字號一都天字圩長壽菴前里民潘禮子鰲孫士嘉相繼捐募建葺始有國雨禪師同百十八臘寂空上人焚修于此太倉大學士王錫爵題額曰長樂我淨本邑大叅侯堯封題額曰長壽菴

賢聖廟

在九畝地方

曹王土地祠

在伐字號四都三十四畝劍字圩基地四分五厘

五路祠

在滙龍潭南一畝紳耆公建

五路祠

在五畝陸家橋西里民徐文溥建

天主堂

在城四畝遠西張安當建

鎮海侯廟

在十九都黃渡鎮里民李彩楊霖僧衍曆建

陸侯講院

諱龍其嘉興府平湖縣人一在縣治西南七畝地方有碑記邑人許自俊撰一

在西門外各鄉鎮俱有

馬侯講院

諱雲會奉天遼陽人在南翔鎮地方任內五年禁絕遊客捐置四門義塚擒治

打降在本鎮者尤多

雙清祠

在城隍廟內祀邑侯平湖陸公山陰聞公

墳墓

孝廉趙中行墓

在馬陸塘中成字圩

墳墓

進士王泰際墓在六都介山菴藏字圩

中憲大夫岳州知府戴光裕墓在六都洪字號西關字圩

諸生馬元調始祖墓在一都陽字號羽字圩

文學朱之尚祖墓在外岡鎮十七都北九畝河字圩一百十四號內

曾魯墓在石岡門公孫涇南趙涇西一都九畝金字圩百四號內廣一畝八分二厘

松陽縣知縣唐恩墓在城西南八畝真際菴後五世孫唐士愷重修

潮陽縣知縣陳國紀墓在東門外春塲東首孫參軍陳賡明墓即附

贈文林郎汪應期墓子湖廣遠安縣知縣允貞祔

葬在往字號四都秋字圩

荏平縣知縣金澗墓在萬副三都李字圩

都昌縣丞吳九齡墓在一都官字圩

鄉賢公嚴衍墓在十都字圩

承事郎殷維墓子錄事清孫中書甫祔葬在衣字號七都

二畝天字圩內

殷光孝墓在衣字七都

節孝圩為孝子侯洵侯演侯灤侯瀨節婦夏氏姚氏龔氏貞女盛氏之墓在周字號七都

時節婦許氏墓在婁塘嶽廟南首宿字圩時懋順側室黃氏附葬

王節婦戴氏墓在六都宙字號姪庠生戴亮營葬嘉善通政柯聳題石曰苦節墳墓

唐烈婦盛氏墓 在二都虞字圩薛家村唐氏祖墳東

吳節婦馬氏墓 在一都字圩

義塚

東門外一處坐落三都寒字號

西門外一處坐落三都菜字號

南門外一處坐落一都出字號

北門外一處坐落三都地字號

已上四處知縣馬置

師字圩一處 新安戴良景置

黃字號四都一處 僧人瑞光置

坐字扇二十二都一處 民人朱祥置

古蹟

孫公泉 在學宮滙龍潭西五路祠前壬戌六月忽有泉涓涓而流其白清冽可以愈疾時郡丞孫公如龍署邑篆有惠政人皆稱其德化所致因題曰孫公泉

再思堂 在縣治內為邑令退食之所知縣聞公在上題再思二字於額以自箴并書一聯云不觀不聞一事亦須嚴手目

未取

思圃 在邑之羅店鎮諸生范光啓因父伯翼弟光昭死於兵光啓於死所購地築亭樹石以志

痛顏之曰思圃名入多有題咏

戚畹

因奉文查取
載入此條

周奎字雲路，邑之婁塘里人。祖塋在長洲，寄居京師。生女清貞、端淑，幼坐一杙，治衽不與人同。為明懷宗烈皇帝后，下部議奎封爵，部議長洲嘉定二邑名懷宗、點定、晉封嘉定伯。有子數人，皆登顯秩。甲申三月十九日，闖賊陷京城，闔門遇難死。

名宦

趙昕字雪乘，餘杭人。順治辛丑進士，初宰嘉邑，適開劉河吳淞兩大江。昕躬為督濬，俾水旱無虞，荒田



變爲沃壤邑志廢墜已久昕爲通省首倡編輯精
詳識拔士子四十餘人每月會課於春雨堂諸生
登鄉薦食廩餼者甚衆童子無一人不青其衿人
皆稱爲昌黎再世云

陸龍其字稼書康熙庚戌進士平湖人躬秉道義爲
理學名儒首筮嚳邑令歆血誓神以清白矢蒞任
後夙持冰蘖祇飲祁川一杯水薪米油蠶之類悉
載取于家官舍聞機杼聲責令僕人治圃以供蔬
食清真恬淡一意與民休息諄諄勸諭赤子早完

糧勤種作敦孝弟息訟爭文牒胥役從無下鄉桎
梏桁楊懸而不用暮年之內德化大行官清民樂
廉吏動與時忤中以諱盜落職出署日風日慘霾
五鄉之民連臂入邑男負耕具女負織具填塞城
門蜂擁公堂號呼慟哭臥轍不行次日各鎮迎長
生至位金鼓花幡往來如織至新官蒞任尚未衰
止事聞于

朝舉博學宏詞以丁外艱未試而歸廬墓三年教授
弟子左都御史魏象樞特疏舉薦不樂仕進以登

奉部文催促不得已赴補士民額手祝其大用
殷相字元亮雲南楚雄府鎮南衛人順治八年隨續
順公征閩題授嘉定丞飲水自矢蕭然寒暑如雲
水僧一日役人以官錢進相震怒曰豈有官而歛
民錢者豈有錢而目以官者撻而斥之令委之濬
河塘夫謁有規例峻革不受俸薄不能飼八口冠
服常質庫中解後有隙地植南瓜以爲家人飯勞
瘵成疾遂不起邑人士憐而殯之葬于邑皇慶寺
之東置屋數楹地一區以棲其妻子

邑之職官無幾大要設以牧民古有思其人因以
愛其樹薦之俎豆而稱道勿絕者此名宦所由稱
也今世風而日下矣繻袴之歌釜魚之頌人盡得
而有之長斯民者獨無愧于心與茲所錄者聲實
並茂至今歌咏在人無虛飾也

山陰聞在上識

人物

范騰字搏霄博學多聞建安楊文敏公見所著述稱
賞不置正統間與同邑陳述以賢良舉當事者難
之曰一邑二賢不勝舉矣或勸其以賂進騰正色

日出處有命寧可以賄辱名器耶拂衣歸終身不求聞達子紳字朝儀行誼高潔不就辟舉工古文詞善行草八分小篆爲時所重

周璇字仲璣讀書多識隱居教授以吟咏自娛嘗預修邑志

湯珍字子重績學工文辭雅自標位爲人倫所推吳中前輩唐子畏文徵仲王履約履吉皆友之以詩相揚扞爲社楞伽山中後進稱詩者多從問業文休承壽承彭孔嘉其著者也其後臺察大吏卽結社之地建祠祀珍及諸子其中有司爲置祭田歲時伏臘焉

潘士英字子實以孝友稱於書多所誦記而獨邃於宋儒理數之學所交皆一時名士好獎進後輩竟以學博士終母御新婦嚴嘗奮杖擊之簪入於頂而仆驚往視婦俟小蘇卽與同跪中堂以謝母偏憐少子士賢士英亦憐愛之相得無間也

李士龍字應明平生修謹與物無忤自少讀史見古人義烈之事輒感激欷歔思以功業自見旣老困

縫掖宦游閩浙積十餘年及歸以詩畫咏歌自適
泊如也所著有雲塘集萍隱錄

陳炎字上之博通強記詩類韋孟文有歐陽氏之風
于時唐道虔潘子實殷集卿爲士林冠冕炎以後
進游三先生門庶幾步趨之矣平生于物無所齟
齟與賢者處則以道義相劘與不賢者處由由然
不見可否之迹乃其中嶮然者人莫得而測也

朱用賓字獻夫有異才逾冠名重一時嘗授徒不肖
子苦其嚴置毒食中遂瞽一夕夢見日光覺則見
日光矣明年試京兆主司見其文欲置第一而所
對策數千言錄者厭倦刪削不成句乃置第十已
試南宮不第而目疾復作然與子弟討論經傳六
藝之文鏗然成誦也爲人愷悌直諒好獎後進至
今多懷之

宣應楫字仲濟少事崑山歸太僕有光以文名諸生
間然人尤重其行誼稱爲長者爲人外溫內剛遇
所不可貴勢不能奪所善龔可學爲家奴所賊殺
卽倡同好訴之令賊久未得應楫踪跡盡得其黨

令疑不可盡誅因前白令奴殺王安得罪有首從
遂悉正法龔歿而乏祀歲中以時哭奠如其家人
及期復爲文以告之乃已真長者哉

已上八傳原載韓志者趙志偶遺今仍補錄

何平字匡山御史選之姪孫崇禎庚辰進士由高密
令起家歷任至福建督糧道布政司叅議所至皆
有政聲平先世邑之婁塘里人解官後攜家歸故
里茆墓草葺先祠于城居新舍之後得廢地一區
築亭于其上顏之曰學圃躬爲藝蔬日與歲寒老

友許潛壺汪三儂輩觴詠其中不詣公府不以竿
牘溷當事左琴右書泊如也所著有學圃亭詩繼
響陶韋無子立姪邑庠生珏爲之後

王泰際字內三崇禎戊辰恩拔貢生庚午舉于鄉癸
未成進士性至孝榜發卽請假歸覲甲申丁國變
北望號慟與同年黃淳耀約偕隱不仕復書載陶
菴集乙酉兵至城陷淳耀兄弟並以身殉聞之遂
遁跡故廬構三楹曰壽硯自號硯存老人閉戶著
書足跡不入城市當道式廬再三卒不得見累舉

賓筵辭曰某無爵于朝安敢辱三辰大典平居葛巾布袍時或長齋繡佛寧靜澹泊四十年如一日乙卯冬無疾卒年七十有七門人彭志古通家侯沆等引易名大典謚曰貞憲先生所著有氷抱集十二卷過日詩選八十卷子霖汝楫汝先後舉于鄉梓太學生

張鴻磐字子石爲諸生有聲黌序間壯歲卽棄去帖括耑肆力于詩古文辭虞山錢牧齋與爲忘年交鴻磐實具經濟才非無意當世者嘉定瀕海斥鹵

不產稻禾漕米八經核實奉旨永折忽于崇禎十四年奉文半兌本色民心駭亂後改麥折勉竣一年鴻磐同侯沆申荃芳等挺身伏闕仍請永折得奉俞旨萬民利賴功在不刊又精于書法顏筋柳骨人稱爲書聖云

朱廷選字掄生文章品誼蔚爲儒宗出試有司輒受無雙之目才不配命屢中副車僅以明經貢大廷士論惜之平日穿穴古籍淹通四庫之書所爲制舉義高文典冊脫手抄傳教授門弟子四方來學

者不下數百人彬彬衿佩有西河南郭之風老與
歲寒友許自俊汪价輩陶情詩酒至樂也沒年八
十有五門人卒哭私謚之爲靖文先生

周陳俶字義扶原籍虞山人母陳氏年二十三遺腹
六月生俶伶仃孤苦甫弱冠補嘉邑諸生言規行
矩動以古人爲法每歲館穀所得惟奉其母甘旨
壬午舉南闈鄉試第二人閱二載卽逢鼎革流離
播遷於風雨泥途中俶常負其母以行迨後母病
每于星月夜虔禱願減已算以益母壽母病尋愈

庚戌成進士貽書友人曰某不以一第爲喜以老
母六十年苦節得稍舒眉爲幸同年蘇淵爲作錦
娛堂記

唐咨禹字定宇格天孝子沈理之裔孫後繼姓唐由
舉人仕至布政司叅議崇禎間任兵部員外郎時
邑有復漕之議咨禹在京力爲營辦事得寢嘉民
利賴之性孝友族人倚以舉火者甚衆嘗以其餘
產分給之遇歲荒親友多稱貸者力不能償悉焚
其券子天穎媳施氏以節孝稱

周用中刑部郎中周道隆父也以明經入彀三任教職一署縣篆俱以實心行實政性秉忠直擔當任事爲諸生時於文宗前力保行劣生員黃俊之無辜請加廩膳之粟米使得給其膏火初任青陽司訓造就人才與諸生劉光復相契終爲直臣絕九華山之巡游撫按不終迎送此大節也再任浙西太平秉教日與士人校課星夜不輟有集賢祠塑像尸祝宋元以來連用中不過四人署篆天台清政愛民不五月而大治終任淮安見知于漕撫力辭薦賢致政歸家七舉鄉飲大賓年近古稀生平性好游喜種菊是以邑人有樂園公後裔之諺父臣爲刑椽多隱德力釋救小民數家之寃所以後嗣至今昌熾亦其驗也

周道隆萬曆癸卯舉人性甘澹泊布衣蔬食爲諸生時卽以生民休戚爲念嘉苦兌漕同殷司馬叩撫按兩臺不辭勞瘁後事得寢司教銅陵與諸生莠文葺學士子樂與聞父病劇卽棄官歸嗣令宜章永兢六載山城斗邑狴犴軍民雜處道隆苦心安

撫勸猥獯讀書知禮達知文宗給其衣巾隨于學
宮猥獯之首付以冠帶凡衆猥爲奸宄者俱以傾
服時值饑饉賑倉粟千斛不復爲變其治民也終
歲之中蒲鞭示辱沿街尸祝虎不害民戊辰行取
去任之日輓留泣送者至五百里外已巳在京值
朝議有復漕之事星夜與給諫張存誥叩戶部左
侍郎錢梅谷轉懇大司農鄭三俊求其暫緩連遣
使南旋致札於縣令謝三賓士民叩闕事終得寢
後陞大理寺評事留棘寺三載獄多平反民以不
冤卒于官三院批詳崇祀鄉賢有閭里釋挽漕之
累功垂一邑等語又有立議永折一節普惠地方
千古不朽等語所著有史要涉江集等書卒燼于
火惜不復傳

朱大經字經甫號守菴少聰敏年十三赴院試卽作
易書三藝與許大達趙世鼎輩同補諸生試輒高
等中萬曆乙卯副榜所著有守菴集文行兼優年
十六詢知先世墓地久屬他姓者登隴灑涕矢心
復業至強仕以覲田所入得妥先靈且量加式廓

爲族人無墓者地祖母周氏歿赴試江寧歸已夜
分聞訃號哭刺水而行臨棺欲絕長兄大振諸生
力學早世無子以子奇穎爲之嗣所遺田業手疏
告廟兄有女爲之贈兄有妾爲之妾兄有戚友爲
未之清白無幾微自利身任三世塋事規模弘敞不
以奢辭有幼姪鬻於人者爲償其姪值而歸其契平
時與膠西徐宜兄弟友善以隴首相望爲期售以
海宇圩地今墓在焉其孝於親友於兄弟信于友
朋大略可睹至其內行克虔自少迄壯無一婦女

狎處事其接引後生必勸之學課子之後兼課孫
所規制義皆澤於理而不爲宿談故里中知文士
及邑長歲較者嘗謂朱氏子學有本原皆其教也
所居在城九畝友人趙世鼎贈詩有鴛鴦池上名
賢圃之句妻陳氏相助合理今讀其集中誌銘有
古偕隱風子三人篤行好學皆能繼之長子芳穎
府諸生舉鄉飲賓次子奇穎

本朝歲貢士授平遙知縣凡五年歸裝不能名一錢
泊如也季子名穎年十七與仲兄同補諸生卽逸

不就試

趙世熙字以寧。邑諸生。孝廉。中行孫。早有文譽。負經濟大略。邑中爭區折漕。官布白糧。諸大務抗論。嶽嶽多賴其力。崇禎辛巳歲。稔復漕議。起世熙見直。指危言。嘉定不但無米。卽十萬糠粃亦不辦。直指動色。隨改行麥折。次年又力爭之。得并折。邑藉以完。先是萬曆戊申歲。稔世熙父諸生承易。設法救濟多所全活。人謂累世有陰德焉。子萼。邑諸生。有學行。孫俞。今登戊午鄉薦。

朱音穎字兼兩。號九愚。大經仲子。本朝辛卯歲貢。

壬辰 廷試上上卷。授山西平遙知縣。少英敏。年二十遊庠。科舉連七次。每歲廩給歸。乃父以當祿養父歿。瀝情終喪。兄弟友愛無間。所遺嗣父田產悉與均之。課姪璘。珣。璠等。同補諸生。邑中爭延爲子弟師。母陳孺人。因任遠不獲迎養。留妻王氏奉侍。每歲令子以俸歸省。并量贈兄姪輩。以悅母。至母歿。援例終喪。不允。日夜悲悼。幾至骨立。涖任五年。癸卯典武闈。丙午文闈。掌試卷。每課生童。

王文者無不當意邑中逃人之苦輒連廿家有王
姓者挾仇首及一堡不爲准行告之臬憲司李批
訊悉申其誣傳至典史付招改換言王姓許臬及
李各千金縣中亦千金也却其說至觸怒因之去
官不之悔也歸時邑之士民願留墮淚妻王孺人
事姑如母姑歿殯殮諸費悉代任不失禮平時相
敬如賓有郤與遺風子球珪瑗瑛先後遊庠奉訓
謹飭諸孫輩悉課以詩禮人稱淘漉朱家年七十
六考終所著有周易纂註解陶錄天翼堂集

許自俊字子位晚號潛壺天姿敏異淹通四庫之書
與同邑汪价以詩古文辭相砥礪龍章鳳采競爽
入林時有許汪之目自俊臨文筆不停綴絕麗驚
竒崇禎癸酉舉于鄉至康熙庚戌始成進士時年
七十矣又十年而預博學宏詞之徵循資出爲聞
喜令刻厲清節治行無雙崇祀於鄉學任未一載
浩然乞歸日與歲寒老友尋盟松菊年八十四歲
忽盥洗端坐口誦偈語三章以遺集屬价序行目
遂瞑人生於世爲文章宿老爲科目高魁爲江左

仁賢爲山右名宦衣冠士族可謂全人也已

趙萼字九英世熙子少穎悟甫九齡能辨班馬異同
早補諸生工藝文尤饒經濟謂未俗澆訛在章服
無別權度不齊又謂營汛無事督令治附近河渠
可以闢荒土練軍實軍官以鷹捕有功者陞補故
縱有罰則盜自無所容持論皆切時用多可採至
行過人嘗減算以愈母病父患痰欬唾壺廁踰親
自滌除旁通天文宮卦壬奇醫卜星平姑布青烏
家言雅不欲以此知名長子俞戊午舉人

蘇淵字眉聲弱冠爲諸生貌清癯性愿恪言訥訥不
出口偕伯氏澆讀書涓浦之上爲制舉業如濯錦
春江鮮麗奪目時未嘗有識之者同邑侯雍瞻素
精月旦人號龍門一見淵文大奇之題其卷云如
此文一字十縑猶云薄贈衆乃絀服壬午與黃淳
耀陳倣並舉南闈三人者志行略同迨淳耀殉城
難淵撫其孤塋課讀妻女折箸如子壬辰以副車
例請得掌碭山教日坐臯比與諸生講道論藝隣
壤負笈從游者甚衆後歸里門閉戶著書于文宗

師大家詩則沉酣少陵字句間間有聲病而兀傲
自喜邑中河漕諸大事惟淵持議鑿鑿不苟雷同
所著有或齋稿若干卷猶子樗什而藏之淵從弟
諸生融晚而不遇彷彿遺山中州遺意著續練音集
闡揚遺佚亦史氏之功臣也

項思尹字莘友賦性惇篤制行清方專肆力於文詞
屢困場屋戊子既入殼復置副車例得貢大廷授
職郡司馬復應京兆試者五始就選得兗州倅督
視泃河向設夫銀爲河官肥橐思尹至悉革之城

壩有閒田爲之捐俸植柳以紆民力因峻勵清節
失部使者意投効大府量從左遷篋中惟遺遊泃
詩草一卷歸家後仍坐寒羶教授弟子取館穀以
餉八口傷嚙俗之漸凋著爲芻言以志警邑令陸
公龍其甚重之宦歸而貧逾於昔死之日至不能
殮胞兄思臣籲免明末濫加漕糧每年二萬七千
餘兩子正亨正誼姪復亨輩皆有文聲

王翊原名楫汝字翰臣晚歲自號東臯前明癸未進
士泰際之仲子乙卯舉人霖汝之胞弟中辛卯科

舉人幼負異才博覽羣籍動以古人自期登賢書
後其窓課闡墨紙貴都門海內之言聲氣者爭欲
得之以爲眉目結納名流不苟然諾遇邑中公事
能抗言無忌不揣合當事意以相詭隨惟務有裨
桑梓庚子辛丑間江南逋糧案起翊註誤籍中遂
扃戶不談當世事窮研岐黃之術活人甚多雖窮
巷單門昏夜有邀必赴天性孝友能先意承志委
曲以順親心兄歿後撫諸孤如子此其內行之可
以風世者年踰六十以病終遠近有識之士謂練

川王翰臣竟未得展其尺寸淪落不偶以死爲可
悼也子四人俱能讀父書爲邑諸生長子晦尤卓
越逸羣

一邑之中人材輩出求其卓然稱不朽者指不數
屈茲所紀載或及于韋布之士而軒冕有不得而
與焉者先賢名德著在人口不可沒也詩曰高山
仰止景行行止後有作者可以風矣

山陰聞在上
識

孝義

茅震字起之父瓊早喪母陸氏守節被旌震事之

盡孝專治婦人科兼工鍼灸所著有胎前產後書
藏于家

顧夢欽字公肅篤學砥行動軌先民家貧無以爲養
教授所至常奉母以從浣濯綉綴至厠牖皆親之
平生不樹產業修脯所入與其弟共母病亟嘗割
股以療竟愈客于韓氏晨起有小青衣以盥水至
驚止之令勿入其細行多此類也

楊仁實者集仙宮道士吳元年知州張率業以城歸
附而上海人錢鶴臯結諸邑子弟數千人爲變入
據嘉定城繫率送松江獄脅以兵刃仁實蓐食草
屨奔救之終藉其力以免

已上三傳原載韓志者趙志偶遺今仍補錄
吳善父病臥床十三載善奉侍湯藥如同一日兵燹
時人皆逃難因父病篤不出遇兵執而不加害人
謂孝感所致也撫院慕旌表其門

王繼旦字公遜生員王定國幼子痛父早喪一生茹
齋節飲母朱氏性嚴重委曲順志能令室人盡孝
母病臥床三載奉侍湯藥寒暑無間母歿承漿不

入口者三日哀號幾斃更能安寡嫂陸氏全節知縣陸申詳各憲撫院馬給扁示旌

朱廸父早喪事孀母楊氏至孝娛以甘旨母病親嘗湯藥衣不解帶自滌廁踰昕夕籲天減算益母尋愈迨沒哀毀骨立喪葬盡禮歷奉各憲旌獎

高必登字瑞芝名宦高衍孫之裔家世多以忠節著必登幼業儒不就性至孝母沈氏病篤焚香告天割股作羹以進母病尋愈

黃國士父病篤醫藥不效焚香默禱割股煎湯以進父得重生一十二載父歿家貧喪葬盡禮里黨公舉孝行人皆稱其孝

唐永禎家貧業賤事二親至孝父病衣不解帶躬奉湯藥祈天割股親疾以療子士超士起孝養一如其父知縣陸給扁獎之

諸生潘潤字雨臣性至孝家徒壁立泮灑必備厠踰澣濯無不躬親嘗陰行善事以祈親壽父病輒禱神減齡以益算及歿哀禮備至葬後廬墓三年學使蘇以孝行可風旌其廬學使李巡按李皆給粟

帛報部順治七年聘修啓禎實錄康熙十二年同
修邑乘

張允陳字雲臺天性孝友母年八十六允陳逾艾猶
戀戀作嬰兒色凡浮屠廟宇裝佛飯僧不惜千金
布施以祈母壽曾夜拾遺金百兩守而還之與弟
允祖字雲巖終身不析產有公藝家法父病時祖
常刲股病立起舉耆民凡邑中利弊侃侃直陳動
中機宜人皆服其敏練陳子欽明邑庠生祖子凝
祖太學生俱能克遵遺訓

劉堪字彥章邑諸生至性過人年十五母病籲天刲
股父尚友以學行聘詣京師甲申寇亂堪千里冒
險於兵燹中尋親以歸父病下結堪以口噓氣導
其穢汗病得痊尚友自作孝行歌以紀之

生員錢昇字雲表早年喪父事母徐氏備極孝養食
必甘旨藥必親嘗歲時伏臘懸父像于堂哀痛倍
切伊母徐氏二十九而寡守節二十餘年不改搯
雖其母節比栢舟亦昇之養志有以慰之也

唐正隆字彙公孝友天植母趙氏亾後終身思慕如

嬰兒康熙十三年九月二十七夜父士元病篤正隆剖股煎湯以進父病尋愈復得延齡七載事後母印如親生有閔損王祥之風焉歷奉各憲給獎顧士臣秉性善良格天仁孝節奉撫按鹽三院及諸道憲榮獎給扁載在憲綱題請建坊酌授官爵按院馬舉報善人列名旌善亭知縣趙延請鄉飲人以爲有光盛典云

陳玄植字子培九歲失怙祖母與後母共撫之祖母病割左股以致湯藥病尋愈及後母病復欲以事

祖母者事後母謀諸元配印氏氏曰君勿傷舊痕氏遂自割其股以進病亦尋愈通邑稱羨交勉于孝黃陶菴先生有文紀之

朱永慶至性孝友母葛氏孀居抱疴日侍湯藥雖嚴寒溽暑衣不解帶蚊虱擁身亦不之覺病篤籲天求代割股以進夜夢神人憫其孝行益壽重生年至八十三而後卒既沒經營喪葬哀毀盡禮邑令陸表其廬曰寶桂流芳

陳無伐字謙服好行善事精于醫術事父鶴雲母徐

氏至孝有妻馮氏偶失歡于舅姑無伐立遣之終
其身不再娶人勸其爲宗嗣計無伐謂吾弟之子
卽吾子也晚年棲心內典以其家業悉歸之兩弟
謙亨謙吉年六十七水齋三日說偈怡然而逝甲
子邑侯聞旌獎給扁孝行可風

沈仕字長卿太平府學訓導事親至孝竭誠奉養孺
慕至老不衰親病朝夕焚香籲天求代親沒終身
茹素廬墓三年至於體親之心恤姊妹而授以田
廬撫弟姪而代爲婚嫁吉祥善事靡不力行歷奉

各憲旌異兩舉賓飲康熙十九年奉督學道劉批
入忠孝祠

孝子潘祖錫字晉蕃以父諸生潤公舉楊烈女奉憲
題請建坊之後夜夢楊託生卽生祖錫天性孝
友稍長克家如有夙慧服買力田時時似作報恩
計囊有微貲卽爲父母覓甘旨製衣佐兄祖修讀
書入成均試棘闈無不咄嗟立辦父赴飲風雨挈
僮候門入廁昏黑侍立服勞奉養愉色婉容定省
溫清無不備至聞

朝廷開捐納例留鬻產之貲預爲猶子地待兄嫂不分爾我不幸顏天然報恩而來留恩而去臨歿生一子名琳有後室人沈氏徐氏雙節待旌

諸生周粲字逸馭乙酉之變與妻楊氏避兵石岡聞兵至夫婦同匿河中楊爲兵所獲欲汙之遂躍水死兵去粲往救之無及矣時粲年三十五痛妻之死終其身不再娶鰥居四十年而卒

王涇邑之孝里人十齡失恃事父懷田孝養周至父病幾不起涇夜半焚香籲天請代刲股作羹以進

下咽卽甦嘉靖間撫按廉訪孝行聞其事于朝詔旌其閭給冠帶終身舊志皆未載今補之

李兆祥字君發讀書篤行爲嚴永思先生門人終其身不二色祖碧溪病危兆祥默禱於神刲左肱和藥以進立起沉疴閭里嘆異以孫事祖刲肱盡孝尤爲世俗所難

陳大宗父廩膳生陳曾芝逋糧被逮夫婦號慟欲絕大宗慨然曰男願代父死挺身赴縣縣令潘公師質整容禮之曰此真孝子也改名解部是歲順治

庚子嚴寒，械繫就道。凡有識者，為歌風吹枷鎖滿
 城香之句。諸生潘潤具酒肴，戒行李。祖道西郊，代
 為完逋。械至京，下請室，遇赦生還。

予獲罪，幸免。受命出獄，各無異志。未幾，李士門入，其
 到其間，情狀亦外。長官欲殺，未幾，今歸。

(Faint bleed-through text from the reverse side of the page)

嘉定縣續志卷之三

列女

唐宙妻趙氏宙亾年二十餘耳而能一意教子以詩

書繼其先澤萬曆二十九年知縣潘川韓浚爲文

表墓

陸濟妻莊氏年十九而寡萬曆二十六年臺使交旌

楊徵亨妻吳氏年二十八而寡萬曆二十九年臺使

交旌

太學已上三傳原載韓志者趙志偶遺今仍補錄



太學生丘隆光妻顧氏事姑孝遇病泣血進乳益壽
父病刲股療之有古曹娥風明督學御史倪題旌
建坊額曰雙孝之門向未入志今應補叙

徐允迪妻錢氏係孝廉錢春沂女適徐中丞孫允迪
二十五歲夫亾撫孤兒延祚年方三歲教育成學
爲邑諸生苦節六十餘年前朝卓侯具詳各憲旌
獎崇祀向未入志今應補入
給諫侯震暘妻龔氏方伯錫爵女誥封太恭人事舅
姑至孝姑陳太孺人臨歿時執龔手願世世汝姑

我婦以相報教子孫動必以禮家庭之間肅如也
崇禎甲申流寇陷京師龔謂其子通政峒曾曰汝
世受國恩當以身許母以我爲念乃從季子岐曾
郊居而峒曾入城守龔悉出簪珥以佐軍迨峒曾
及其子演潔殉難龔謂其媳李恭人曰我有子矣
而亦有子其相勉以忠類如此未幾岐曾復以故
人亾命被執泣叩龔氏前龔謂之曰我昔欲爲下
壺母今寧不能爲孔褒母乎曰岐曾行從容赴池
水以死從死者岐曾妾劉氏劉先爲卒所得度不

能脫給之曰吾有遺金藏之河干盍就求焉卒從之及河跳而歿諸婢從死者凡數人先是龔有幼女歸太學生金德開城陷偕兄峒曾死于家園之葉池

諸生侯洵妻夏氏華亭考功允彞女讀書通大義工詞賦有智識二十一而寡氏哭踊瀕死以子縈幼僅延殘息時福邸擁立江南氏語父曰南畿時事不可爲矣盍先結廬于鄉未幾翁岐曾兄通政峒曾及子演潔殉難允彞亦自沉兩家奔命皆依氏

以居岐曾復爲故人亾命株連罹禍龔太恭人從容赴水死卽氏太姑也氏艤舟潛往棺殮兼收庶姑劉氏屍昇厝祖塋隨遣人間行求其翁屍于雲間而叔泓又被逮婦孫氏又歿于上洋氏旣力爲營救復抱其子開國撫之迨事稍平本生藐孤縈才而忽天遂棄人事入死關至壬寅以壽終貞女盛氏卽氏中表妹

生員陳輿徵妻歸氏生名賢之後字于崇楣不幸二十八而寡夫歿之後忍痛承家上事白髮之姑下

撫黃口之子支柱門庭紛揉役訟空閨籌畫歷盡
艱辛苦節四十年乃得生養死葬以婦道而兼夫
職此真安節守貞千秋倫範非矯俗輕生者所可
同日語也

生員陸履泰妻金氏前志已載康熙癸亥建坊

胡敬坪妻楊氏前志已載康熙癸亥建坊在四都戴
家浜西重字圩之墓前

尚符妻朱氏二十四歲而寡事翁虞卿極其孝敬
翁歿力舉祖翁姑及翁姑諸喪現今守節三十四

載康熙癸亥建坊

王繼曾妻陸氏十九字夫二十而寡卽斷髮茹齋終
身守志事孀姑朱氏撫幼叔繼且遇歲荒變賣釵
梳以供養苦守四十餘年康熙癸亥建坊

葛子延妻黃氏十九歲于歸二十七而夫故斷髮嚙
指誓不再醮孝舅姑育嗣子勤儉成家安葬兩代
五喪守節三十四載康熙癸亥建坊

朱伯雅妻楊氏年十八歸朱二十九而寡冰蘖志堅
辛勤操作成家孝養舅姑甘旨無缺撫育孤子皆

稱丈夫督課諸孫悉遊庠序守貞逾四十載如一日康熙癸亥建坊

沈文芝妻陸氏二十六居孀無子止一女族人常欲奪其志氏毀容截髮誓死靡他倍嘗冰蘖之苦倚壻單杭長齋繡佛現年六十二歲守貞三十六年真窮鄉苦節也康熙十六年邑侯平湖陸龍其旌表其廬額曰操同冰雪

生員潘諧妻談氏二十七歲夫亾無子止一女毀容苦守忍寒餒紡織度活一簪一珥典鬻購地塋葬

夫棺并翁姑伯姆五喪嫁女名族撫育完聚嗣兒及藐諸孤姪節而孝孝而慈女中之聖今年五十有三合例公舉候詳

儒士王佳穎妻戴氏年二十一而寡子廉生甫三月撫之成立又以天亾止遺一孫女未及期年伶仃孤苦依兄鄉飲大賓賓陽以活年八十二歲而卒邑教諭周建鼎有詩載志中嘉善通政司叅議柯聳題其墓石曰苦節

廩生汪濬之妻張氏年二十三而寡貧無子女自誓

日吾祖母王氏守貞敢忘家法手治絰以養孀姑
姑亾又辛苦以營窀穸濬之弟价迎養於家苦節
五十年如一日价欲乞旌氏曰夫亾守死婦人之
分無效世俗以挫吾志年七十有七而卒沈宮詹
荃有詩載志中

諸生王文福妻陸氏十九歲適王爲繼室二十三歲
夫亾號慟屢絕卽欲從死王之宗親力阻之家徒
四壁早夜織絰以自給辛勤荼苦經營葬三世之
喪撫前妻之子如己出苦節四十年一女適孫中

丞仲子和斗以賢孝著聞教其子致彌嚴過於慈
以母兼父皆節婦遺教也姪女王氏適潘國軻亦
十九而寡無子歸依母家守節四十餘年及病亟
語其嗣子曰吾潘氏婦也不可死于王氏其嗣迎
以歸得正而卒尤可稱雙節云

申畋妻楊氏二十八而寡撫三歲孤艇長爲儒宗不
幸中折淒風苦雨守孀六十四年壽九十一而終
嗣孫茂芳邑庠生博學能文卓有品行

蘇登明妻沈氏年二十一而寡族人逼之嫁以家貲

嘉善縣志 卷之三
盡散與之獨攜女歸母家女長適吳又早歿遺甥
吳莊食餼於庠氏得以生養死葬壽八十五而終
沈茂妻吳氏二十九喪夫撫一子文隆方十歲赤貧
紡織以養翁姑教子成立苦守冰霜者幾五十年
至七十三歲而歿文隆哀毀絕粒斷葷酒者三年
血書金經每日持誦以資冥福里隣公舉節孝屢
經旌獎

印隆泉妻張氏隆子俊伯妻秦氏皆年三十而寡皆
守貞四十年皆年七十而歿世以寡婦承家撫孤

前後事皆吻合此旌節中之至奇者知縣馬旌其
門曰一門雙節子飛隆邑庠生

陳維翰妻李氏年二十二而寡家貧姑老竭織裋以
奉菽水閭黨稱其節孝遺孤氏兄李世恩撫之成
立現年六十一歲知縣陸署縣孫俱經給扁

唐世俊妻盛氏事翁姑至孝夫病家貧脫簪珥以供
藥石病篤欲先死以明不貳夫不許及夫歿殮畢
遂自經貧無以葬族伯唐之裔素孝義憐婦節同
孫名芳捐貲葬二都康熙十五年知縣陸旌扁曰

志烈可憫

顧君穎妻駱氏素知詩書明禮義事翁姑最孝一日聞崇禎之變大哭三日作詩二首投井而死其詩云君死社稷臣死朝如何君死百官逃君知社稷臣忘節史筆嚴於三尺條江左猶堪借箸籌如何失策不宸遊偏安雖曰朝廷小卽墨何妨再火牛此一婦人也亦知君臣大義真可稱烈婦云

貞女陶氏許字王需吉需吉十八歲而夭聞訃自經母覺救甦守制母家毀粧截髮母嫂輩曲譬之終不易志一年內絕食而殞

貞女盛氏韞貞雲間名族女字侯納言季子澗未嫁澗亾命客死貞女以死自誓述懷湘賦以見志侯氏聞之迎歸偕夏姚龔三節婦營歲寒亭以居守節三十年甲寅秋卒合葬于節孝阡所著有寄笠詩文章

生員朱珣妻吳氏出自名族年十七歸朱雞鳴相勉名噪儒林氏年二十六歲夫亾止生一女痛哭欲殉賴夫世母王孺人苦勸周給存撫所生朝夕拮

嘉慶縣志 卷之三
十歲舅姑俱歿號泣幾死喪祭之事雖孀居不辭
奈患病年五十一歲疾卒親戚助殯鄉里共稱孝
節云
張文妻顧氏年二十九歲而寡因孤子受人欺凌每
欲自縊以遺孤邦寧甫三歲親戚力勸之而止飲
水自矢紡織自給苦節四十年邑人吳康侯詩曰
立孤與死孰爲難慷慨從容兩自安閨閣程嬰標
大節冰心一片照霜寒

諸生趙允淑妻封氏年二十歸趙甫二載淑苦志讀
書患瘧不起氏泣語曰君若不幸妾何難一死以
從但翁姑年邁子在襁褓未敢遽死惟有養君之
親撫君之子了君未完事爲泉下稍慰耳言訖而
夫歿遂封髮不解齒指自誓孝親教子茹荼辛苦
三十七載又經營牛眠葬親及夫年五十九而歿
趙又韓妻馬氏年二十五歲又韓死于兵亂骸骨無
存全無子女氏截髮守志歸依母兄以活歷盡艱
辛足不踰閭長齋繡佛皈依淨土以盡餘年

白戶馮琪妻林氏夫死撫孤孫永在襁褓食貧苦守三十餘年月杵霜鐘堅貞不改先有進士許自俊妹亦嫁于馮而有奇節現在候題建坊人謂馮氏世有香閨鐵漢云

俞可爵妻周氏三十而寡夫亾稍有薄業族蠹利其遺帑謀之盜魁將強劫爲妻氏聞之髮豎闔戶積薪端坐自焚白晝火光中見烈婦乘鶴飛昇而去里中遠近環聚觀之面目如生惟室廬灰燼而已邑人吳康侯有記

生員陸其資妻張氏大叅公恒之曾孫女太學生宏履之女也幼秉家訓雖生長富厚性厭羅綺年二十歸陸相敬如賓操作以佐夫力學甫九載其資病故氏卽截髮誓從死含殮甫畢閉戶自經姑管氏奔救得甦且苦諭之曰婦卽死奈姑老子幼何遂斷葷茹素砥志冰霜惟朝夕奉養其姑嚴課八齡之子廷琰勤學今補博士弟子恂恂有士行宣恩妻陸氏名門淑媛幼嫻禮教及笄歸宣年二十四歲而寡遺二子長四齡幼襁褓氏痛夫誓以死

殉三黨以撫孤力勸之因截髮毀容惟旦夕勤紡織以自給冰霜貞操歷四十年如一日孫鑣邑諸生

闕奇妻蔡氏七都蔡家行人年二十歸楊家巷闕甫七年而夫殞耕織貧民別無恒產撫一子潤宇時未數齡氏勤紡織以養子子長力耕作以養母今氏年九十一其子已老病終而氏猶善飯冰霜之操歷六十五年同鄉之人咸悉之以海隅僻壤且夫族父宗俱屬農家莫有出而頌言之者真空谷

幽芳窮鄉苦節也

趙宏昌妻王氏癸未進士泰際嫡妹也年十七歸宏昌二十七夫死毀容截髮長齋繡佛終其身志操堅苦卒年六十有四嗣子俞今中戊午舉人

趙定珍妻李氏年十五適定珍二十五夫死絕粒五日不死撫幼子得成立今五十五歲勵志如一日宗黨皆敬憚之

須凝仲妻陸氏年二十九而寡長子廷鼎年十一次子廷彙方四歲夫亾氏雖傷痛頗能以禮抑哀一

意撫孤爲主治家勤儉教子義方門庭宴如若凝
仲猶未亾也至子婚配成立而氏乃考終此節婦
之深知大義而有丈夫氣者子廷鼎割股至孝

諸生吳晝妻馬氏年二十九歲而寡夫病亾卽截髮
自誓孝養舅姑撫孤成立至六十九歲而沒四十
年苦守靈幃冰霜之擦繼美栢舟人稱貞義馬母

云

孫公姓妻黃氏太平縣訓導黃仲訥姪女夫病蠱扶
侍湯藥晝夜不寐卒不起氏年二十九號慟欲絕

舅姑慰之曰爾卽殉節遺二孤誰撫之乃勉不死
終日泣血抵暮則無聲令長子淳躬耕次子濂力
學年七十而卒從弟公胤妻張氏結縵甫歲餘夫
舌耕病卒遺孤瀨未滿期舅姑慮其家貧年少多
方奪志氏斷髮毀容以死自誓茹苦力作仰事俯
育均無遺憾年七十三而卒邑侯陸表其門曰一

金門雙節

顧讓妻張氏十八而婚二十而寡水蘖自矢苦守寒
機撫孤子問達成立孝友五十七年如一日邑令

呂給扁堅節完貞撫院韓給扁貞行可風現候題
旌以風里俗

金應昌妻龐氏二十一而寡無子女血抱叔應聘長
子垓苦無乳日以糕果飼活之後得孫有聲珍愛
倍摯又親鞠之亦飼以糕果守節六十載撫成兩
世兒孫當清明祭奠時語家衆曰明年此日我亦
與此坐矣至期果無疾而終子垓事母至孝母疾
躬親湯藥自滌污穢母沒哀毀骨立廬墓二年所
當表著以侯題旌邑侯聞給扁一門節孝

孝女黃氏父萬年病篤氏割股肉煮湯以進父病立
瘳崇禎十三年邑令龐公獎語刲股救父事出女
子爲異聞給扁旌門云閨門孝範適沈于宣倡義
賑饑曾與鄉飲

張邦瑞妻徐氏年二十九歲而寡邦瑞無子立姪廷
謨爲嗣未幾亦卒徐氏與嗣媳包氏相倚紡織以
生二氏守節皆閱三十餘年兩世堅貞允足風勵
末俗

生員戴高妻施氏丁丑進士鳳儀胞妹年二十九高

病瘵卒氏截髮毀容誓以死守乙酉六月翁戴靖
死難羅溪氏從兵燹中匍匐奔歛里人賦節孝行
以紀其事又數年而孤子歿止一幼孫煢煢相守
至六十九而歿

戴純妻朱氏二十三而寡斷髮誓死水漿不入口者
七日親族以子甫三歲而翁邁七旬力勸阻之家
酷貧紡織以活未幾翁亾喪葬盡禮繼值兵燹倚
兄廷選同避得免教子成立生五孫皆親撫之終
身孝服長齋苦節五十餘年冰堅霜潔無以踰之

殷又立妻張氏年二十四夫亾乏嗣卽欲自經以殉
因兩叔在童穉蓬首垢面自毀其容終身齋素拮
据營厝三世之喪撫育兩叔成立以翁原析之產
授之康熙三年邑令余核實詳憲給扁獎勵侯題
旌表

趙一鳳妻許氏十九歲歸趙二十七而寡子鍾秀十
七歲娶朱氏二十九而秀亾姑媳相依撫孤翼士
煢煢苦守今許氏壽七十有八朱氏年五十有二
與例相符允宜旌獎風世

嘉慶縣志 卷之三
陸怡溪妻沈氏二十而寡家徒壁立茹荼苦守撫二子嘉錫嘉銓自襁褓至成立不幸俱夭止遺孤孫拱宸勞瘁攜持得延一綫壽至六十五守貞四十五年比之李司馬祖孫邑侯劉公申憲旌獎給扁曰撥凜冰霜

須茹妻計氏年二十喪夫無子止有一女二歲翁姑老紡織以奉養生事死葬克盡孝道今已六十三歲赤貧孤苦結廬墓傍預造棺壙以待終屢經旌獎

孝廉時懋順繼妻許氏松江工科許譽卿之妹歸寧未幾懋順病亾許氏以未亾人持其門戶使子孫有姻族之和奉其蘋蘩使先代有蒸嘗之潔苦守三十載壽五十而終

副榜陳瑞徵妾王氏徵年七十五而娶者家人稱之曰句容阿娘徵病亾之日王氏哭死復甦隨即自已剗去左目不食五日而死

唐氏小大姐係松陽令唐恩曾孫女年止十歲見父唐士愷吐血數升願以身代割股救父女以股瘡

潰爛而亾蓋一極幼之女孩而能爲男子不能爲之事足以儆世勵俗志之所以勸孝也

錢密妻殷氏職方公都之孫女夫病劇對氏曰上侍老姑下撫子女母容忽也年方二十三歲矢志栢舟辛勤孝養子天絕食三日姑慰之氏曰有姑在此身未敢死復進食姑媳苦守今年五十八歲女適諸生陸斌迨姑歿與叔响負土成禮血抱响子爲嗣已經廿年其姑乃節婦曹氏也邑人稱爲雙節

錢罄妻甘氏年二十五而寡子濤方五歲辛勤織作孝養翁姑守節四十年今年六十五歲教子成立翁姑歿竭力營葬子濤亦以孝著知縣陸給扁獎之

蔡貞遇妻張氏十九歲夫亾遺孤一月氏毀容絕食誓以身殉以舅姑在族親力勸乃止斷葷衣縞七十六歲終五十六年如一日撫子紹恩亦至孝各憲旌其節

金奎妻陸氏年二十于歸至二十九奎忽患危疾氏

寢食俱廢焚香告天願以身代及歿自經求殉者
再家人勸止之截髮自誓撫孤用遠成立刻苦食
貧母慈子孝守貞三十二載年六十一而終
沈聞孝妻李氏年二十六而寡事翁姑至孝維持門
戶孤苦伶仃撫子世華成立乙酉城陷華負母而
逃有神示夢指以去路得免于難知縣余給扁獎
之

吳振寰妻沈氏夫早天青年守節撫孤在之成娶亦
早天媳沈氏亦青年守節兩世栢舟有子名璇

張欽妻萬氏有孀姑金氏爲金之禕之女同事太姑
金氏備極孝養不幸年二十四而寡遺孤源尚在
襁褓被族人凌逼奪志氏於訟堂截髮憤欲自盡
蒙前任余侯溫諭撫孤爲重氏感泣拜命而歸今
源已成立入泮與妻曹氏復能盡孝一門四世節
孝洽聞前任余給扁立節全孤見任聞旌其門曰
節孝維風

葉應登妻陸氏二十九夫亾原籍洞庭無親族可倚
氏毀容改粧勤紡績以自給教子範成立鄰家失

火延及夫棺氏撫棺號慟頃刻風返火滅範事母
至孝偶還洞庭舟人隔夜夢神語明日舟當覆須
待葉孝子至得免舟人詢而得之行至半湖風浪
大作他舟覆而此舟無恙康熙二十三年邑侯聞
給扁曰節孝爲儀

徐自明妻

張氏陳氏

贊助其夫力行孝弟生養死葬無不

竭盡其禮不幸自明中年棄世陳氏忍死持家堅
貞死節上奉衰髦之老姑下撫幼孀之二子破壁
寒機備書辛苦蓋四十年如一日也今二子皆已

成立

須世珍妻陸氏年二十二而喪厥天破壁淒風日抱
其孤對靈而啼勤紡織以度日迨子維翰成立稍
稍振復先業每食必念其夫不得同享子膳淚簌
簌然雨下苦節三十有五載里人以爲母範

陳宏文妻錢氏鄉飲賓錢師達之女也翁喪姑孀年
甫十四于歸宏文住居三都十九歲喪夫止一子
方三歲卽欲自殉從夫于地下姑吳氏泣謂曰兩
世孤孀止存一脉氏感泣下拜矢志栢舟奉姑撫


子辛勤操作克孝克慈前稱中落後漸素封復所
棄之產及姑歿喪葬盡禮凜然有丈夫氣槩至五
十一歲而歿守貞三十三年如一日子振先善承
母志里黨中稱曰一門節孝

朱月賓妻樊氏年十六于歸二十七而寡苦守冰霜
生子三人皆得成立今年六十有八堅節者四十
年繡佛長齋子媳咸能盡孝里黨咸稱之
須王臣妻趙氏賢明貞順年十八而歸須二十一而
寡子仁方三歲氏辛勤操作以鞠成之苦守五十

餘年有丈夫風媳張氏四維之女事姑至孝一日
趙病危篤張割股以進姑病立愈人稱一門節孝
李元素妻張氏制性幽閒舉止端淑年十八歸李十
九而夫亾矢誓栢舟隨削髮爲尼茹齋奉佛上無
翁姑父母下無伯叔兄弟辛勤紡織聊以自食苦
守二十餘年怡然而逝邑人唐之義有張節婦歌
彭侍御七代孫廷獻妻黃氏敬渠之女年二十二而
夫沒翁姑早喪存幼叔廷芳廷雋尚在襁褓氏顧
復之無異親生而兩叔又天惟廷雋遺腹一子呼

嘉定縣志 卷之三 列女
之曰幸延名紹曾教養成人上以延侍御一脉皆
寡婦之功也壽五十四而終

金南藩妻龐氏事姑龐氏至孝姑病親奉湯藥寢食
俱廢額天願以身代沉頓數月氏勞瘁憂苦忽歐
血數升而殞子生員金模夢神語之曰上帝以汝
祖母茹齋繡佛且有孝婦得延壽八載矣病尋愈
俞養吾妻王氏年二十而夫故生子未週矢志不嫁
辛勤茶苦上事舅姑生養死葬下撫孤子成立成
家年七十三而終



潛德

闕用礪字季貞苦志力學教授弟子家雖貧事親必
極甘旨母常患痢躬侍藥餌衣不解帶母性好潔
家中乏婢滌除穢器及汚染裏衣用礪皆手自浣
濯三兄二姊奉之惟謹次姊適毛氏冬月單衣擦
作用礪解已綿衣進之姊恐其受寒却之乃故作
不寒狀且云壯年耐冷家有他衣其實禦寒惟此
特詭辭以慰其姊也子選戊戌科進士崑山葉文
敏公銘其墓

嘉定縣志 卷之三
戴亮字采臣天才穎發年十三補郡博士弟子從吳
門錢吉士揀選政紙貴海內伍試場屋不利卽潛
心古學性篤孝客游江右聞其母訃慟哭立別主
人於大江中不畏風波兼程而返徒跣入門撫棺
慟絕刻其母像朝夕上饌必涕泣不輟康熙甲寅
客京師適
詔京朝大臣薦舉邊地人材海寧陳少宰鼓永業草
奏欲以亮名上力辭不就此又其高節之過人者
所著有惕菴文集子鑑有才名登選籍

徐麟定字宗題禮部尚書學謨之曾孫年少遊邑庠
時名甚噪受經婁東張西銘先生之門雖生長富
貴賦性醇謹口必擇言行必矩步事王節母倍極
孝養至老彌篤母病時非其口嘗之藥弗進生平
不入公府惟以讀書種德爲務始恂恂篤行君子
也嗣子錫葉太學生

錢瑜字純甫吳越武肅王之裔少居貧廢書習貿遷
化居之業未數年累致千金性仁厚不以財自殖
遇里黨中有緩急力應之恐後教子弟方嚴有儒

者家法胸有經濟凡邑中農田水利興革諸大事
邑大夫每虛懷諮訪舉鄉飲賓力辭不赴子嚙例
貢生

程嘉賓字孔昭原籍徽州業醴於邑孝友天植撫弟
姪成立者十餘人性好濟困扶危曾有僕在浙中
病篤垂斃同伴咸思棄之嘉賓獨挈之歸調治得
活他如貧不能婚者助其資凶不能斂者施其輓
待以舉火者不可枚舉康熙辛亥邑大荒捐米二
百石煑粥救饑全活甚衆次年長子遠以春秋中

江南鄉試人以爲種德之報邑侯陸公龍其舉鄉
飲大賓

徐士亮字公采賦性孝友年未數齡伯父允壽無子
撫之爲嗣已婚娶遊庠壽年已邁其房婢生一子
雍後伯父病篤已彌留不成語指雍而張目視亮
亮卽喻其意撫心設誓曰決不分弟一錢壽目遽
瞑資產三千餘金後果一無染指奉侍本生父盡
色養胞兄某嗜酒廢家早歿亮捐已貲贍其嫂姪
其撫惜雍倍極肫至邑大夫舉鄉飲大賓子匡登

乙卯賢書

顏聞宗字承三復聖裔瓌姿豐幹性度豁如有喬某者負聞宗財數百金後不能理聞宗呼之至焚券慰去其子姓尸祝到今述之泣下崇禎辛巳歲邑大稔米價騰涌聞宗散千有餘石減價平糶人賴以活者無算司李當湖倪公長珩重其義延禮其子儀遂成文字之知後陸公龍其蒞任素聞其行誼凡邑之大事必諮及焉與語移日嘗謂人曰顏儀真正氣人不愧家風恨相見之晚矣舉鄉飲賓

孫監貢生鑄鑣俱以文章書法名世

本收

唐之裔字一如事後母至孝雖衣蘆履霜歷盡茶苦

必竭力供奉異母弟幼撫之勝若已子後成家故

明解南北運家幾廢不以累弟歲荒賑濟多人偶

過茗水拾遺金百兩俟其人還之後葬故人楊華

更敦麥舟之誼歷舉鄉飲固辭壽登耄耄四世一

堂孫名芳辛酉中武科

郁所志字竟成性孝友業儒不就寄業陶猗間壬午

歲大稔與弟無文煮粥賑濟更減價糶米全活多

人親族婚喪必厚贈乙酉城潰妻鄒氏殉難于蔚園之後池逾四十日事平覓得之面不改色志沒里人感其義子永亮永脩孫琛琳俱邑庠生

顧際虞字來陽童少時已有成人之志端靜溫知者知爲令器長而能文聲蜚黌序間屢試棘闈數奇不售後以子岱貴棄去帖括博覽天文地理星曆醫藥百氏之書無不探其精奧尤善撫琴每當月明人靜聲冷冷出戶外秉性清約羞與時俗馳逐名利惠溥鄉邑而不形于色遠近俱稱爲長者

累舉鄉飲大賓屢膺封誥

朱洪基字爾開邑諸生至性純篤承家養志不以瑣事累其父幼失恃事後母至孝如其所生尤極友愛其弟人稱爲朱閔子平日輕財好施樂善不倦活奉吾之病母贖欽甫之艾妻出資以償勢家捐金而救孕婦飯僧屬寒月收掩遺骸買妓歸秀峰榮膺恤典其爲種種陰德馨傳人口上格蒼天里老臚其隱德數條傳世班班可考也子元裕辛丑進士孫文龍乙卯鄉薦諸孫蒸蒸鵲起正未有涯

人以爲沛國氏世積陰功食報果不爽云

顧履正字坦公藝苑鴻儒文章爾雅久餽輪貢七應
京兆試不售設館授經門下士知名者甚衆比之
河汾風教爲人敦孝弟重信義爲前任陸公崇禮
給扁德振儒林馬公延請賓飲給扁名世嘉賓鄉
士大夫莫不奉爲師表稱有潛確之德云

李正義字中宜原籍新安寓居邑之真如性至孝割
股療母疾一日往蕪湖于旅舍中得遺金百餘兩
候至三日有浙客倉皇至還之客爲泣謝語之曰

爾金我還何謝之有甲申年饑民載道散給米糧
疫死遺骸出資收殮國初隨征授都司管江寧
撫院旗鼓事生三子長嘉猷丙辰進士次棫辛丑
貢士季嘉譽邑庠生孫壻彭定求丙辰會狀人以
爲積德之報云

徐名吳字非聞碩德經師生而魁梧美鬚髯端凝和
易與人交未嘗有忤色與其子學鄴皆食餼于庠
皆坐臯比教授弟子邑中知名之士多出其門父
子皆有文名每試棘闈人皆期以冲舉乃試輒顛

蹶名吳僅以明經貢大廷歸與歲寒老友優游林
水兩舉鄉飲大賓享年八十有六學鄴不幸以逋
案呈誤見抑于功令遂隱于堪輿之學馳名江
左鬱伊不得志而沒尤可傷也

陸振宇字君立世居邑之槎溪寧晉令愉之裔孫有
隱德崇禎十四年蠲米賑饑全活甚衆貧人死者
施之以槎嘗捐厚貲修築堤路行旅便之年六十
時悉焚篋中貸券崑山陳溪民有重逋以訟廢家
不能償更貸之金其家復振子沈暘廩生補貢以

詩文鳴於時

陸邦里字仰溪本槎溪著族至邦里而滋大器局魁
英笑言不苟性至孝友割股以療親疾捐金以助
兄婚析居以益弟產恤姊以慰母心設塾以誨子
姓五舉鄉飲壽至大耋子士元字長卿孝友一如
其父而倜儻好義尤爲傑出鼎革時兵馬經臨南
翔主帥欲縱兵焚掠士元破產供餉一方得以保
全舉茂才分督工部機務有功子其賢登順治丁

西鄉書

汪鳳來字于梧洞達事理智料如神邑中鹺務皆倚
賴爲之運籌輕財好義振人之貧濟人之難惟恐
不及乙巳歲大饑邑令余公敏四門設賑局鳳來
捐貲獨主東路建廠於集仙宮部署有方經營罔
缺四境饑民皆奔赴之全活者數萬口長子杰治
一圃以娛親遠客至止者多館餐其家義聲扇于
海內年七十五無病而終子四人仲熹丙辰科武
進士

未收

孫公普字仲涵孝友仁慈出于至性父承讚諸生食
貧臨終以不克葬親爲恨沒後公普竭厯營窀穸
墓成止容五穴讓兩叔與兄而已不與奉事寡母
與妻鄒孝養不匱母或至弟公遜家就膳本極豐
腆若公普偶有甘旨鄒必留之以進易簣時呼語
之曰願汝子孫皆似汝夫婦孝敬適吾意矣兄公
姓力學早世遺孤濂衣食教誨與已子澄一體撫
育遊庠成立而後已至于濟人之貧急人之難里
中紛呶輒爲調解有陳太丘之遺風焉屢舉上嘉
二邑鄉飲人皆以爲祭酒

科考表
並考其
名若你
考公上
未詳籍

陳世垵字維之巴丑進士儒之孫丙午經魁嘉猷之
子有氣幹聲如洪鐘好學嗜古以諸生入太學與
兄世垵讀書于玉峰世垵登庚戌進士仕至長蘆
巡鹽世垵爲貴介公子絕無執袴風慷慨仗義輕
財好施族有逋糧而逃者拘攝甚急累及妻孥世
垵爲之清虛田賸積逋不下千餘金里黨稱其盛
德壬午拔監貢授瓊山知縣以國變未任累舉鄉
飲大賓生十一子前後皆天止存第五子碩中甲
午副車特恩准貢馮大司成拔取監元文聲大著

唐敏學字孟博庠生秉姿正直不附炎熱性好蒔花
種菊啜茗焚香縉紳先生咸敬禮之妻東王文肅
公每至邑候叔達先生必造敏學廬長談以文章
道義相期許事父至孝父愛庶出之子所居樓房
精室珍異玩好俱分授之敏學絕無片言與邑令
來公相善因出其六世祖恕齋公原病集求其刊
刻來公遂授之梓大行于世生四子懋儒懋倣懋
俊懋偉並爲鴻儒孫頤丙辰恩貢羅俊博士弟子
瞿守誠字慎所性至孝家雖貧乏與妻俞氏必飾爲

寬裕以悅親課子讀書達旦不倦明季歲稔饑困
路拾遺金竝還其人順治壬辰舉鄉飲賓以子士
睿覃恩贈文林郎士睿爲守誠長子字智先以外
祖俞姓入泮由明經授廣西岑溪縣知縣時值兵
燹初平士睿招集開墾增歲額三之一且糴穀賑
饑捐俸修塘以利民徃人有負固者多方開諭悉
輸稅歸誠其功最鉅事載岑溪名宦集中弟士雍
士賡皆有聲黌序間

曹元嘏字承祉世居周公村長齋繡佛力行善事里
黨有窮乏者濟之親故有患難者拯之凡傾圮之
橋梁險危之道路罔不捐金脩築此誠一國之善
士也天祐厥德年躋九齡兩舉鄉飲上賓孫錫命
中壬戌科武進士

顧允昌字文紹一生積有善行輕財好施喜與人排
難解紛邑之西郊望仙橋一鄉之民無不感頌尤
喜讀書延名師訓子賓王康熙九年鄉貢士

沈尊字達三御史陽之孫爲人伉直不苟取與性至
孝與妻汪氏竭力以事母同產兄弟有三人而生

嘉慶縣志 卷之三
養死葬皆尊獨任迨兄弟沒貧不能殮亦尊爲之
營厝縉紳先生多稱之

陳尚仁字壽之偕室金氏竭力孝養父國珍患蠱三
載仁每夕拜禱願以身代夢神授藥而愈崇禎辛
巳傾貲濟貧全活甚衆生平不惜已帑爲人排難
未嘗有德色兩舉鄉飲賓身歿竟日復甦述冥司
言汝一生無過可還生勸世叮嚀其子力行善事
怡然而終子範遊拜次子有常登選籍孫經綬綸
縉曾孫煥三世兄弟同居知縣聞給扁令德孝恭

申荃芳字澹尹號純菴文學素著有經世才嘉定永
折漕糧崇禎十四年忽奉文改兌舉邑惶駭荃芳
偕張鴻磐赴闕陳奏得以復折後乃歸隱于鄉耕
讀營葬累世之喪教子成名子毓來明經考選教
習修來監貢考授州同知

張濬字哲森原籍新安以父式之業醮于嘉遂家焉
所遺田產皆美悉以分散宗黨濬爲人慷慨厚
重所與遊無論疎戚莫不藹然相親人有求其緩
急者無不應邑遇灾荒煮糜賑飢全活甚衆素抱

經濟才不克大展當代名公卿咸器重之

隱逸

朱纓字清父神清貌古中懷介節友人乘其醉扃妓於室試之弗爲動拾路遺五十金亟追還其人嘗忤令弇州王先生爲言之令愧失賢士追禮之宗藩徽王聞名致聘纓辭不往後王竟坐法廢識者服其先見書工小篆行草畫出入宋元性嗜酒寄情鏤刻幾奪化工有求者靳弗與惟酒家能得之沛國朱令署其門曰練水逸民所著有小松詩稿已上一傳原載韓志者趙志偶遺今仍補錄

嘉慶縣志 卷之三
陸時隆字道協邑諸生文詞高瞻尤精易義鼎革後
屏居學圃以詩文自娛蓬蒿滿徑不減張仲蔚之
風其所著述甚富有郭亭樂府道類函乙酉紀事
發潛錄若干卷

唐亮工字惟時邑諸生家世習賈亮工獨奮志讀書
刻苦勵行尤潛心易學屢赴京兆試不遇鼎革後
卽絕意進取以教授生徒爲事藉館穀以孝養二
親出其門者大都文章行誼之士其聖門西河氏
之流亞歟

侯沔字記原給諫震暘孫通政峒曾弟岐曾之子中
順天壬午副榜少質敏好學博極羣書尤究心經
術崇禎壬午邑有復漕事沔同張鴻磐伏闕得仍
永折甲申後絕意仕進學使者張公能鱗以高士
旌其廬通政故第爲里猾竄作神廟沔力復爲上
谷宗祠康熙癸丑同修邑志以水利與折漕相表
裏遂獨在焉繪圖著說瞭若指掌平生孤立行一
意不求諧俗屏跡園居日取古人詩文之同類而
異屬者句籀字比鈎致之使珠聯璧合讀者擊節

殆砥行篤學之士歟所著有學古十函學易折衷
月蟬筆露秬園集友人宋實穎繆彤等私謚潛確
孫和斗字九野中丞元化仲子篤于孝友乙酉城陷
弟諸生和京夫婦死難和斗與兄和鼎謝去諸生
埋名著書不關世務中丞部將皆爲侯王延致之
禮以上賓或諷以仕輒不應辭歸食貧偕隱泊如
也至于經理侯銀臺之家事脫陳黃門之遺孤尤
當于古人中求之兄弟著述甚富藏之家塾子致
彌以太學生特召陪使朝鮮戊午舉順天賢書

李春暉字二華爲人孝友肫篤有古人風幼嗜學攻
博士家言試有司不遇遂隱于邑之新涇里教授
生徒非忠信之言勿道非禮義之行勿行守紫陽
主敬之學廣教及門如諸生錢迥宣蓋蘇晉陸元
輔輩而元輔以理學名世歿後門人謚曰貞介先
生

殷開之字長文邑諸生職方公都長子閉戶讀書絕
無統袴風雷學士思需爲職方門人授以要津劄
遜謝之贈以百金亦辭不受其志節有足尚者所

著有德徵錄子登乙酉代父死於亂兵

沈宏祖字彥深高才博學與金壇婁東並主文壇邑
有大事有司咸往顧問崇禎朝以永折事叩閣稿
出其手得以俞允遇歲荒糶給官米有司令宏祖
主之民得實惠平生具經濟才當軸將爲舉薦宏
祖不樂榮仕力謝之高隱以沒子承祐己卯武科
談允厚字厚君爲陳侯一元拔冠童子科最賞愛之
性高潔不輕進謁每有贈遺皆却不受嚴承思先
生字之以妹兩試秋闈不售卽棄去日與承思先

生同補資治通鑑五百卷子瀟邑庠生孫羽豐廩
生善屬文

顧予謙字仙隱先世居吳門因父愛邑之薯蕷并各
種筍遂治圃於白鶴村家焉童時聰敏能文逾壯
遊庠乙酉卽謝去舉子業與同里浦飛霞相唱和
性遠榮勢不設城府郡城同祖兄弟小阮兼山貴
顯至吏部足跡不至若平交索書有酒相呼雖十
旬亦弗輟晚年于書法尤精逼近鍾王尺幅爲人
什襲年八十一無病而逝

趙克聲字芳尹性孝友好讀書弱冠卽見知於邑侯
卓公期其命中遊庠後日與侯雍瞻黃陶菴遊講
藝不輟賓興五次輒嘆數奇長子允淑能讀父書
早夭遂棄舉子業日坐臥一小樓以圖書萬卷自
娛王研存許潛壺諸公時與問月尋花相爲酬唱
有過而問奇者與之講解疊疊不倦人稱之爲指
迷先生三舉鄉飲固辭所著有寶書樓文集

汪彥隨字子肩工部營繕司員外明際子也明際廉
寇工曹居不數椽有樓曰塾巾向爲婁李諸先生

游憇地令彥隨讀書其中屢試京兆中癸酉副車
明際寃杖于廷試不當罪彥隨痛心嘔血匍匐數
千里扶櫬歸里棄其所居數椽并所爲塾巾樓者
營窀穸於振武門外終身廬墓以處焉鼎革後足
不入城市衣冠不爲時制武林嚴忍公其父行也
過西子湖必相存問講通問禮及忍公子沆貴爲
副憲同至嚶彥隨辭以疾卒不相見族兄灑武林
名孝廉也雅相善灑有姪某嘗爲郡司馬按部至
邑彥隨望見輿蓋走匿不出有冒彥隨乞請司馬

者受其賜百金彥隨亦不之問其志行高潔如此
讀古之暇兼工畫理入米顛倪迂之室人目之爲
畫隱年七十餘卒子來許孫嘉禾皆有文名

馬舒字應之簡堂先生之子少承家學博洽羣書爲
當年復社眉目鼎革之後絕意進取屏居荒村資
硯田以糊口工於古文辭癸丑聘修邑志成今癸
亥復預補修痞疾大作竟不復竣事而沒士論傷
之

龔元侃字得和未弱冠爲諸生以父用圓伯父用廣
其兄弟死忠與兄元昉隱居不出讀書自娛博通載
籍理學淵邃從游者皆名士方之於古有幼安元
亮之風焉有詩四卷文二卷名曰隨齋自怡集死
誠其羣從及諸子曰吾家詩書清白四百餘年雖
貧母改操也門人謚之曰孝節先生

張應選字伯英一生好道矢志潛修終身食貧不求
聞達教授六十餘年生徒數百蕭然半畝之宮栽
花玩古以養天年今年九十餘猶能飲酒一石不
醉笑語不啻嬰兒人稱之爲膠水地仙

蘇震字長侯讀書慕古受業于黃陶菴先生講德論文甚爲師門稱許父母有疾衣不解帶至爲嘗糞事其兄嫂如事父母赴友之急不啻己身卽有負心反噬者亦不之校尤好吟咏甲申以後隱居考槃與寓客陳瑚馬萬諸士儼及同邑陸勁節沈卜琦盛萬紀陸元輔輩結東臯社花晨月夕以觴咏爲娛或出游名勝必窮覽其勝賦詩紀之所著詩草藏于家

吳屯侯字符奇爲人有才智以管葛自期少習韜鈴曾入武闈獲雋棄去爲諸生食餼于庠以逋案罣誤又棄去日從事於詩古文辭英新雋美掉鞅古人自定其稿止存有韻之作餘悉焚之

金肇泰字來瞻爲人有德量平日不譏議人人之以謔詞至者一笑領之爲諸生需次當貢讓之老友不意次年卽以逋案罣誤竟不得入對 大廷終身無怨言至于能詩善畫其餘事也

李更字剩齋性不羈喜諧謔髮未燥卽學爲歌詩眉道人一見驚異稱爲後來之雋受學於孟陽叔達

嘉定縣志 卷之三 三十五
兩先生遂得詩家精髓掉鞅三唐日與邑之高流
酣遊于酒壇花肆之間嘯咏自得其於富貴利達
視之泊如也

流寓

王逢字原吉江陰人才氣俊逸雅負時望臺府交辟
皆不就遭世搶攘僑居吳淞江上與邑人士以吟
咏相往還所著有梧溪集

已上一傳原載韓志者趙志偶遺今仍補錄

馬萬字士延吳之長洲人少爲諸生鼎革後卽棄制
舉業教授生徒俸薄不足以供饘粥嘗帶索行遊
三旬九食不爲病也博學能文章尤邃于辭賦與
陸菊隱陸郭亭侯柅園侯掌亭輩相善酬唱獨多

嘉定縣志 卷之三
若遇系心友信宿過從不求去稍不當意卽肅具
酒食不能強之一飯歲嘗大饑邑令余公以石米
遺之萬謝曰我非翳桑餓人他日無以相報不敢
食侯粟也卒不受其耿介如此所著有詩論風人
稿樂府旃檀閣詩話若干卷

陳瑚字言夏太倉州人中壬午經魁公車南旋卽遭
世變隱居蔚村絕足不入城後挈妻子來寓邑之
東郊聚徒講學者數年稍暇則飲酒賦詩邑令高
其品或有贈遺概却弗受雖在棚人廣坐中絕口
不談當世事歿後崇祀太倉鄉賢祠門人私謚曰
安道先生所著有確菴文集聖學入門書念三吳
水利作開江等書

諸士儼字莊甫崑山人少有才華時名甚噪國變後
卽棄青衫遷居嘉定非其館穀所入一介不取課
徒之暇日惟誦詩讀書尤潛心理學前邑令陸稼
書先生造其廬相與反覆講論移日所著有勤齋
考道日錄語錄四卷

畢尚相字良輔原籍休寧業醴於邑樂與賢士大夫

嘉定縣志 卷之三
遊平日孝於親敬兄友弟撫四孤姪如已出宗黨
生無以養者飼之死無以殮者葬之遇凶年爲糜
活饑人尚相雖寓膠行誼可以風膠俗嗣子大光
杭州府學生

董宏孺字君升華亭人性篤孝父中行明壬戌進士
官工部郎中以忤璫被逮宏孺徒步行三千里隨
侍人都父下詔獄人俱畏禍莫有言其寃者宏孺
常號哭長安街訴其父寃抑狀至性動人有暗爲
申救者得減死坐配考終林泉皆宏孺之力也在

明季時曾官山東藩幕

本朝初年豫王委諭崇明邑侯陸舉鄉飲大賓以壽
終子德華博學能文有聲嘉庠

夏澄字來玉青浦人贅於邑安亭之張原曜家翁壻
連床讀古自相酬唱詩古文辭皆造其巔性好遊
轍迹所至當道多延致之不幸短折原曜有哭壻
詩數十章爲士林所歎誦

李中梓字士材松江府人以明經對大廷太史沈繹
堂秦對巖皆其入室弟子中年精岐黃之術舟車

絡紉其門順治庚寅新安戴元龍僑居槎溪邁奇疾厚禮幣迎之下一劑霍然而起因是流寓于鎮者數載從遊如戴文庶吳蹈凡輩皆得其心傳所著有願生微論醫宗必讀本草通元診家正眼傷寒括要病機沙篆等書行世

俞慈成字心齋浙西人篤學砥行負經濟才明季大臣薦舉入都見事不可爲託病歸未幾而京師淪陷遂變姓名來江南寓邑之莊溪雖簞瓢不繼故舊貴顯者招之輒拒不往遇君親忌辰終日哭泣

絕飲食病篤謂其子曰我上無以報君親下無以酬知己我死勿返祖宗墓勿刻詩文集我目瞑矣年六十四卒學者稱爲甲申先生子嘉客性至孝工詩古文窮而有守識者謂慈成有子云

仙釋

清柱字天立傳臨濟宗風結菴邑之西城工詩得皎然句法無蔬笋氣與邑之名流煮茗清談終日酬唱著有非菴詩草

慧默號溼寂南翔白鶴寺僧出吳興舊俗寺創自隋

朝基方圓數十畝前代俱不起科 國初丈量各
寺院白鶴寺在起科之中寺僧束手默獨毅然具
呈各憲得奉詳免其大殿歲久就圯默辛勤募助
歷三載得復鼎新

恒達戒律精嚴朝夕焚修任持西隱崇禎元年大殿
火虔募重建又捐鉢貲自建華嚴閣裝塑檀香佛
像壽七十有二無疾而逝

超洪字解三俗姓葛生前一夕母夢一天星宿墜于
庭兒時喜爲比丘裝成童祝髮于白鶴寺朝五臺

山山陰胡少宰慕其道風延請閱藏閉關十載傳
大博和尚拂開堂京師圓教寺 裕親王手書禪
心印月四字顏其座

超聖號野叟戒行精嚴刺血書經口無完舌叅證了
悟受拂於玉林和尚於邑之西門外創建普濟禪
院康熙十一年大旱刲胸前肉禱於神廟應時雨
澍僧臘五十六謂其徒文峰蘊虛曰吾將去矣絕
粒十餘日自起盥洗禮佛云遲我廿年再來遂端
坐龕中跏趺而逝

成蔭字僧本得法于龍華雲老和尚恒爲人施食召
致鬼物屢有靈響曾振錫陽城結廬斜堰後乃終
老於安亭之草深菴自置山田三十餘畝付囑首
座正傳世守耕食弘闡祖風日與詩友張原曜輩
卽景唱酬詩極新雋有皎然齊已風味著有離鉤
集也云草

方技

譚友文字士元精陰陽家術仕元官朝散大夫判太
史局居官清謹雖在閒曹不以干請自潤時論重

之

唐欽訓字道術至性孝友好左氏老莊常言多藏好
奪天之所惡自遠于禮耻辱及之往來公卿間未
嘗有游詞佞笑所至見重不獨以醫而已

已上二傳原載韓志者趙志偶遺今仍補錄

沈聞典字寧菴幼習舉子業不就學岐黃之術早夜
探索不數年其術稱神爲人忠厚端恪一以濟人
爲事雖單門小姓急而叩之無不立赴服其藥者
一劑而愈所著有醫學要津

俞琳字林仲性忼直遇不平事面折不少避平生有
清操見金不取中年邃心堪輿精究諸家輿旨作
地理摘抄若干卷兼通壬竒選擇之學祖深字養
樗父都字伯華兩世隱德不能通顯琳于歲時懸
像痛念之輒爲流涕子堅以岐黃行世

秦世進字繼越業儒好搜致竒書得外科真傳以術
名世見人貧病輒施藥餌了無倦色子銜克繼父
業

陸曜字君揚以字行貌寢陋好爲滑稽之談少工協

未收

律能假三絃作轉關護索吳兒好爲新聲婉媚動
人君揚獨得古譜嗾牙吐納悉中宮徵初爲吳兒
所笑後遊歷四方曲師爭慕效之遂稱絕唱所至
輒有投贈動盈行篋山左宋荔裳琬贈詩四章其
三日曾陪鐵笛宴寧王吹落梅花滿御床幾度淒
涼春草碧不堪重過鬪雞坊時君揚年且七十尚
能作遏雲響琬蓋紀其少壯遊歷晚復客燕有欲
隸之太常而不得者故以開元遺事况之南浙間
北面君揚者不可計數君揚沒其傳遂絕人比之

廣陵散云

朱伯驤字元逸窮研經學以不得志棄去耑治岐黃之術遇異人秘授時值大疫伯驤救劑卽甦而不責報爲人謙恭正直以孝友傳家恪守紫陽家訓世稱儒醫云孫祥發以縣學生入國學考授州別駕

湯哲字濬冲邑之婁塘里人爲邑弟子員尚氣節好施與精鑒古玩書畫尤工筆墨曾受知於邑侯四明謝公銅仁萬公遭世不偶僑寓吳門之虎阜自

稱愚谷道人往來俱四方知名士窮研醫術爲時所宗所著有醫學淵珠傷寒心鏡證治問答天花秘集等書郡人姚佺沈顥嶺南陳鑑爲之序後以疾歸終老於鄉自爲墓誌有詩文雜稿八卷舊雨贈言二卷藏於家其子貞亦以醫世其業

儒醫金印字承齋世居邑之黃渡生平實行善事由黃渡至安亭凡十一石橋皆印捐貲獨建按院王旌其廬曰善行邑侯卓給扁碩德鄉賓精於盧扁之術凡經療治無不立瘳志在濟人未嘗計謝雖

嘉定縣志卷之三
四三
葑屋貧民來懇診視必急趨之姪孫南蓀字九韶能嗣其傳邑侯張給扁海邦國手凡邑之稱世醫者必指儒籍金氏云

吳通字海嵐寓居邑之白鶴江性高介博通諸子百家之書精於星學言禍福多奇中常拾遺金數十兩俟其人來還之自言當於某日卒至期果然

印之玉字仲連博通典籍長于古隸邑中寺宇園亭篆額多出其手弟之章精工楷書子長年言行有古人風書法遒勁無異前人



嘉邑布縷行於京省斜織花紋則又機女巧思家
常之翠氍毹也狀類於絨可以贄遠揚州之貢厥
筐織貝今布爲雜文亦貝文之遺他郡邑治絲辟
泉爲功省而利倍之嚠孱邑也而民病矣

嚠偏海涖土鹵民斃自黃嫗之傳業習花布以營生
車軋而吐雲裊裊弓彈而霏雪騰騰比戶緝紡繅之
具連村札機杼之聲漿紗行於本境刷線達於京師
早夜投梭而不歇奇寒盛暑之莫知計一日之停作
惟執爨與乳兒積錙銖以完課易升斗以療饑念婦

人之欲苦較田畷而更疲若夫所謂斜紋者乃女紅
之巧製而梭布之名珍絮羅以密絨纂而純毛比氍
毹之茸毳紋如剡錦之組紉或爲水波之輕蹙或爲
勝子之精勻或撻紫花以標素或染茜色以浮春土
人筐而餉客莫不詫以絕倫他如藥斑一種青白文
稠花鳥人物錯采糾繆雖非佳品輒得貴酬近爲繭
布以亂繭紬此又好奇之過而作僞之尤者與

黃草鞋賦

草屨所在有之纂組之工未有如邑之新涇者涼

履尤佳夏葛冬皮古人所爲稱也比屋男婦童而習之暮成一絢朝而易粟其利與紡織等齊人謂草履曰屣說文曰鞮草履今售之四方標曰嘉定草鞋詩糾糾葛屨可以履霜魏人之遺也與

覽茲黃草之鞋不過村人之跡庶人草而貴人絲八月韋而十月帛隨時貨之而咸宜循分服之而無斃無煩度足而裁自可稱量以易蒲鞞曾爲國主所歆苾屨不爲朝士所斥編之最精堅緻圓澤不用飾以青絢安事緣夫赤纒丹豹之納爲虛朱蠙之綴非實

勝於躡蕭琛之靴何必蠟阮孚之屐可以奉野處之高流可以餉遠方之韻客疑爲桃椎居士之所紉不啻於陵仲子之所織此葛屨雖刺於魏人而屣屨可供於齊國也

盆樹賦

剪剔數十年而成一樹高不滿尺勢且干霄有森挺者有偃曲者必仿古畫聖筆意綴以拳石奇章氏之所癖也售之好事者一盆可得百金之值或曰侈矣應之曰供之几案間梁園唐圃吾臥游焉

耳矣

惟盆樹之清森綴小景其洵美擇初枿之良材施化工之妙技常剪縛其條枚時修剔其肌理高不越乎數寸大不踰乎一指挺百歲之貞蕤極離奇而恠詭縮鄧林於目前倪咫尺而萬里逞丘壑於胸中疊磊砢之齒齒圍秀峙之巉剛勢互折而層累栽之白石之嘉盆更覺林巒之旖旎爲度閣兮朱欄可撥置於棊几蓋其布置之精能殆於古繪乎窮討或摹顛米之淡幽或仿迂倪之寒老依稀北苑之筆精髮髯大癡之墨寶真同畫聖之奇觀詎止圃師之纖巧化芥子爲須彌收金身於莖草泛竹葉而遊寰瀛處壺中而閱天表卽此幻成小洞天無勞遠出尋蓬島

竹筆斗賦

朱氏竹刻疑於鬼工當日不輕奏刀或經年而成一器意主名世非牟利也今好古家所藏且爲連城璧矣後之邯鄲三松者以仰衣食江河日下廣陵散遂以不傳嗚呼一藝之精其名不滅如王叔楚之草蟲江闡宇之說書陸君揚之絃索皆吾邑

傳人何獨三松以雕刻擅長哉文章爾雅熙甫常宗而後稱嘉定爲得正傳抑又可懷矣竹刻之器皆稱絕筆斗尤爲通俗

聞夫竹之爲物徵用實繁爰伐材於渭畝每採植於淇園孝武置榭兮障河之勢伶倫截筩兮吹律之元至於後世爲簞爲筥爲竿爲篴魚筥舄米箒食邊編箬覆艇織笆樹垣籬篠笈箸不可究殫製爲筆斗實礪劊聞匠心緯思鏤剔精勻奏刀運腕疑於鬼神學士家供之以爲翫好事者襲之而如珍侍從文房

兮茶鐺酒杓追陪清几兮香鼎花尊龍劑之函兮作伴鳳珠之匣兮同羣架珊瑚之床兮近俗飾青鏤之管兮奚文獨取素節以精劃兮宛若天生寶器而無雕琢刻畫之痕

天竹子賦

窓前無天竹里人以爲不韻密而攢大如斗色正赤垂其首賞鑿家曰有數種鬼面者佳喜其怪而醜也眉端鼻正稠人焉也矣

爾其赫如火然是名天燭藹藹其枝乃題爲竹維膠

之陽畦滿青郁子結離離斗大而簇鶉火之耀陽燧
之精炎艷兮吐燄渥赭兮含英如琥珀製就如珊瑚
琢成結星毬兮光爛串牟珠兮質熒茱萸囊兮雜佩
琉璃碗兮長擎燭龍銜兮晃采鮫人泣兮蕤晶乃若
羣卉旣零艷生寒臘紅杏羞花朱楓妒葉搖荔枝之
婀娜攢萍實之檀欒榴坼房而迸粒櫻罨樹而綴丸
茸鷄冠而獻赤秀鶴頂以流丹猩猩好醉兮膚割杜
宇思歸兮啼殘又如額間施的唇上凝脂淚成冰兮
妃子草變色兮虞姬摘鳳仙兮染纖甲搗守宮兮驗
香肌研朱點易兮灼灼取豆記曲兮纍纍洵奇形之
難狀慙曲說之無稽

松子菊花賦

東吳向稱菊藪好事者必問種嘉定其藝植之法
非他州邑所能及菊以晚爲貴謂之青葉細種剪
絨松子其魁也一本有值數金者售之人明春發
二芽必以一還本主其貴重可知矣剪絨今不可
得雖有小紫水白二種要亦松子之管放者非真
剪絨也凡花皆有蟲而菊爲甚菊君子花也蟲共

嘉定縣志 卷之四
賊之也必矣賊枝者黑蚰賊根者土蚓賊葉者象
幹黑色者菊虎癩頭者菊蟻菊花主人終日培養
灌泉壅土所不待言而去蟲其急務勞苦經年僅
供秋末一時之翫人以爲癡單父花師湘子花仙
錢仁傑花精孫惟信花翁汝陽王璉花奴蘇直花
太醫魏夫人弟子花姑鄴侯公子二妾花姬之數
人者不癡也

時惟無射之令月兮芳菊應候而清標黃華重紀於
月令兮落英起興於楚騷常飲菊潭之甘液壽數百
歲以羣嬉日精延及於百畝兮食之至死而不饑子
喬采金精而爲饌兮並餐三秀之雲芝古但以節花
爲仙餌兮未始賞其花色之奇卽處士摘之而盈把
亦不過野菊之插於東籬自夫韻客知名圃師好事
搜羣品之晶華炫一庭之瑋麗繁種類之日繁揭名
目之互異若夫吾粵嘉本擢穎摘蕤松子爲最各色
芬菲從柎萼之吐英兮至鮮蘼之榮滋簇香瓣而細
抽兮不似凡蕘之紛披必匝月而綻滿兮閱三月而
方萎凌繁霜而難老兮挺烟容之幽姿傷露女之易

凋羨菊朋之能耐此閨苑第一之名葩爲劉范二譜
之所未載與杞苗而並擷偕蘭草以同薰若夫短命
之謹薄命之桃惡足當端伯十友之日羅虬九錫之
文哉

花鴿子賦

鴿亦鳩類約有數種有灰鴿白鴿黑鴿或白黑二
色相雜謂之花鴿有青毛有紅毛獨以藍毛爲上
馴畜養家棚之庭除飼以菜豆粟米負鈴於背放
之使飛摩雲而上須臾冲没惟聞鈴聲隱隱九霄
之外久之仍摩雲而下翔集庭隅誠馴養之珍禽
也至若千里傳書則又平原之黃耳太宗之白將
軍也與

愛茲禽之靈哲兮多馴養於庭除惟春花之簇項兮
覽綺質之清娛每兩兩而爲匹兮不混交而雜居時
刷翎而呼伴兮或餒食而將雛飛必冲乎霄漢兮搏
俊翮以凌虛曲江藉之郵信兮故特字以飛奴稱插
羽之佳人兮射柳而蓄於葫蘆或喜而止光曾之臂
或驚而投陳誨之懷或怖而依阿育之塔或義而返

逐客之臺或名將縱之而五軍俱集或聖僧度之而
二鳥皆胎李繪不以仙羽事佞人兮畜之宮中而作
詩以譏俳此皆冶禽之故事非敢襲艷於齊諧至若
駝鈴迅翥風徙雲驕志大鵬之南徙壓鳴鶴於九臯
望蒙汜之神渚欲侶鳳以游翔笑鸚鵡之在鞞兮怪
鳥鵲之來蹲悲燕雀之處堂兮慚雞鶩以爲羣感主
翁之恩豢兮常依戀乎晨昏豈與夫飽鷹之颺去兮
徒以苦飢而附人

金魚賦

里中清士養金魚於盆水紅白鮮瑩不足稱奇大
約以白身紅斑者爲佳如梅花斑麒麟斑桃花片
金鞍玉鉤七星八卦之類有鶴頂珠朱眼白六戟
紅以至唇腮顰頰共成十三紅者此爲上品至若
金銀目雙環九尾潘之恒亘史以爲此蓋蝦屬與
駢枝贅疣等不足珍也嗟嗟此勺水耳魚樂其中
揚鬚掉尾蓋不啻四海而五湖也

聞金魚之嘉種出三山之碧溪色娟娟而可愛綴斑
紋以叅差或金章而雪質將玳瑁以爲題或七星而

八卦種種色目之標奇極詭狀之瑰麗誠鱗族之所
稀飼以污渠之細蟲乃鮮澤而光肥浮水面而雨至
沉水底而日曦遶盆盎以周遊森江湖而自喜卽涔
蹄而亦寬寧坳堂之非水何必化溟鯤兮長存但得
活轍鮒兮不死爲擊水兮投餌咸羣鶩兮唼潤取綵
旗兮分招各紛馳而列陣觀其悠然而游泳兮時濡
沫而饒嚼揚銀鬣兮小舒掉金尾兮一躍如莊周氏
之觀魚於濠梁乎盤礴不知魚之爲我我之爲魚而
相忘乎其至樂

桂花餅賦

桂餅用以配茶小點可貽童子可娛老人與玉露
霜相伴爲土物以餉四方客之來嚙者必市以歸
遂爲茶之日鑄酒之桑落亦可哂也徐應敏之父
喜食桂糖因搗和爲餅土人乃競效之吾欲改名
曰孝兒餅

當清秋之佳日擷桂苑之仙英入糖霜而細擣丸小
餅之晶晶含香粒而微咀非蜜餞之可京侑青瓷之
妙茗覺潮舌以甘生采羣芳而爲餌咸創造而扇稱

藉江梅而釀聖點素奈而湯精漬玫瑰其餽美蒸薈
薇而露馨惟檀樂之桂餅爲孝子之製成居人封而
贄遠伴短札以郵情幸四方之多知味不晒鷲毛爲
太輕

玉露霜賦

玉露霜屑枯樓根以成嚙之香津迸齒清沁心脾
閩之糖霜青州之柿霜有同呼矣題曰玉露則靈
液之漿仙人之藥也

枯樓之根剉以爲漿濾清澄白小苦微涼入藥則爲
天花之粉服食則爲玉露之霜聊加馨於薄荷不借
味於蔗糖蓋其清勻近糗俊美非酥解煩生液止渴
潤枯爽氣鼻逆吸神霄之沆瀣香津舌湧嗽秘庫之
醍醐詩客之吟苦心恆咬餘甘而忽竦美人之宿醒
吻燥進一七而頓蘇山人無勞粉寒蕨野叟不用屑
彫菰此可作上真之清餌而難爲供俗士之常醕

十月白賦

土人獲稻後自製茅柴白酒稱曰巖壁清麴藥而
外別有風趣品酒之法先色後味白者聖黃者賢

赤者中材以下唐酒尚珍珠紅大不解事余咏白
酒有云淡於明月薄於霜此麴生知己也

膠人之酒賤者村醪貴者家釀豈不重夫他珍而獨
茅柴之是尚蓋以白酒者不沾臺閣之風惟帶林泉
之况卽可得之牀頭不必酤之市上惟新芻之缸面
春盎盎兮香濃幸種作之旣輟當臙臘之適逢團八
口兮咲樂杯交錯兮融融邀田伯兮野坐聯社釀兮
治聾述古老之遺諺堯舜一飲而千鍾太平觴兮共
慶真率耐兮相從聞之玉薤十年而不敗中山千日

而方醒茲鮮新而去滓亦冲美而析醒步兵休思夫
百斛學士何戀乎三升且也蒲萄凝而粘紫竹葉泛
而流青漾鶯黃而金剖濺鴨綠而碧澄旣添諸色其
味亞曷若醴白之水清燒春不比浮春之雋紅友何
如玉友之馨然則世之老癖癡漢忍斷杯中物者以
聖湯而指爲狂藥以福水而斥曰禍泉是皆未識吾
鄉之良醞祇令人微醺薄醉而不至於昏營而頽然
也

護居筍賦

竹之爲物非草非木別爲一族江南之種不一護
居稱俊而獨產於膠香鮮肥嫩白五德備矣南垆
人家村廬櫛比以竹爲屏蔽此名所由來也

案野藪之常供惟竹萌之味雋白筍出而籬穿初篁
生而土豐叅玉版以安禪殺籜龍而不斬惟茲膠水
竹類頗繁蔭深嶰谷秀越淇園審護居之嘉蔬實藩
蔽乎花村清濤翻而啓戶淨綠洗而映門其爲筍也
肥踰土菌鮮過湖蓴嫩非韭比白不瓠倫挹其香味
別有奇芬堪登宰相之厨足淪高人之釜便供孝子
之需不禁偷兒之取渭川百畝貯胸中床簣無煩漢
人煮

無筋山藥賦

山藥本名薯蕷亦曰儲莫亦曰甘藷亦曰山藷亦
曰薯藥亦曰脩脆亦曰兒草齊魯曰山芋秦楚曰
玉延鄭越曰土藷江閩之人單呼爲藷其名甚夥
要之山藥其通號也出嘉定者種糯不粳味醲不
淡皮上無毛肉內無筋細嫩如肪入鍋卽爛此芳
圃之良蔬而藷中之拔萃也昔陸士龍入洛詣劉

道真無他言惟問東吳長柄葫蘆得種來否頗爲
笑談今以無筋山藥語北人必以吳儂爲不實夸
其言以誑彼也

凡菜之目厥種不齊葷辛者胡葵山韭柔滑者白苣
青藜菰生者其茄嘉瓠水產者芹美蓴肥爲芝爲菌
土蕈木櫛至若芋屬統曰土芝山藥別系亦類蹲鴟
葉似牽牛兮穗如豆莢細蔓叢花兮綴實旁帖其珍
在根兮香賦莫敵萊菔宜遜兮芋薺奚匹百合並馨
兮池藕偕苾同長污泥兮嚼然潔白嚙之所藝酥美

無筋譬之鸞鷲四掌重裾且也種植而各肖其狀劇
取而忌唱其名是又不侔於凡品而可見上藥之通

靈

落花生賦

落花生香芋之苗裔也花墮地生風吹隔畦亦纍
纍而成花與實一本耶二本耶幾於幻矣咀之有
別味有殊香不獨橄欖耐人百咀也

本草一書詳哉臚記凡草有芟凡花有蒂花萎子榮
與枝附麗爰有土芝蹲鴟之裔花之旣焉旋墜於地

子卽寄生磊磊排次味勝芋魁奇香別膩世有不根
之草於土芝乎何異世有無花之果於土芝乎何議
配熱煨之薯蕷實獲我心比爛蒸之葫蘆差強人意
乾柑賦
邑申浦之東生乾柑焉質薄而乾其中亦秋林之
末果也封而貯之交春香越聞者拉鼻曰蘭也疇
旨其口卽見之者罕矣

柑之爲果艷稱往昔千樹木奴絹輸千匹釀而爲酒
洞庭春色攜聽黃鸝清時韻客包以黃羅今寵遺貴
第種之蓬萊兮合歡解意公遠嗅而幻成元素咒而
遠致東望之嘉實許嘗羅浮之仙枚忽瘁茲者海方
殊產質理輕媚色並金橘香踰碧椽經嚴冬而愈郁
涉初夏而猶鮮供之則迎眸玉媚剖之則落爪霜妍
壓健爲之雋爽凌北勝之清圓吾欲補南方草木之
狀因以換江東異物之箋

橄欖瓜賦

瓜備四方之名東南北以充蔬而西則充果膠有
特品焉視凡瓜較長兩端微銳形類橄欖故名之

初貴西番蓮圓而小此瓜一出元白壓倒楚人有
言剖而食之甜如蜜舉以相贈卽萍實不逮也

西瓜嘉品洪皓攜歸栽之翠圃青蔓葳蕤灌泉糞土
其實離離取橄欖而爲字蓋象形而錫之如獅頭柑
之詫異類羊角棗之稀奇色吐豔於園桃味流甘於
崖蜜寒嚼水晶鮮咀金橘液過蒲萄潔誇萍實沉李
非儔嗽藕安匹醴泉瓊漿析醒蠲疾雪沃露滋解飲
散焯涼生消夏之灣爽極迎颼之室東陵之朱實更
榮水谷之仙津猶苾若夫廬江曾摘大食未探古里

之指小奚羨青登之斛大徒慙是皆稗家之詭事而
非蒞部之英談也

三黃雞賦

夫野人風味曰黃雞紫蟹我嚙之雞有背距皮皆
黃者號曰三黃知言哉子輿氏之言肥甘也固鷲
光鴨伯仲之間見伊呂耳

雞曰三黃酒曰三白酒白清馨雞黃肥澤三白爲吳
釀之雄三黃爲膠棲之特村夫畜以供膳臘兮不獨
稱珍於大宅土人市以孳生息兮不聞種傳於外邑

是以軒蓋之賓緄滕之客得一嘗而味絕兮歸必誇
而重憶或遠貽而受貺兮必申辭而更乞嘆尤物之
移人慶仙肴之飽喫至於大場九筋名不虛得芼以
爲羹鹽以爲腊棲埒有未卵之雛登俎有早闌之翼
鮮肥兮浮盃而脂凝嫩脆兮入鍋而香溢未食先已
墜涎旣饜猶虞輟席此誠下里之清腴夫豈老饕之
迂癖也哉

載毛鷹賦

有鳥食載毛而肥卽苾種時催耕鳥也聲如云索

拖食載蟲後無聲肥重不能飛爲人所捕假使之
鳥者抱其清虛之腹枯槁林間則弋人何篡矣石
崇爲孫秀所執嘆曰奴輩利吾財耳不亦大可哀
哉

當夫孟秋之佳日茲鳥癡坐於林端蓋因食載而肥
重其聲遂喑而不喧弋人黏繭以捕取貴室爭購爲
奇餐因登之於鼎鑊而調之以鹹酸余食之而太旨
乃忽發夫長嘆茲鳥之飽載而徜徉也無異黃雀之
捕夫螳螂翳公子之執彈而隨其後也不保其軀命

之不烹知古今理數之盡然也吾獨悲夫封而就醢之韓彭

團尾賦

團尾小鳥麥秋時生出邑之清浦鄉形似盧甲甲決起而飛尾如團扇故名食之骨脆肉腴羽族中之江瑤柱也天下之味絕矣

惟團尾之小雀垂短羽以翬翬化生不過麥秋之候棲集止於申浦之湄質么麼其太渺味雋絕而稱稀比秋雀而更脆視黃雀而尤肥吾欲名爲仙人嚮吾欲配以河中釀不敢辱以大官厨何至輕爲俗子餉名之不經無以相况不聞呼山兔爲缺唇不聞呼湖鰮爲縮項今直呼之爲團尾者此誠東鄙之瓌談遂爾斥言其形狀

艾祁羊賦

艾祁村名也羊亦家畜味甘不羶與大場之雞稱膠陽二毳生有四耳異於常羊大舜重瞳文王四乳艾祁修髯公儻亦獸中之聖者與

羊出艾祁他方稀有鄭頡之猪羅江之狗物以地靈

所生不偶茲小殺之茸毛兮江村產而志喜牧人飼
以嘉豆兮候咩鳴於圈底貴室割而爛蒸兮肉間肪
而嫩美味小醜而不彘兮固鼎牲之極旨髯無異於
同羣兮獨耽耽其四耳訾苦泉之細肋兮鄙康居之
大尾庶三角之貢於周庭兮入圖經而並紀

小娘蛭賦

蛭從沙塗中捕取以形似婦人遂爲此呼其名不
典野人唐突有由來矣余改之曰玉女蛭庶幾與
西施乳並香食案乎

蛭之爲物味不甚超獨此種別雋絕清庖吾徵其類
各品名標白水之蛤合澗之蠓蚌曰魁陸蚌曰玉珧
螺杯稱異蠣房爲豪揚葩石蚌吐氣車螯介蟲之屬
蜃閣峇嵒蛭爲末裔著氏高橋非土人之好事實尤
物之宜褒但取糟蛭之一櫟堪消十斛之春醪每過
浦東而徧市余曾自賦其老饕

沙裏鉤賦

沙裏鉤蟹之屬從沙中鉤出得名俗以鉤爲狗名
實俱乖矣向出邑之高橋鎮後忽遷至上洋遂使

嚙人失其口福雖然珠還合浦定有日也

茲物產於海壖兮每潛形於沙裏土人從而鉤出之
信難恃夫深壘曷若縱其所如今長泳游於活水生
二螯與八跪兮具有螃蟹之全體乃不名之爲蟹者
豈甲族中之無名氏也與

蝨蟹賦

蝨蟹大如豆二螯八跪細娟可愛海塘之民捕之
搗漿爲腐奇鱸非人間口實或曰海蟹有子隨潮
而入內河大者食田中稻至秋未必執一穗以朝
其魁猶鴈之銜蘆輸稅然則蟹以海爲都居彼孱
孱者橫行之爪蹠也

揆物態之不齊兮卽一蟹而頓殊大自蝘蟀以上兮
一螯可以盈車小而細如榆莢兮腹海鏡而爲奴今
茲以蟹而名蝨兮殆極狀其孱軀潮一湧而羣驚兮
乃散滿於沮洳有如蠅頭之攢集兮不啻蟻陣之前
驅雖披堅而執銳兮笑介士之名虛走郭索之細聲
兮吐澆沫而微响無煩緯蕭以斷取兮但持筐筥而
可漁或搗取而成腐兮味怪鱸以爭斟或加糟而配

嘉定縣志 卷之四
酒兮覺風味之清娛亦海王之小腆兮曾擁劍之不
如讀爾雅其至熟兮不爲蚺蜺之所愚

賦者六義之一變而爲騷孫卿屈平離憂之思有
惻隱古詩之義焉逮至子雲稱麗以則曰壯夫不
爲謬辭也漢武好辭賦每見鳥獸異物必令相如
等賦之張儼張純朱異往見朱璩令各賦一物然
後就坐儼賦犬純賦蓆異賦弩隨所見也古人賦
物不遺瑣事以疾速擅場茂先鷦鷯正平鸚鵡食
頃卽成何必練之十年方令小儒咋舌也

孫公泉賦

并序

汪价

膠土斥鹵故水味鹹居人渴得泉飲之易曰山下
出泉膠無山顧安所得泉與康熙壬戌六月學宮
滙龍潭西五路祠前河崖之旁忽有水涓涓而流
里人軒而羣酌白而甘清而冽因鍾平爲潭圍不
及咫架以朱欄貯水尺餘流而不溢夢有神告曰
是可愈疾飲者徃徃而驗人爭汲取日至數百桶
而水不少涸遂盛傳之曰此泉也按泉者檻泉正
出沃泉懸出沈泉側出瀆泉湧出此涓涓者涇注

無形又烏得而名之吾聞之醴泉無源茲水潛行
意者其濫觴也醴泉者美泉也地不愛寶則醴泉
出政平德洽則醴泉出人蘇年豐則醴泉出此清
時之聖符神表之靈貺也時郡牧孫公如龍清亮
明允來攝縣篆不數日仁飈遠鬯頌滿輿人寬徵
弭訟剔蠹剪兇善政有難悉紀者公之膏雨沾濡
邑人士咸斟酌焉潤澤豐美斯非其徵應也與然
則斯泉也公之功德水也公之廉泉讓水也題之
曰孫公泉余樂而爲之賦其辭曰

伊原泉之鬻沸兮咸澆澆而吐溜泄則放爲瑤溪兮
歎則融爲玉竇韻客品之以鬪茶兮高流對之而清
漱若夫嘉瀝腴美靈液澄鮮負丘之赤泉延算神宮
之英泉駐年蓬山之玉泉願老陰山之甘泉飫仙此
爲上清之神瀆固非凡域之微涓至如仁膏漸被德
馨格天爰降茂祉名曰醴泉凡夫精誠之玄感無不
幽暢而遐宣貳師刀刺兮飛瀑湧漢帝劍挿兮龍湫
流盧勛躡踐兮玉漿溢去病鞭卓兮仙液浮舒姑洄
流兮朱鯉出楊帥淵注兮青蛇遊或孝履而號以通

靈或惠周而題之德潤斯皆曩哲之美談聿爲熙時
之英問繫惟吾膠東滄水府出沒海潮浮沙剛鹵見
百深之時渚兮其味鹹而差苦思清冷之淨涵兮固
冰心而滌腑茲者賢宮之右神舍之前懸厓滴乳流
細碧妍里中好事挹而嘗焉英芬兮標勝寒潔兮含
清色瑩兮錫谷味絕兮南零可以起疴而消癘可以
蠲忿而析醒信醍醐其弗貴豈沆瀣之足稱一時扇
聞四遠來汲負僂孳瓶道路若織雖終日其攜取恒
珠揮而不息訪之故老謂有靈源物非常見事不偶

然是必神君覃兮新濺光澤漬兮窮延霏聖水兮晶
沫叶瑞應兮葩傳博稽之古名蹟宜探隱之酌貪泉
兮清操彌厲崔公引善泉兮遺愛無慙今繼以孫公
之泉兮庶幾媲美而爲三

璿璣玉衡賦

有序用四六

許自俊

恭惟

皇帝陛下應錄配天龍飛方升十八披圖受命鳳曆
已卜二千璧合珠連會三元之叶吉銀丸華琯
逢五星之聚奎治旣登於唐虞事莫先於時政

靈樞筌於

宸算神器造於

聖心紫蓋黃輿闡陰陽之橐籥璇壺寶箭探理數之
精微近製新裁遠宗古法弘開東觀詔白虎之
羣英廣集西昆紀朱鳥之兆瑞粵稽九黎俶擾
天常堯有青丘之伐迨至三苗威侮時令舜興
丹浦之師首廓清乎橈槍次修明乎提格瞻天
望氣訪制作於軒轅考正履端晰支干於顓頊
爰命羲和重新甲子南正司天以前民用北正

司地以亮天工璿璣以象周天玉衡以載躔度
寅賓初建萬八千國之曆律已昭午運甫中三
十三家之推策伊始今

聖王生於震旦畸人來於庚方仰稟神規叅詳秘旨
節通陰管何須緹室之葭氣動陽鐘無假金門
之竹東風協律驗海水以識乾文北斗隨杓視
天河而宣民事啓薇垣之鎮太乙高居上瑤池
之墟鈞天安宅周三徑一采葛洪之詞候日占
風察洛閔之說臣等占蒲坐井未窮梓慎之傳

見草知春素昧鮮于之學恭承

嘉命敬賦蕪詞

夫何昔中古之聖人觀天文以作則握傳世之大寶先庶徵以立極煌煌琬琰之垂粲粲圖書之式倣珠圓而玉方用鰲奠而鷹翼七政亂而復齊三代因而不忒以有定窮乎無定將不測憑爲可測宮終於角六律因之而生上生下地逢乎雷八卦演之而爲揲爲仿是璿璣玉衡也其創闢始於黃帝大撓佐以曆元容成從而盡

制其繼述由於顓頊營室中而水泮蟄蟲出而旦旭堯以授舜舜受于廷其爲體制也在天成象在地成形懸爲二曜列爲五星日爲朝暉扶桑息于咸池若木返于崑崙靈鳥燭龍司其照魯陽夸父疲於奔月爲陰質方諸淚而水決重暈匝而風疾蚌蛤盈則金蜎吐麒麟闢則玉虎蝕乃若靈威仰爲木德主重華爛兮國多祜赤燁怒爲火德主熒惑守兮國受侮含樞紐爲土德主句龍旺兮民物膺白招矩爲金德主太白

經兮五兵聚叶光紀爲水德主元武令兮商羊
舞凡此七德爲兩大五行之運用係列宿萬物
之幘幪無山川之可間有呼吸之可通顧天居
於地外實地處於天中如鷄卵之圓轉若蟻礪
之旋逢三百六旬正四時而成歲七十二候鼓
八風而爲功旣審乎星鳥星火星虛星昴遂知
天中春中夏中秋中冬命羲仲羲叔欽若六宗
使和仲和叔允釐百工朔大朔小出卯而入酉
弦上弦下庚西而乙東璣以仰窺碧落衡以遠

布綠圖分之爲十二月以便九土之農政隸之
爲十二次以畫九野之名區天行速于日日行
速于月因朔盈氣虛而成閏日以辰爲躔天以
日爲馭緣左旋右轉而爲符北極出地南極入
地可以章步而亥步景長則暑景短則寒可以
縱盱而橫盱此則璣衡之布算也更若吹籥三
十五宮測圭九萬千里中衡外衡不召而自至
黃道赤道分行而不已南陸北陸對越於天龜
箕好畢好俯合於河豕瞻斗位則魁身而鶉首

望辰極則貫環而共紐有帝座天津以稱尊及
三公四輔以爲肘又有文昌上將以居中兼武
庫勾陳以相守招搖伏而人民寧泰階平而君
臣久騶虞耀而橈槍隱虫尤彗而侯王走此則
璣衡之羅列也至若左角右角二線之所游移
陰間陽間五緯之所房皇南斗主乎爵祿北斗
煥乎文章羽林以除暴亂壁壘以禦非常又若
並舍則奠四方分天則朝六服同色則天下偃
兵和氣則人間戢穀卽至數千年以後春秋之

所錄魯國饑而豕韋見侵宋景仁而心星退速
實沈祀而晉侯禳災歲星臨而吳軍脫輻金火
犯而多憂景慶奏而獲福此則璣衡之占驗也
前此大撓鬼區之所籌度尚遜此之密後此昆
吾巫咸之所刪訂益見彼之疎六府修而四門
穆儼象緯之在御八紀從而三統協宛奠莢之
成書沐乎日而落乎月捲黃旛而迎紫旗二至
二分長短不踰一杪差法歲法遠近不爽半縉
雲霄升沉之四維璣以準九重之輪廓山河脉

絡之兩界衡以平七道之絲綸虞秦肆烈甘石
久湮雖漢唐之太初大衍總不出其圍範迨宋
元之仰儀覆規均不絕其火薪斯誠不疑而不
悖是爲共信而共遵宜師之以開億萬年之鴻
曆用綿八千歲之長春臣等躬逢先甲觀光上
辛蒲葦共沾乎甘露砥鐵咸鑄于洪鈞俯心而
慚黃絹拜手以獻

丹宸

詩

五言古詩

令嘒自矢

越州一樗生濫竽嘒水吏戢思簡在恩憲令恒兢惴
淡素本天壤浮雲視榮利敢曰釜生魚至樂安蔬食
清白凜家聲苞苴我所媿竢竢哀我民重爲積逋累
勸納示以寬役不五鄉至餘羨悉蠲之鞭笞所不事
農忙實停比俾得早插蒔西土有荒區人竄糧仍寄
緩其徵比期招徠使墾治嘒俗喜歸訟休息時申譬

庶免雀鼠爭敦睦無乖異旱田急濬河折乾害遠暨
詳定著八條永久除夙弊大府督軍工戰艦費無備
不以厲居氓捐輸心獨瘁荒政宜預修積穀起殘飢
無令蠹侵肥饑人受嘉賜羈囚亦可憐悲啓望餘餒
給之以口糧恩沫稍流漬義塾久成墟締思更營置
廣集諸生徒延師勤課義校試秉虛公蒐羅拔僞器
大哉頒王言月吉開講肆頑者旣革心良者深感喟
奸胥作神叢懼法不敢崇獍役作虎俚畏威不敢噬
方知蠹魄褫肯容白日魅拳勇名打行嚙風稱最熾

執法殲渠魁羣兇自驚避三窟爲兔藏巨窩爲盜鹿
必須絕其源萑苻刃不剗盜黨多博徒俗敗樗蒲戲
申諭無游閒比屋營生計愚蠢信巫鬼祆祠喧賽會
珠貝炫街衢旬天盛鼓吹嚴戢消亂萌詎止省繁費
屏水賴烏犍日夜苦奔躡何忍加剗屠歛暑多勞勩
凡當區畫者織悉所不廢夙夜殫厥心敷施日漸被
嚙人口有碑何敢干清議事事守官常猶恐有顛墜

金節婦詩

沈旭初

黃渡金應昌妻龐氏二十一而寡無子血抱叔應

嘉定縣志 卷之四
聘長子垓苦無乳以糕果飼活之長而魁梧丈夫
子也生孫有聲益珍愛如掌珠年七十八於清明
祭先日謂家衆曰明年此日我亦與此坐矣至期
果無疾而卒嗟嗟熒熒一寡守節六十年撫成兩
世兒孫得以生養死葬爲可風也詩以紀之

貞婦標奇徽罕覩如景慶嚴性在裙裾節與干逢勁
黃江有清媛結髮諧佳聘未幾殞厥天誓死冰心瑩
膝下乏嬌兒孤熒守寒檠血抱叔氏子恩响共一命
苦無乳餵之糕果以爲飢後得舉懿孫鞠育心彌罄

素業寢以昌門楣稱鼎盛可知完節人無不繁子姓
焯哉金母賢撫立持家柄賴有女丈夫似續斯綿亘
七言古詩

古梧行爲朱九初賦 徐時勉

世家門巷多荆棘舊德綿延自封植高梧岷嶂浮雲
齊碧陰尋幄空庭得靜觀高意無止休無穴螻蟻藏
鶻鷗佳氣不爲衝風奪正直豈因雷雨憂泰山松樹
已姓秦蜀川古栢難撐漢楚室星中未可期吳宮秋
旱空成嘆此梧得地何其偏孫枝盡可入虞絃不作

黃梁大槐夢恰同叢桂小山前城外遙看問喬木知
是先生讀書屋董子園林足不窺楊雄秋室聲非俗
年來橫海下樓船括地搜山盡杞榎幸今視爲不才
者竟以無用終天年

醴泉吟爲郡侯孫公賦

黷宮潭水清如玉四遶青松照眉目映奎山西神祠
南地迸靈泉珠萬斛夜光明月淨瑤璃涼生一勺寒
心脾消渴頓解沉疴起何啻長桑飲上池浴鳧飛鷺
生歡喜碧藻青蓮漾秋水父老攜壺斟桂酒婆娑傚

舞清風裏昨朝旨酒賜公堂今歌旣醉飲神漿酌此
醴泉解宿醒願邀神貺盈倉箱吾聞一人在御歌有
道地出醴泉長芝草黃河應爲聖人清甘露酒泉皆
地寶使君五馬自西來隨車膏雨遍蒿萊五日一風
十日雨郊原吉貝雪花開靈泉之清清莫比揚子中
泠差足擬使君之清清見底一片冰心沁人齒我願
人人聽我醴泉吟小吏毋忘大吏箴任爾鹽梅甘苦
皆嘗遍終當不易葵齊心

蘇節婦宗太君入祠歌

節婦有傳婁東陳
瑚撰載前志中

咄哉蘇母女中傑。皎日長虹炳大節。金銷石泐黃河
萬里折。凜凜生氣不減懷中一寸鐵。嚴將軍頭侍中
血。閨閣程嬰堪比烈。隆文鼻屨丹青揭。水藻溪毛薦
蘭雪。吁嗟乎太君從容忼愾撫藐孤。令似文章美且
都。藏珠抱玉臥草廬。青蔬白飯足歡娛。金章紫綬何
爲乎。吁嗟乎上蔡鷹華亭鶴。何如塞上之馬。淞江鱸
三牲五鼎待如何。蘇子守身事親真丈夫。嗚呼太君
表里門。祀春秋。何知石爛與海枯。母節子孝兩不磨。
榮于懷清之臺。烈於栢舟之歌。吁嗟乎忠孝節義已
矣。夫古今滅沒深山窮巷何其多。嗚呼古今滅沒深
山窮巷何其多。

孝義歌贈孝子朱羽吉

朱家俠骨古來傳。長虹吐氣橫青天。西走秦關北抵
燕。結交壯士多豪賢。荆卿漸離皆比肩。舞陽小子等
雲烟。父讐不共敢。自全漆身吞炭暨髡鉗。我師古人
何後先。要離七首鄂公鞭。懷中霜刃寒鋒銛。正氣一
徃日。無前乳虎纍纍牢。戶填青蠅弔客伴。身豸髑髏
恨不藁街懸鬼薪。熒熒青燐然城上。擊柝夜不眠。銀

鐫頰衣踵履穿爰書獄成告九泉復讐義炳春秋篇
孝子漬酒酌新阡碧血嗚嗚涕泗漣哀哀蓼莪廬墓
田寒食春山叫杜鵑斷猿落日愁雲邊墓門風雨哭
年年

談節婦歌

邑諸生潘諧妻年二十七歲守制今
五十有三歲撫諸孤葬五喪水磔倍
嘗

潘郎弱冠美文譽水滿芹香花滿樹方歸之子賦天
桃俄送良人歌薤露傷哉伯道竟無兒中郎有女更
何依喔喔寒雞啼落月熒熒夜火伴晨機負土成墳

三十載馬鬣松楸青不改雪虐風饕倍苦辛此心鐵
石千年在千年正氣永不渝西山石泐東海枯崑崙
踢倒須彌碎節婦之節高哉巍巍乎

陸節婦歌

沈文芝妻二十六歲守志今六十
有二嗣子天倚婿單杭貞操僅見

錢顧琛

陸節婦陸節婦節婦生在練西疇斷髮截鼻真再見
當今女宗誰足侔蕭蕭風雨辰鳴機軋軋愁鎖遠山
眉有田可耕耕一畝手揮鐮鏹除稂莠自甘薄命操
井曰願作沈郎舊箕帚芳容憔悴今老矣女夫迎養

相依倚梵唄聲來羨阿潘水心却在寒梅藥吁嗟乎
男兒七尺亦可羞綱常名教今乃向婦人求

送菊隱陸先生應余大中丞聘簡呈闕瞿亭先

生

趙俞

君不見文襄周公昔撫吳堵築堤壩減額租又不見
王公端毅敢執奏奄豎伏辜民再蘇又不見海公剛
峰古孝肅公廉強直威惠敷去今一百一十有餘歲
丁支再週數默符天文翼軫儲精氣篤生偉人狀魁
梧敷歷京邊著聲蹟秩長御史亞大夫啣憲撫軍

制曰可除日才下騰歡呼羅致名賢採謀議一如節
鎮河陽烏先生鴻碩今真儒蹴踏馬鄭駕江都四部
七略恣漁獵三才十聖洞根株舐排攘斥扶絕學貴
王賤霸紹子輿絺章繪句羞末技燕臺肯受緇塵汗
明公崇儒重道術京邸三顧先生廬吏事猥瑣不足
煩臯比絳紗座久虛檠戟蕭閑鈴柝靜燕寢凝香霜
月孤夜半前席方借箸能不一念桑梓無吾嘉彈丸
吳下邑地不宜稻非膏腴賦繁澤魚口煦沫役重城
烏尾畢連歲輸金錢代芻輓行月忽墊二萬餘就漕

歸漕有本末母乃雀鼠朋侵漁况有鄉豪多暴桀
埋發塚氣頗粗投匭告密巧中傷厓柴如狗黠如狙
水柔火烈昔有訓曾聞太叔攻荏苒崑岡玉石務使
別立苗必先非種鉏吞舟之魚决蹠虎憲網未可綱
目疎嗟予濩落五石瓠兩獻金門覆醬瓿貧充都講
飽園蔬局趣真如轅下駒何乃開張膽目掀髯鬚先
生見之一軒渠書生故態何狂愚吾語先生非狂愚
當年鄒魯矻矻老駟車爲拔蒼生在炭塗鄉邦痾瘁
方切膚平生高談經術何爲者嫂溺不援人情乎明
公當今臯夔徒行且入掌鈞軸秉銓樞先生贊畫功
不居但伐南山之石紀公勲大書特書不一書

木棉歌

王晦

吉貝舊從海島植流入中華滿阡陌故老相傳號木
棉其功直與蠶桑匹年年四月來牟黃播種入田乘
雨隙逆芽發葉僅十餘田中茂草先盈尺揮鋤流汗
浹故衣赤日中天痛如炙半載辛勤到九秋西風夜
發苞初坼幸逢稔歲霜信遲照眼花叢如雪白田夫
珍重逾夜珠挈婦呼兒親手摘歸來索賣價苦賤百

計經營供婦織機聲軋軋寒月闌十指痛裂心不惜
待輸公賦償私逋縱成萬布難存一吁嗟此物衣被
天下民回看農婦兩脚赤

殪虎行

爲聞侯除暴作

馬翼

昔人曾言市有虎於今市虎多無數磨牙礪齒踞道
傍殺人如麻誰敢捕食人之夫啖人妻攫人之子嚼
人父爪牙如鋸舌如鋒喙啞叱咤疇能伍卞莊逡巡
避下風李廣東手謝不武更有狐狸假其威妖氛肆
煽欺愚懦渡河徒自托空言羊質偏能恣簧鼓我侯

下車心傷悲憫此蒸黎乃予遺奮我神威霹靂手往
來射獵西山陲弓開矢發疾于電金睨白額心胆摧
巢穴旣傾婦子縛投之鼎獲成膏糜夫民今日得反
之使君仁術何靈奇吁嗟乎有力如虎尚就擒何況
鬼蜮與狐狸吁嗟乎狐狸鬼蜮伎倆將安施

瑞木行

爲聞明府賦

戴鑑

練和十載成斥鹵海濱潮汐沙爲土官租二十八萬
餘百川疏鑿非細故近時力役半折徵四面塘流俱
平路滂無洩瀉盡狂瀾旱如焦土難車戽追呼逼迫

民嗷嗷村墟鳩鵠無完袴去歲我侯初下車知民疾
苦常歛歔縣事如絲籌緩急三冬民力先河渠稼穡
東南均利賴哺含腹鼓稱安居蒲華塘邊年大有晨
鐘暮鼓空王廬前後編籬更插棘中間朽榦重扶蘇
我侯沛澤如雨露百物滋生語不虛猛虎渡河非足
異枯木生梯堪大書

輓殷二尹元亮

二尹載有志傳

浦士瑋

荆玉瓌奇天下選煨以烈火性不轉丈夫經綸有如
此矯矯揚芳出塵滓公才本自千里姿偶來硎發和

江時名久滇南八閩中水蘖之操空江東頻年枳棘
徒棲鳳會逢潦熯殷憂共飛芻輓粟漕天都典衣乞
假完民逋撫心只自念凋殘兩護銅章墨綬寒蘿月
梧風秋寂寂枕石攤書與運甓含糗羹黎性本然簷
花山鳥落詩篇榮名自信等海鷗那知蒲柳忽驚秋
一夕風塵二豎侵騎箕驟鸞不可尋反覆浮雲世事
盡重泉翻得廉聲振君不見新開吳淞江流清且泚
塞時公未至通時公便死挹取清風新祠祀蘊藻蘋
繁滿澗沚生存不享吾嚶鍾鼎旨卽今幻化蓬瀛濱

還薦淞江半杯水

滙龍潭

程暹

祁水瀾生香旖旎澤宮結秀朱垣裏龍葱虬閣散輕
烟偃蹇雲衢曳朝綺雙虹浮天竅以窅闕門高轟文
苾起碧潭森森老龍吟上有蹲獅石齒齒崇岡峻坂
何鬱盤俯視培塿如邾莒夾岸能開四面花盡種天
桃與穠李光生東壁聚書堂文山翠律文瀾瀾

東魯行

爲鄉飲賓顏羽風賦

馬萬

太山高下爲東魯東魯名家誰最古杏壇高座第一

龔曲阜侯家有世譜傳來世譜二千年氣節文章處
處傳分宗別向荆蠻國翁也于今起後先賢易地
爲禹稷翁也憂饑復憂溺憂溺能令水土平憂饑迺
使烝民粒烝民相與祝長生養老全從月旦評曾濟
萬人寧待報止憑千卷望成名成名憑世胄宿望歸
山斗盛世重高年共言當上壽君不見當年顏蠲隱
巖谷晚食安車以自足如翁何必稱王前聞爾高名
皆萬福又不見漢家顏駟髮如縞孝武相逢恨不早
如翁今日尚童顏當代恩華方好老卽今禮樂在明

堂處處明堂禮素王養老尊賢登上座儒衣端甫盛
趨踴趨踴分左右紀年當四豆三讓還三揖瘳肺兼
啐酒王獻酒工吹笙歌四牡先鹿鳴次魚麗次由庚
關雎鵲巢互相合無非抑抑重老成春王正月令始
布已見春風滿行路春風吹入謝家庭景入新年增
玉樹上元燈火進春醪賓席新添度索桃采菊傳柑
重慶喜德星長並泰山高

壽吳鐵菴長歌

朱竒穎

古稀七十今不孤有友五人同一初就中誰克如少

壯鬚眉劍戟獨推吳吳公治平爲第一自漢以來鮮
與四君曾作令餘不鄉盜息民安虎自逸訟庭無事
鶴琴閒前溪音樂非人間時訪昔賢貞懼祠辟除輿
從獨追攀銅官不採只青田粘堊無求但冷泉歸來
老屋塵不掃風雨時偕龍虎眠君歸自東到草堂我
亦西歸學灌園園有舊巢來燕子堂顏故額長桐孫
今年彼此各七袞遠哉聖羽白駒繫九英有子將祿
養華友門墻自岑寂我同二子行上觴君言人壽須
相念山中無曆不知年一片花飛春酒香每與子孫

話總角維君與我少同學。叔度汪汪千頃波。澄之不
清。滄不濁。年當二十困儒冠。三十蟾宮折桂看。屢上
公車聊就選。三康際會起凋殘。君旣出兮予獨處。選
書忽下魚蝦侶。太行迢遞行路難。老友睽違九寒暑。
一朝會面接紫芝。友聲相和如壘篋。婆娑鄉社更十
年。公庭罕見意相期。有時釘坐如老衲。有時說劍龍
泉合。富文工畫勇軼羣。三絕驚傳髣髴毛。颯跣趺一榻。
氣常充灼爍。雙眸光若瞳。燒燭觀書嫌夜短。赤松黃
石來空濛。黃石赤松相伯仲。塵世無非小有洞。劉阮

逢仙君獨居。達人豈作神仙夢。

孫公泉

徐名世

泮池東南水啓秀。綠橋映帶青山右。關西靈侯顯神
通。醴泉湧出光融融。取之不盡用不竭。渴飲瓊漿病
亦歇。涸轍枯魚思召杜。誰將雨露江村補。自公來兮
清且廉。人人喧頌孫公泉。公去泉留想遺愛。萬年千
載如公在。

五言律詩

題宋揚忠惠侯墓

許自俊

人是前朝傑墳因宋相名屈蟠多老樹阿護有神靈
地僻川迴抱林深鳥亂鳴片帆從此過徙倚不勝情

其二

碌碌胡爲者栖栖一代中十年思往事三尺竟何功
霸業空懷古雄心半老翁滄江流不盡千里暮霞紅

題許潛壺不負青山圖

朱奇穎

青山千古色綵筆五雲光展到烟霞滿風來笑語香
韶年鐵硯賦華髮紫薇郎月旦周天壤當今許子將

咏木仙

仙骨從冬蛻南園栗玉花餐英開水府解珮四靈媧
白壁圍金盞黃雲集素紗含香但一笑何事襯鉛華

咏長春

花發春隨減君何長若春不知時代謝但見色圓勻
開闔陽鳥轉高低金盞陳枝繁摘更盛日日展重茵

留光寺

郊居隣廢寺曲水繞西東隔岸紅塵外臨流清鏡中
烟雲生翠竹鐘磬出疎桐一片光明地留爲日月宮

咏木筆

聞道筆如椽見來卽此花色同赤芍艷香共玉蘭嘉
握固人難掣才高手獨又江淹曾入夢曉發管城霞
孫公泉 闕 選

金秋初游爽冽水汲偏長似應醴泉瑞還同菊水香
湛恩流蔀屋膏澤詠公堂銘石傳司馬清風遍海鄉

又

陳唐碩

一泓清若此尺水似千尋瑞叶神明頌虛涵太古音
潔清同鶴性洞徹見天心涓滴皆遺愛難忘雨澤深

又

汪穉實

一穴不盈尺甘泉漾碧紋神宮涵細溜玉井吐清芬
靈貺家家遍恩波處處分風流賢貳守誰不頌神君

又

汪岱實

異績符神瑞恩膏特地開坤元含乳竇仙宅孕珠胎
湛寂同金鏡清漣泛玉杯歡聲騰境內莫放使君回

又

汪文懿

不是崑崙頂泉源何處通沾濡念帝力感應出天工
一勺分滄海千秋映碧空好攜琴鶴伴到此挹高風
過非菴訪天立和尚 張凝社

秋來幽興劇雨過草橋西翠竹迴風靜紗窓落日低
門無俗客履詩有故人題留得南能約逃禪似虎溪
春申浦
戴慶長

春申稱好士野浦尚留名封域三吳遠豪華一代傾
連江高浪湧入海怒濤爭珠履應難見徒深弔有情

詠西隱寺羅漢松
錢子械

梵刹留雙樹居然尊者名蒼烟千載護聖果幾時生
龍象無來去師徒屢變更昔曾分几榻衰盛不勝情
詠外崗楊墓銀杏

舊說將軍樹曾丁光武年追宗傳宋代古墓表祁川
鶴鶴巢偏慣風霜幹愈堅神靈憑藉久勁氣直參三

金沙塔

朱祥發

一塔晴沙湧桑田或有云金輪城外見寶鐸市中間
簷碍天垂斗窓橫海度雲樓東初月影長是伴宵分

輓殷二尹

棘棲才克展卓絕下邳丞蕭索如孤客清癯類老僧
常懸金背鏡獨貯玉壺冰廉吏門當大蒼天或可憑

題雙清祠

祠祀陸聞二侯

汪穉實

到處說雙清祠宮不日成千秋崇配享萬戶祝長生
齋馬追前哲釜魚起後英請看真父母留得好名聲
弔黃陶菴進士黃偉恭秀才 俞慈成

首陽千載後今復覩斯人兄弟同時盡君臣大義伸
但期心不負敢謂事難泯江左多遺老端居痛此身
五言排律

省耕

應博學宏詞試題

許自俊

皇心勤國本聖主重民天八駿荒簷外雙龍細草邊
翠華寧望幸玉輅正旬宣澤及方州遠恩從帝里先

赭鞭將覘土黃屋已凌烟二麥螟無耗三縑蠶未眠
青苗愁國課黃紙急官錢鄭監國難繪長孺節敢專
親看萬畝色近得九重憐靈雨催千籍薰風動五絃
桑林六事禱茅舍萬家傳稽古三王政吹豳七月篇
鴻歸知有日龍見是豐年夏諺非無事商霖何忍偏
漢皇全賜粟唐帝半吞蟪日麗桃花騎風和柳絮鞭
勞薪辭束濕枯骨得重咽衰雁還中澤噉魚得惠鮮
文王傷輦下神禹泣車前不爲登臨出迴鑿意惘然

濬劉河紀事四十韻

趙俞

震澤浮南國婁江啓北門灌輸吳郡賴疏鑿禹功存
形勢成襟帶波濤互吐吞鮎魚初峽倒雉瀆遂瀾翻
潮汐通三邑風檣達百番滄桑由積漸州渚占耕屯
泉脉餘毫髮蘆苗長子孫尾閭仍錯壤唇齒有違言
劉白皆民譽東西按水源民爭荷畚鍤吏亦叶篋墳
所惜山虧簣終教隰作原海驚颶母煽湖怒老龍噴
盡失禾棉種都亾烟火村賢侯今岳降上第早鵬騫
京洛才名重河陽花氣繁租催無伍伯訟聽善平反
降割心尤惻笑黎手自援分程得劇地利器試盤根

爐扇忘寒暑輪蹄徹曉昏憲臣持節鉞牧伯職屏藩
奏記資籌畫從容坐討論契龜曾食墨祠土更烹豚
三老龍鍾謁千夫邪許喧比肩疑集蜎接踵類攀猿
渴引鹿盧綆汗沾犢鼻禪科條肅軍紀德意藹春溫
公量齊羸縮平衡少輕軒金錢太府給絲粒使君恩
饑溺常兼濟官私兩不煩天妃湍箭激鹽鐵駛雷奔
蓄洩容如櫃隄防束似壘潤能蒸枯槁清可滌煩冤
潦兩隣非壑軋封井豈智家家藝秔稻戶戶買烏犍
賦役添新額流移返故園豐功勒鐘鼎大力轉乾坤

游豫諸侯度勤勞王事敦河工次第舉寵秩一時尊
竚待乘驄馬懸知拜瓊垣長留遺績在此水共潺湲
七言律詩

西城遣興和徐蘧菴韻

趙蕙

莫說城中屢換官且看秋色滿林竿買書課業兒曹
計食力生涯我輩難逢世自知時樣別閉門始覺畏
途寬湖山近有朋儕約話到蒹葭興正漫

登石岡墩

爲愛秋光着處遊扶筇何意得高丘重陽易過黃花

老好景難逢白髮稠南浦曉山晴入望西林遠塔坐
來收清狂不盡登臨興載酒還期醉上頭

呈邑侯陸稼書尊人

俞王

東吳文獻舊耆英驥子騰驤早策名趨侍鯉庭雙鳥
近舞迴萊綵萬花明恩榮國慶還家慶聲節臣清似
父清俸薄高堂共菽水加餐只在政刑平
不擇南州有老親桑麻萬井聽吹豳躋堂壽酒春如
海滿署寒香玉照人毛義曾因捧檄喜房公却笑爲
官貧晨昏莫憶湖薄滑百里攀轅借寇恂

言貧驟忽生白兔爲侯廣成太夫人賦

夏雲蛟

素質明眸射水波壽經五百歲年多身隨白麕從王
母處共銀蟾見月娥宜武晉年稱穀縣永康漢代奏
西河稱觥堂上如雲滿雙璧飛來入咏歌

其二

千齡異物出同羣被白含章久獻君納瑞琅琊王廡
賦符徵月德子山文鹿游岸北同飛璧犬在淮南共
入雲聞說漢朝崇瑞鹿恩加壽母識殷勤

前題

陳紹馨

廉吏可爲不可爲昔人感慨見乎詞
治遵卓魯非阿世道合顏曾未遇
時介性孤行終弗屈清操絕俗自
無私求賢佐理今方切誰謂徵書下
逮遲

登南翔寺鐘樓

楊世清

白鶴悠悠去不歸高樓登眺悵斜暉
雨花堂圯僧叅少香積廚荒鐘扣稀
惟見唐碑埋蔓草空留梁檜掛緇衣
二齊安得重飛錫寶座金身色更輝

八月尋槎溪故址

博望槎浮傍海東。溪流聞說與天通。年年競看江潮白。歲歲空餘水蓼紅。沙岸草暄鷗睡日。石梁湍急雁驚風。伊人獨向銀河去。目斷蒹葭零露中。

題婁塘羅漢松

陳瑞徵

古幹危枝幾十尋。神寒勢險氣沉深。何年天外鶴雙去。頃刻空中龍一吟。日月久成貞士志。風雷不改老臣心。阿羅歷盡人間劫。化作森森數畝陰。

上繼宗始祖墓

朱喟

祖德宗功四百年。一坏今日却依然。竊憐王謝殊難

問。差喜箕裘尚有傳。傍壠松筠留勁節。繞溪桃李布芳妍。紙錢飄蕩粲盛潔。領取春風到墓田。

題陸父母真清書院

朱祥發

令德高名世所師。真清遺愛至今垂。當年共沐隨車雨。此日還看墮淚碑。猶憶河陽花滿縣。空餘彭澤柳盈堤。只今琴鶴風流在。跼看雙鳧達帝畿。

輓殷二尹

吳康侯

哦松亭上暮啼鴉。瑟瑟悲風丹旆斜。苦雨連朝惟半菽。南雲萬里已無家。蕭然旅櫬墳三尺。藐爾遺孤天

一涯猿鳥聲聲何限淚
祁陽父老重咨嗟

其二

莫是藍田縣裏丞
茆簷草坐恰如僧
一官落落唯嘗
蓼數口嗷嗷只飲水
白骨埋愁空有恨
青天搔首竟
何憑長歌擬續招魂賦
欲倩巫陽喚不膺

王主簿柩委頓王李二公祠
慘暴無歸詩以痛

之

浦士瑋

淹殞荒祠春復秋
不知何處是山丘
官卑原藉文章
著祿薄肯因老病休
萬里鶴歸魂自在
百年頻薦薦淚

難收傷心

祁陽事誰竭埃塵助麥舟

卜居申江

浦鷗

地僻翛然遠市囂
一枝棲穩警鷓鴣
椽仍舊構茅重
覆圃却新開蔬屢澆
潮信遙喧黃歇渡
人烟不續永
隆橋胼胝願並東
鄰叟竹息頻賡擊壤謠

廖邑看村社迎神

陳瑚

花柳含烟二月春
荒祠祭賽走村民
衣成短後盤龍
窄髻學喬粧墮馬
新一日散金與漢業
百人折竹洗
邊塵英雄靈爽今
何在祇博雞豚作社神

神爲戶牖
侯陳平揚

威侯
劉錡

滙龍潭

陸沈暘

青鏡熒熒對禹門朝宗如識素王尊風雲起處初無迹日月涵時豈有痕鳳唳欲枯頰借潤鼠鬚從洗不教渾休言點額尋常事長養多沾此內恩

金母須節婦

王喆生

節婦須氏歸于金長卿不三年而寡誓以身殉子鼎鎔方週歲承舅姑命忍死以撫之迨長而遊成均不幸早折孫潢方六歲又與其媳曹氏忍死以

撫之今潢已登武科矣兩世一線皆氏爲之撫成曹氏又克守姑訓飲水茹藥不愧家風有足紀者彭城節母扇東溟兩世遺孤獨撫成靈几銘旌常愴况寒繁機杼自淒清尊章堂上供滫瀡素業閨中苦拄撐有媳善承水藥操貞蕤累葉嬪家聲

讀葛孝子傳

許大達

伯達葛翁終歲優游于醉鄉不知有老人第見其貧而樂未悉其子之孝癸巳長至次日翁舉長春社仲子麗若執爵季子韜若執饌周旋竟日無倦

色及讀孝子傳而知翁之貧而樂也固宜
葛翁高隱醉仙鄉雙鳳和鳴竭力將菽水雅供賢聖
液滄桑時進太平觴謾言陳氏難兄弟堪羨封君元
季方子孝父心貧亦樂何須富貴把親揚

張節婦詩

葉方藹

孝廉徐伯常先生有女敏慧齒方齟父爲口授孝
經女訓輒能成誦及笄適張氏年二十八而寡屢
欲身殉其姑諭止之曰未亾人夫喪子殂相倚爲
命者惟汝耳奈何棄我耶氏乃感痛忍死手續紆

以養姑者四十年如一日詩以美之

琴瑟方調失所天清河少婦死心堅鉛華從此千年
謝軀骨何難一旦捐寒櫬茹冤呼碧昊孤燈扶義向
黃泉祗因堂上無人侍飲血偷生四十年

督濬沙浦漫述

蕭文炳

不佞菲資薄植謬縮半綸潔已自矢分宜爾也近
督河工悉除規例一時父老子弟榮以牌位贈以
詩文華袞載加有餘寵矣河干小暇聊賡蕪句以
紀輿情一以志喜一以志愧云爾

桃帶鮮霞柳帶烟和風甘雨兆豐年家安耕鑿淳風
洽戶習詩書德教宣莫去公庭爭小忿早輸國課省
閒錢多勞爾力勤開濬喜得工成好種田

吳淞江濬後對月

陸宜斌

去年對月淞江上江水無波江月荒今歲淞江還對
月月光皎潔水汪洋潮聲半夜碧雲靜秋氣滿空白
露涼便欲乘槎廣寒去狂歌仰視天蒼蒼

黃歇渡

浦鷗

人烟兩岸限封疆楚相空名流水長鱸著四腮屯網
市虹聯雙影巨輿梁湖源西上中分綠海勢東廻半
截黃極目江天風景好濯纓歌激棹茫茫

海口閘

疏鑿功成淞浦連閘營海口築彌堅雷車轟擊潮爭
港雪屋崩騰浪蹴天樽節民生無限惠頻繁國計二
三賢望洋未信滄桑說氣運由茲卜世年

旗椿石

想見蘄王曾駐師江灣牙石繫深思勒銘績偉齊銅
柱斬馘功危顛鍊碑天意興亾豈盡數人情眷顧有

餘悲書生弔古銜迂憤磨劍將憑作砥爲

贈雷壇法師殷平宰

沈旭初

平宰名元衡邑諸生中書甫曾孫庠名超渠行五
雷正法祈晴雨驅鬼魅動無不驗歷任邑侯崇獎
張真人授以贊教

不羨青衫試羽衣仙風古貌世應稀嘗隨鶴馭朝天
去曾向龍宮行雨歸寶炁自能冲北斗劍光直欲駐
西暉知君製就金丹錄願得相從問所依

海上村居

巖恒

遠舍平疇獨荷鋤高槐深柳護幽居青林夜雨朝看
竹白鷺春潮暮得魚閉戶不勞題鳳字臨池時草換
鸞書塵中自適逍遙意何必深山挽鹿車

吳淞江夜泊

俞嘉客

晴江潮落夜涼生離思羈懷并不平傍水草蟲如寓
客近鄉機杼帶秋聲途窮未易言高尚俗薄殊難任
性情惟有故交知此恨露華迢迢練川城

送陸明府歸當湖

借寇徒勞卧轍遲鷹鷂得意雁鴻悲有官貧過無官

日去任榮于到任時塵世事緣名利誤賢戾性與水
雲宜歸歟吾黨多狂簡笑指河干下舊帷

印母顧烈婦詩

項思尹

顧氏適諸生印鴻謀孝養尊章夙稱婦順年二十
四而喪所天截髮誓死撫週歲孤兒枋相倚為命
不幸乙酉城陷婁東亂兵未躡我邑氏避匿沙江
橋水中兵見而呼之起氏誓不從兵怒遂以刃橫
磔之骨肉糜爛枋為余壻今補弟子員為詩紀之
千古綱常有哲模武陵女子義聲扶貞姿斷不經磨

磷香骨何難受剪屠身逐曹娥沉白水魂依荀采赴
黃墟鬚眉未必能輕死巾幗錚錚烈丈夫

題雙清祠

祠祀陸戾稼
書聞戾爾達

汪价

歸然祠宇立天中召杜聯輝俎豆同並使吳儂歌樂

土皆為越產扇清風

陸戾平湖
聞戾山陰

名垂後謝方前謝績

著小馮繼大馮竚看穹碑應墮淚萬年遺愛在江東

七言絕句

丙午季冬十一都有虎見於虬江之叢棘一晝
夜陰風慘烈攫噬傷人官兵四集不知所往亦

神物也詩以紀之

望河羣渡事何神問爾奚為踞海濱須束爪牙莫肆
毒人今輕去已無隣

槎浦

博望兒孫種浦田乘槎人去事還傳家家總有支機
石浪說天河織女邊

佛耳泉

一輪荷葉斷聲塵井甃偏存不壞身欲淨聞根曾洗
耳山僧俱學枕流人

瑞竹軒

一枝枯竹寄天蹤直節干雲密影重解識手中通造
化底須歸救葛陂龍

徐公坊

羣兒不顧酒家貧豈信橋邊石作身却笑皇皇昏暮
者從傍元有獨醒人

紀王廟

朱碩

落葉蕭蕭正滿村停橈特爲奠芳尊當年劉項今何
在只有忠臣廟尚存

渡吳淞江

嚴捷

潮去潮來湖海連浪花飛沫濕汀烟癡雲載雨四山
黑撐笠灘頭喚渡船

嚮塘老松

陳邁

虬枝龍幹絕春華耐守冰霜一水涯不似在山堪避
雨舊時名號慢相加

題吳鐵菴畫松

朱竒穎

畫松卽是畫龍手鱗爪依然不見首變化無端用九
間雲中如晤蒼髯叟

又題畫扇頭虎

扇頭有虎虎生風謾謾涼颺起掌中况與盤松同坐
臥不知身在水晶宮

五言絕句

集慶寺

朱竒穎

鳥聲清磬遠竹影碧霄親我佛光時現總爲不二身

法華塔

塔勢如文筆揮毫點太虛舉頭天路近特上萬言書

嘉定縣續志卷之五

議

勸民十則約言

聞在上



人性本善而習染遷流故有善惡之殊必上之人
有以化導之而後可使同歸於善不至流入於不
善其所以化導之者又豈徒政刑督責之謂哉我
皇上聖諭十六條昭示天下欲使人皆好善而去惡
誠堯舜禹湯文武尚德緩刑之至意也

在上奉

命治嚮無政績可紀而愛民一念無間寢夢業經恭



刻

上諭傳勸通邑又於各鄉約所延集耆碩朔望講解
不懈矣猶恐

綸綍王言一時未能家傳戶曉正在圖維適奉

督憲大部院于

頒發勸戒錄要四卷

在上

盥沐

捧讀其間獎勸處使人欣慕遷善懲戒處使人凜
畏改過真言言寶筏字字金針非所謂現宰官身
而說法化人者耶亟欲翻梓淑世慮卷帙繁賸愚
民難以盡晰謹於集中恭譯

上諭及諸條內約蒐要旨簡輯大義爲勸民十則付
剞劂氏刊發萬戶朝暮省視時刻講究父教其子
兄勸其弟夫訓其妻朋友各相勸勉大家痛革前
非同心向化以期不負

聖恩之浩蕩

憲慈之篤摯苟或誨爾諄諄聽我藐藐則仍有督
責之法在

一敦孝弟

十月懷胎三年乳哺父母罔極之恩也同氣連

枝孔懷旣翁兄弟手足之誼也生事葬祭友于尊親宜各盡其理苟愛敬有虧卽爲名教罪人宗族鄉黨皆賤之矣後來子弟看了樣子能保其不悖逆相仍乎至于本族同支自祖宗視之猶是一身血脉皆當推愛致禮和好周援卽祖宗父母在泉臺亦無遺憾矣

一戒許訟

一朝之忿忘身及親終訟之殃破家蕩產嘉俗素喜刁告每恃訟師刀筆硬証扛幫睚眦小隙

輒駕重大題目止圖准不圖審不知此輩積棍只要于中取利那顧你生死成敗本縣深憫無知間准一二凡經審斷每多斥逐不忍加以反坐之條今勸爾民苟非難解之仇竟憑親友調處或自恤財忍耐毋事輕於構釁自貽伊戚

一完錢糧

踐土食毛無非臣民夏稅秋糧總屬國課試看完糧百姓歲時伏臘室家歡聚卽睡夢裏無非安吉景象若頑梗拖欠雖祁寒酷暑難免守候

比責之苦更有一種包排蠹歎收侵甲戶錢糧
浪費恣用及至水落石出仍要典揭借貸剜肉
醫瘡何自苦乃爾勸各糧排好義急公更慎重
親自輸納勿輕入他人之手庶免身家顛躋之
累

一務本業

士農工商各有專業經營力作必至成家此有
恒產者必有恒心也若男不耕則無粟女不織
則無布無粟無布雖年豐而妻啼饑冬煖而子

號寒所不免矣一遇饑寒必入匪類卒至身不
能保豈非失業之害哉勸爾四民各守本分各
安生理勿見異而作輟勿游惰以貪閒

一教子孫

人當幼年正可與爲善亦可與爲惡之時必使
之讀書明理涵養氣質上可以揚名顯親中可
以成人立品若棄而不教致匪人爲伍或聽其
學習拳棍或聽其串戲唱曲等之敗名喪節辱
身賤行人亦何樂乎有賢父兄哉况本縣勉力

捐貲于南園設立義學延請名師生員王昇開
館授業凡閭閻無力延師者其各率子弟來學
毋致失教以自暴棄其子孫

一睦鄉里

鄉黨爲父兄宗族之所在故里仁爲美洽比其
隣聖人亦慎重之雖有至親好友住居遼濶何
如同里之人出入相友朝夕相親或疾病急難
或火災盜竊可以聲息相通救援立至故必式
好無尤禮讓往來彼此便益若恃氣壓衆傲物

凌人雖比戶稠密猶之離羣索居而已豈不可
危豈不可戒

一禁節儉

吳郡向尚奢靡膠民獨稱素朴自明季以來漸
染日久近亦競習浮夸一裘之美足當窮漢數
年之衣一席之豐可抵中人十家之產至於慶
燈節鬧龍舟迎神賽會浪用無窮豈知家無金
穴費如漏卮縱盈千累百亦立盡之數迨至室
如懸磬饑寒疊至悔何及矣今勸爾民黜浮華

敦儉朴衣服不論縕袍着煖便好飯食不論藜藿喫飽便好且惜福多福受用更自不淺

一斷嫖賭

皓齒蛾眉伐性之斧樗蒲陸博喪家之具人一入於嫖未有不身染惡疾蕩產而喪命者一流於賭未有不心惑意迷壞品而敗家者故卑田乞院卽風流子弟之下稍穿窬綠林爲一擲千金之結果嫖賭之爲害烈矣我勸爾民糟糠荆布可以好合終年辛苦經營可以溫飽沒世慎

毋再事嫖賭

一戒打降

人果膂力剛勇武藝精通上可以武科出身下可以營伍効用奈何習拳勇一途自詡爲打降頭目原其初或學爲護身之符或喜爲好勝之技迨至黨類旣多漸漸猖獗姦淫搶詐流毒地方然迴看歷年以來打降之最著名者有一人得善終否今奉

督撫

各憲擒創一二人猶恐未盡遷改合再勸諭務

各醒悟翻然改惡毅然從善毋蹈積惡滅身之
報

一廣行善
今生富貴者壽從前世積德行仁中來今生貧
賤天殤從前世殺生害命中來報應之理纖毫
不爽要知不爲惡便是善苟爲善便是福卽勸
戒錄之備載者如感應篇之當持也功過格之
當記也字紙之當惜宰殺牛犬之當戒也總之
十二時中稍一心閒便將諸惡莫作衆善奉行

二句提醒而已

嘉邑加增錢糧議

聞在上

從來則壤定賦自唐虞三代以迄今茲普天率土爲
王民則輸公賦此上下一定之分而亦理勢之自然
也顧田有上中下而賦因有重輕國家遇大兵大役
常賦不足以供勢必出於加賦從賦之輕者而稍加
焉則輕者稍重矣從賦之重者而稍加焉則重者更
重矣况一加再加而更有他邑所無一邑獨加之事
則重者不勝其重而民困爲已極矣嘉邑濱海地高

早不宜禾而止栽木棉明季未折漕以前百姓逃亾
一邑幾成廢墟自永折而民始安其居樂其業於一
郡八屬中稍稱寧阜而今日又非其舊矣自鼎革以
來屢遇軍興難免加賦現今錢糧較之明季萬曆年
間已加增至數萬就數萬中則官布與加漕二項已
居十之五六然官布之徵猶曰此舊欵項也加至二
萬八千之數是從少而加多也若加漕則非舊欵項
也忽有二萬六千餘之數是從無而忽有也民力幾
何其能堪此

在上初奉

命蒞此土卽怒焉傷之其事始於省衛之蠹弁與本
邑之奸惡構挽而成今已爲不可解救之局上以之
催徵令以之徵解欲少一分不得欲緩一分不得也
聞明季折漕之時遇隣邑之賢相與本邑之賢紳昌
言同朝抗疏黼座故得救民於湯火今在上吏此土
目擊時艱雖抱痼瘵一體之戚力不能爲嘉民紓此
重困其惟彼都紳士致身通顯居侍從臺諫之列爲
六百里桑梓請命一旦奉
俞旨而蘇積困是則下吏與小民同額手稱慶者也

六國... 卷之五



言同博... 命... 傳...

傳

朱君平先生家傳

黃淳耀

友人朱行節兄弟既葬其父君平先生復集夫先生之行事以求能為文辭者而傳之其言曰世之為人子者莫不欲傳其親顧親不可以飾而傳譬諸繪親之像朝夕事之像與親有毫髮不似即子之心不安獨于吾親之行有不及者而為虛美以飾之則是以不似吾親者為安也珩之述吾親也惟其似之而已余聞而避之為掇其大略作朱君平家傳先生名邦

治字士偉號君平嘉定之羅溪里人父懷萱生五子先生其次也幼出爲叔父思萱後敏而好學宿儒沈玉林號爲能抗師法從遊者常數十人先生年十二爲入室弟子弱冠補學官弟子員往來婁東鹿城梁溪之間一時賢士大夫皆自以爲不及常深入七十二峯雪月之夕正襟危坐山中人望而異焉于書博覽強記尤精春秋內外傳莊列班馬諸書解剝脉理分判節度每纏纏爲人道之獨不喜爲章句之學屢試京兆不第意泊如也姚江朱憲副少與先生同學

先生弟畜之旣貴延致先生于官所嘗誤論一死囚先生適見案牘爲指示失入處憲副大驚立出之先生終不告所出者以故惟舉以戒子弟曰人命至重爾曹他日居官慎不可忽其爲德于陰皆此類也事所後父母本生父母皆竭力孝道葬祭儀節一准朱子家禮遇諸弟有恩見人有急如赴焚溺未嘗以力不足爲辭晚年誤爲邑令所銜欲中以危法摺摭無所得乃榜諸衢曰訟朱生者投牒過三日竟不得一牒令慚且悟曰朱生善士也待之加禮焉卒時年六

十七先生爲人莊敬樂易雖盛夏見所狎客未嘗裸袒子弟有忤旨者微示以意悔謝卽止人方之萬石君也

贊曰今世所號爲傳人率指仕宦有聲績及繡其輦悅以爲文辭者宜先生之名不出于邑也然史稱黃叔度比于顏子而言論風旨無傳聞僅取荀淑郭泰諸人推許之言以爲徵驗而已夫宗族鄉黨兄弟朋友之間孔子之所以取士也若先生者孔子之所謂士矣哉

黃烈婦傳

張錫眉

嗟夫子死孝臣死忠性也分也義也烈婦死節性同也分同也義同也當其義可以死而死不可以不死而必死性之盡也分定故也然其人其事有不必傳而傳有不可以不傳而不傳者誰之責也知之者之責也余生于上洋籍于嘉定因往來于申江之上知有所謂黃烈婦者迄今乙酉蓋已二十有五年矣自維落魄無狀不能振暴之每用耿耿昨歲三月十九以來痛聞京師之變君后死社稷在朝士大夫死國

難者不乏其人然有義當必死而不能死者亦正不少余蓋不能無慨于烈婦之死之決也烈婦殷氏膠邑申江東里人年甫及笄適黃隆生一子而殤歲餘隆亦死姑憐婦少艱于苦節欲令改嫁強之再氏弗從姑乃陰受人聘娶者且有期姑復好語勸令母自苦氏度姑意不可回恐倉猝逼嫁佯諾姑命請立後併請邀母氏一別迨母至具酒食哭拜于隆之靈請入房易裝服姑信之不復他慮良久不出且聞礫礫有聲姑與母驚啓戶入見氏倚床柱一手扼吭一手

尚握刀而頭已向後倒裂矣矢志堅而致力甚創深脰絕抑何烈哉士君子讀書明大義見危致命者蓋亦難之氏農家女未嫻禮教乃能從容審義而勇決畢命不更偉于士大夫之死忠死孝者耶是真可以師世範俗而知之不爲傳之又誰之咎也余是以告之吾友黃進士淳耀已爲立傳淳耀之文傳烈婦傳矣抑念烈婦之死且二十五年余先知之而不爲一言以紀其實以待後日之採風者彰之國書登之俎豆竊有歆然者今二月十二日爲具束芻絮酒拜烈

婦之靈于荒涼廣莫之野并爲之述其大略如左

創縣高公忠孝世家傳

許自俊

古三代以前皆封建郡縣世相傳守大國子姓瓜分派演或以官爲氏或以封邑爲姓或以孟仲伯季爲系如古豢龍氏烈山氏緡雲氏之類是以官爲氏也若有邵有娥有莘若虞芮妘媯之類是以地爲氏也至羲仲和仲伯益伯鯀及魯三家之類皆以孟仲伯季爲系也迨周末大國吞併皆以其國爲隸縣縣之有正不獨自秦始也列國之功臣貴主各世相襲以

生食采歿享祀於其中漢以後乃以縣爲傳舍而其有大功德於民者爲祠祭延及千百年而後裔徃徃有居其地者如晉祁狐樂范齊崔鮑高田俱歷數傳而瓜隄之宗綿綿不絕故曰兩漢之興牧守有子孫焉誠以從化畏神動稱百年也高公衍孫實造嘉邑宋嘉定間當軸以蘇郡財賦重地崑山東境爲逋逃藪僻壤不治非建城湟設官吏則千里棄爲甌脫上可其奏乃簡非常之才以任之公首吏茲土斬狐狸荆棘繕城郭宮室櫛風沐雨上下川原三年民乃成

都成邑爲朝廷闢一外府昔公劉遷邠文翁荆蜀當
不過是公以勞瘁致官士民不忍公去遂家焉歿而
祭之於豆於登子子孫孫勿替引之一再傳而了堂
公以純孝爲名僧肇膺帝錫瀧宮梵刹如圓通皇覺
歸然爲震旦檀林歷劫不毀數傳而儀部克容公聰
修禮明樂鼓吹休明又數傳而掌苑竹深公整披鱗
伏闕賜環萬里自宋而元自元而明鼎鼎百千禩而
畸人大士孝子忠臣不絕如縷天之報施勞臣何如
哉讀歷代前賢之銘記及今國師平陽上人之列

傳竊嘆公之無成方終善建不拔也夫葛藟能庇尚
思成季之勲衣冠可矜猶念叔敖之鬼况春草黃鸝
祠堂不改山農麥飯伏臘如初乃信公之明德遠矣
夫古之報公者金章鐵券帶河礪山非不赫奕然絳
灌鄼魏誅削相踵甚而遺笏空傳悵昭陽之日影舊
巢不守作岐路之王孫豈盡國恩之薄亦由福祚之
衰孰與曇花四照永奠法輪華黍三章久鐫珉碣哉
只今承孫必登奕世儒宗傳燈白馬關門吏隱候氣
青牛繩繩之孝嗣坦坦之幽人也世變而道不變其

此之謂歟

贊曰嗚呼作邑安民之功大矣哉惟彼元長肇基崑
陽手剪荆棘身奠巖疆嚶城戕戕練水湯湯萬家烟
火澤及牛羊清風蕪縣明月桐鄉畏神從化俎豆馨
香子孫繩繩居於是邦道超三乘挺身了堂巍然名
刹爲魯靈光惟竹深公能以醫諫搜鱗披吮絕鞞補
牘九死不忘惟忠與孝精爽房皇五世之廟久而彌
芳雲初必登恪守青箱鳳占叶吉其後必昌嗚呼作
邑安民之功大矣哉

笑隱先生小傳

許自俊

笑翁陳姓拱辰名字叔明別號笑隱祖居吳郡閱閱
名家乃祖僑於嚶博及羣書嗜耽泉石拙于媚世雖
家累萬金寧爲父兄蕩盡並不介意爲歸司寇門壻
亦不藉其給援承先業分財讓產不存一椽一石無
怨性孤傲而剛不近榮利不交時貴終身不言貧與
人交終身不改萬里相思所好種名花啜佳茗畜異
書見畸人白日焚香清宵說劍一壺一味一琴一爐
自斟自飲自歌自笑每讀書至慷慨激烈處則嘖然

長笑遇不平則笑遇不堪遇不屑則笑曰人生斯世
哭不得許多則笑耳足不履侯門刺不及軒冕曰他
耳中無我我眼內無他又復大笑當事名賢兩舉鄉
飲不赴蹇蹇然獨葬其親獨復其居教二子以孝弟
授經于余與愚父子交四十餘年如一日從不齒及
俗事謀及生理世將亂與先子及趙甜老唐辨老載
酒挈榼痛飲墟墓徘徊于高楊深竹之間日出而出
月出而返留連三閱月而兵起偕避劫九峰三泖中
大定後春燕歸巢杜門遠害及先子捐館撫棺慟哭
每歲朝良節見先子像未嘗不泣下沾巾生相好死
相思無如吾兩家耳洎余庚戌登第翁不喜庚申令
晉翁又不悅憶別時翁執手送之河干泫然曰子速
歸莫負青山與歲寒老友舉杯相笑及余歸不聞翁
笑矣豈不痛哉爲之小傳

郁孝子傳

錢顧琛

自側陋升聞而後三代以下無不首敦孝行凡荒郊
僻壤編戶寒門每生孝子采風者書之於史所以教
有親也故兩漢賢公卿獎勵末俗必先孝行如茅容

皮上之雞陸績懷中之橘郭太袁公輩教以問學而
推爲名士吾郡嘉邑人崇古誼余居文季兄家見潛
壺許先生言比鄰郁氏之事親有古孝子之行焉孝
子名所學字無文天性醇篤家素寒儉少時父病危
巫醫罔效泣告其母欲割股飼之母持之不克乃請
減算以代父獲痊而母病復作同婦陳侍奉湯藥衣
不解帶者數月父母相繼而歿哀毀骨立勺水不入
口寢塊柩傍三年未嘗見齒盡禮盡哀人以爲有東
海少連之風同胞四人不忍分荆相聚白首滄桑變

易城被兵燹危在旦夕使其兄先逸而已居守然亦
不及於難業師沈文學貧老無歸奉父命爲之生養
死葬邑多名儒如徐汝廉妻子柔趙以調諸君子皆
遊其門以受業博涉經史卒不獲青其衿乃從事曹
掾值歲大飢道殣相望散其廩粟減值予民里中全
活者無算後又歲稔勸賑樂輸煮糜拯飢邑宰旌之
民苦雜派供億有水脚官布加派等項動浮及萬孝
子爲之倡首呼籲憲府每年減去若干緡合邑賴之
嗟乎世固有肉食軒冕不克爲民請旦夕之命獨布

嘉慶縣志 卷之五
衣之士沉伏幽潛建豎名節若仲連太丘其人者豈
可多得哉此其孝合於經式於禮義有心名教者樂
得而稱道之易云積善之家必餘慶長子永年與
其弟永昌皆邑庠生其事親也養志生前承歡膝下
侍疾傾財以供參餌居喪哭踊茹蔬寢處柩堂其純
孝一如其父至於延名師教子姪八人皆爲博士弟
子所稱善繼善述者非耶詩云孝子不匱永錫爾類
其斯之謂與於是爲之傳

顧香王小傳

汪价

顧荃字香王居膠之南里善詩古文辭尤長於賦所
製時義微有雲霧之色不逮也家貧至無壁可立學
爲減食之法一日一舉火減至二日三日得一飽餓
而讀讀而不知其餓室人謫之鄉里之人笑之性介
特落落不合於人不能就館穀不能突梯貴人之門
獨與三儂老人汪价善時過半舫讀架上書出所爲
文相質求示以古文真訣至日晡不能去凡十應童
子試府縣輒冠軍一見督學使卽黜落以故年四十
八不得青其衿丙午冬將盡閉戶守餓絕爨者四日

嘉定縣志 卷之五
因自求死勅家人勿告之人人有知之者饋之粟令
家人自飯僵臥於地噤其口不飲不食餓十五日不
死忽有人傳言府檄至於月朔日試童子矣荃聞之
躍而起曰吾自分必死此債未償姑忍之於是復強
飯苟活窮晝夜揣摩以期必售徒步走澄江應道試
次日卽案發所舉十五人皆勢家子荃名又落時正
午日與其友同登黃山至絕頂大呼曰今日得從三
閭遊真死矣奮身而投諸江其友挽其衣急抱持之
得不死載之歸病心三月而殂臨歿語其壻楊生日

今去再五六年又讀書矣吾有何恨苟有殯者以破
琴遺書爲殉不然卽以土埋我不須棺也嗚呼天下
無不死人有所溺焉而死其人爲可哀如石崇之死
財梁冀之死權劉伶之死酒荀奉倩之死色李賀之
死詩倪瓚之死潔徐渭之死妒沈承之死不第皆溺
之尤焉者也今荃以不與童子科而死尚忍言哉尚
忍言哉

槎上陸母金節婦傳

闕 選

爲人臣而以忠著爲人婦而以節稱皆人生之大不

幸也而後之人每每稱述之必肅然起敬愾慕焉而不能已已者何也蓋宇宙間惟忠孝節義之骨之力有以撐之不然天柱折地維絕矣夫臣以忠死婦以節生死或憤激於一時生則痛酸於沒世死固難生爲尤難也生之難不難於忍死而難於撫孤撫孤而成則夫不虛死而已不虛生下宮之難存趙氏孤兒程嬰之所以難於杵臼也槎溪節婦金氏者一泉公之女生而柔淑婉嫵一泉公絕憐愛之必欲擇名家子爲之配乃歸於平原春園公之長子視祥公諱履

泰視祥公魁英人傑耑肆力於學圃方舞象而歌采芹以軀偉氣庭遂成羸疾氏調湯餌晝夜起居未始交睫卒不起爲之擗踊設血一慟而絕衆救甦之奉舅姑命忍死以撫五歲孤兒培遠寒檠冷月破壁淒風守靈幃而鞠孱子蓋已歷盡艱辛腸爲寸裂矣迨培遠稍長出就外傳因切誠之曰人不澤以詩書之氣行尸坐肉耳爾父架有遺書其誦習之無怠培遠謹受教矻首窮經不移寸晷未嘗荒於嬉也又切誠之曰學者以治生爲急富厚則禮義足貧窮則親戚

離爾當締思式廓有先王父之素業可光而復也轉
輸泉貨阜積川流家寢以昌人第知陸伯子之名顯
聞于當世詎知織悉縉等皆運籌于闔內不以妨其子
春秋絃誦也迨培遠遊於庠名聲籍甚二孫廷璨廷珂
皆圭璋令器迅發文葩氏又命其子經營窀穸奉春
園公爲主穴而視祥公祔焉生安死慰節婦五十載
飲冰茹蘖可以無憾也矣邑人士以其節鳴之有司
而上其事於大府氏屬其子謝之曰未亾人不卽從
泉下遊視息人間凡爲此藐諸孤耳今旣成立我志

已酬何敢忝竊旌閭之典康熙庚申巡撫慕公彙題
請卹奉

盲依議特旌於癸亥給銀建坊里人過而嘆羨曰烏頭
綽楔雲表崔嵬誠女師之休烈而槎里之榮觀也假
使節婦於夫君易簣憤激一時輕生從死亦誰爲保
抱其子俾之名成行立而身膺 寵命以流芳於奕
世乎余故曰寡婦不難於忍死而難於撫孤也遂據
其實而爲之傳

平原賢母瞿氏傳

朱元裕

余讀史至永嘉之末石勒兵起鄧攸挈家而逃以其弟早亡特全其姪繫其子於樹而去每嘆以爲此人情之所難然亦丈夫峻厲風節者之所優爲也後又於巾幗中而得二人焉一爲羊祜之母祜前母生子發祜同母兄承一時俱病祜母度難兩全專心養發一爲濟源康孝女父老而無子旣擇壻女勸父買妾生子乏乳時女亦生女遂舍已女而乳其弟此二人者竊以爲千秋絕軌必無有起而踵其後者乃今於邑之黃潼港而得一人焉曰陸母瞿氏氏爲心疇姪

孫女甫七齡而喪父母女相依祖欲奪其母志氏引刀刺胸血流濺地祖爲感泣而止母節得全長歸於陸門叔子君俊時姑已沒翁患痿痺之疾臥蓐七載氏爲異糞宿肉以奉之疾甚嘗藥割股殫竭血腑嘗語其妯娌曰我幼而失怙不能事父翁卽吾父也敢稍懈乎生三女一男猶懼子嗣之不繁勸其夫置婢未幾舉一男已亦產一女婢病劇絕乳氏乃溺已女而哺婢之子戚里皆駭異之氏顧其子若女而泣曰我豈忍自戕其所生哉我之爲此者凡爲陸氏宗祧

計也於是撫惜如珍飲食教誨不啻已出復勅其子
悉以祖遺之產歸之無侵及焉夫妒者婦人之常事
也小星在御其不禁之當夕者亦云僅矣况肯憫其
疾而收其子且至自溺其所生而育成之者乎若瞿
氏者誠可與昔之羊母康女千載爭光而艷傳史策
也矣氏之子時瀉字文雲與余對宇而居交最暱故
得熟聞其母之懿行平園周先生與其兄郭亭皆有
載記而屬余爲傳以詳著之文雲篤行之士吉祥善
事靡不力行造應龍之石梁建天妃之古廟以高橋
一鎮孤懸海外捐貲置船創爲義渡以利往來又倡
率捐田取租以充渡夫工食及每年修艫之費其田
糧公議八扇糧排均收充納歷奉憲獎勒石永垂文
雲特精地理於以廣孝亦仁術之一端也君子曰平
原氏累世行仁有是母因有是子故例得并書

序

送陸父母稼書公歸詩集序

吳康侯

當湖陸稼書先生令吾嚠二載解綬歸里嚠人送之以詩遠近屬而和之公歸集者爲公志喜也公之來兮嚠人喜也公之歸兮嚠人悲也余曰母悲爲公喜也韓退之有言中世士大夫以官爲家罷則無所於歸公今日者淵明之菊依然季鷹之鱸無恙我爲公喜也嚠之人母悲也世之人以一第爲榮一官爲重得則喜失則悲失之而得則又喜歐陽永叔云富貴



而歸故鄉此人情之所榮而今昔之所同也嗟乎哉
此俗情也吾公學道君子也一第一官一得一失於
本來面目何損何加何悲何喜也公歸矣嚶之民兮
瞻望弗及慨其嘆矣乃公則南山之南衡門高臥滄
浪水上西塞山前綠蓑青笠烟水微茫濯纓長嘯扁
舟訪之已雲深不知處矣讀是集者聊當梁父之吟
勿作渭城之唱也

送余遜菴大尹歸武林序

汪价

余從事邑乘論次邑之賢有司其爲思其人愛其樹
建祠立碣而長子孫於吾土者有二一爲宋之高公
衍孫公爲置邑首令五鄉獷悍之民感浹仁風罔不
革面後以勞邁疾請告百姓擁馬首不得行遂卜治
左之拱星坊創宅家焉一爲明之練公達視事甫三
月有惠聲以叔父子寧就法知不免一夕載妻子赴
海死有妾黃氏方娠公曾活寃民郭元宗元宗奉黃
氏歸生男念其父爲邑侯而邑名練川乃託侯姓而
名居練其家遂世於嘉二公之後雖不甚顯然其子
姓之賢者猶能奉揚先德綿綿勿絕也我遜菴余公

尹我邑以調元贊化之才小試百里執巨憝而殲之
是以無莠民遇大殺而廩之是以無餓人臚積逋而
蠲之至十萬有奇是以無逃丁絕戶治燬於盜城躡
於兵聖宮戕於風雨公竭厥力鳩工庀財以新之是
以無頽垣敗宇公之視其邑如比閭也視其民如嬰
孺也視其邑之大夫士如主伯亞旅聚處一家也膏
澤淪濡政教翔洽邑人士輒相祝曰安得公之長宰
吾邑以怙冒我不然且得著爲嚆籍如宋之高公者
宅厥井里俾我子孫世世相親附也太夫人於丁未

春罹病百姓爲之祀神祈福不幸大故奔控憲府題
留得以在任守制人皆慰悅已酉之歲江南有司以
那用公帑部議奪職者數十人而公亦與焉一時人
情惶駭如失乳之嬰兒有非攀轅截鐙所得而喻焉
者城鄉士民俱以祠祀公其在南里者爲貽清講院
公謝事棲止其中公事未了留滯吾邑者幾二十年
此二十年之內與邑之大夫士往來晨夕其爲里黨
族屬慶吊問遺無不通也其爲賓朋燕饗樽俎獻酬
無不與也其爲春社冬蜡迎時餞歲無不集也其爲

月地花階聯吟飛竿無不同也。里有善事公必爲之。獎成。里有爭端公必爲之調解。里有禍患公必爲之營救。人之視公與公之自視幾忘其爲嚠令而直以爲嚠之人者。此誠衣冠之盛事而史策之美談也。壬戌之歲。墨誤大白。行將還公職。平躋清塗。以抒公未竟之業。今且挈其家衆。負擔而歸武林。一時人情又復惶駭如失乳之嬰兒。有非攀轅截鐙所得而喻焉。者公之居我嚠客也。而邑人士之別公者。反若指異域而啓行。公之往武林歸也。而公之別邑人士者。反若離故鄉而遠邁。此雖情之維摯。至於斯極。然亦有天作之緣。不可強也。吾邑人士攜樽酒而祖之西郊。相與泫然而不能飲也。有一父老從傍解之曰。嚠之去武林。僅隔一衣帶水。榜人信宿可溯而從也。非若秦山楚水之阻以長也。願我侯之與諸公。忍淚而飲此酒也。乃相與歌九戩之詩曰。是以有袞衣兮。無以我公歸兮。無使我心悲兮。

職方殷公鄉賢錄序

許自俊

魯論紀五臣十亂孔子曰才難不其然乎近代慶曆

十才子名滿天下吾邑職方殷無美先生是其一也
蓋以文章聲氣黼黻太平皆極一時之所推重者而
瑯琊麟鳳獨標元美謝茂秦未嘗貴顯亦得並駕曹
劉則信乎盛名之不易居矣予自幼喜讀先生之詩
文鏘刻鍛鍊而不碍其達震蕩發皇而不傷其雅乃
歎爲天才高妙者有如此抑不知先生之操履端潔
學識宏深也及其十年鄉進士六年夔陵州三年職
方郎又九年鄉先生而處官大節則有王文肅公所
爲墓表極詳唐叔達先生志銘又可歷考其生平出
處行誼而先生之心術事功當復與海內共見之何
獨鄉賢之舉尚虛祀典乎夫律身廉者謀國必忠謀
國忠者利物必廣先生性故以廉自喜居熱官不榜
門謝餽餽捆載至門亦捆載還耳罷歸後敝廬瘠田
至妻子不能葬而老友醵錢葬之此其廉也何如予
且勿復道其吏治籌邊諸事而在鄉言鄉則若先生
之請除金花督官至今郡邑無擾萬曆二十一年本
邑漕事草疏永折又于二十七年力止兌單挽回復
折者皆爲有關國計功留桑梓之大端故知先生之

學實有經濟而先生之才深係安危不特文章餘事也然而折漕諸先賢向有專祠以志合邑報功之意又皆先後崇祀鄉賢用享春秋俎豆惟先生名德久湮盛典未光今之鄉大夫士庶始得請于黌官尸視之焉夫亦想當年漕兌流亾之苦幾成廢縣而無家茲且安堵樂郊莫非殷公兩局焦勞之力不禁其歌呼感動仰顙追從可謂不忘本矣於戲先生在數十年之上猶能令後世興思若此豈非其利物廣而遺澤遠哉是舉成于戊午之歲予適應

詔入都不獲趨踰於諸君子之後今先生之孫湜以此編示予予因序之以見百世猶存之舊德及一邑難泯之公心有餘思也夫

晉昌孝子舐髻復明序

許自俊

自古鄉舉里選以三物六行賓興萬民而六行之中孝居其首蓋孝固庸德亦絕德也何者人盡子也凡屬子職所當爲卽皆子道所宜盡初未嘗有詭異難能之事然而屈指古今數千百年來其得爲孝者上之止有大舜武周曾閔次亦不過薛包仇香毛義王

祥符表孟宗楊引羅威以迄劉殷程表師何潛粹宗
思禮輩諸人而已其他則歷稽史策遍閱當世而寥
寥不可多覲斯以知孝也者必自有其孝之之實固
非徒事乎名塗飾耳目已也吾膠雖稱僻壤而曩時
俗尚醇朴忠孝節烈代不乏人凡載之邑乘者類皆
事取其確文核其常人擇其可法而可傳以故毀譽
公而人心猶爲近古迨至今日世風日漓每務虛聲
而不敦實行重勢利而不顧是非上行下效靡然成
習儘有再醮之婦濫稱爲節悖逆之子冒舉爲孝而

真節真孝反湮沒而不彰者比比也嗚呼時事至此
尚可言哉雖然人亦患不能學聖賢耳設果有聖賢
之至德懿行而謂不足以動閭閻風天下者吾未之
見也里中有唐子亮采性既純孝而又能效法聖賢
之所爲母目雙瞽每日焚香籲天願以身代遂感異
夢而朝夕舐之頓使目開復明一時莫不歎異以爲
精誠所格夫以唐子如是其孝卽方諸古人之舐目
療親若李虛已閻元明者何多遜焉唐子盡孝未嘗
求爲人知乃隣里鄉黨稱道勿絕今且士林美之薦

紳誦之賢邑宰與臬憲皆給扁額以旌之咏歌傳紀
投贈充棟余時從友人所得一披讀見夫或長篇或
短句炳炳琅琅罔不激賞藉非孝德克彰人亦何獨
於唐子愛慕之若是吾於是知實之至者名終不得
而掩而三代之直道猶在人心而未盡泯也予交唐
子甚久而知其事甚詳且以其有裨名教是用弗揣
固陋聊誌大略以備採風者之所掇拾若夫表章揚
勵發潛闡幽則自有當宁之褒典諸君子之詩文
在余又何容贅一詞

孫中丞文集序

徐時勉

余友孫火東中丞之沒幾三十年于此矣國變以來
史筆未定公之精誠紆軫宛結當與陰雷曠風並存
宇宙固不屑以生前緒言與天下文人墨士爭勝于
名山國門之間雖然當城邑殘破兵戈掃室藏書之
家卷帙狼籍道路已散爲烟塵灰燼而公之遺文無
恙豈非珠光劍氣不沒于蠹紙淪墨有神物訶護者
耶歐陽子之贈徐無黨者曰修于身矣不施于事可
也施于事矣不見于言可也蓋歐陽子好爲文且見

天下好名者耗磨其精華果銳于無用之辭章故爲是言而豈以概天下之文哉夫文章流別不可指數其無用者無論朝華夕秀過眼烟雲于世何濟至于挾摘陰陽表章六籍高者無異空谷尋聲卑者不塵羹塗飯亦未必有關實用惟是上下古今治亂清濁之源闡發忠臣義士姦宄僉邪之辨可以主張世道扶濟生民垂戒于無斁而况身當軍國重寄安危戰守决機應變事關呼吸如公所任之不易不可觀望委避而不言者乎又况君門萬里事不可以一手

成身不可以一死塞如公所遭之不幸不能隱忍誤國而不言者乎予竊悲公忘身爲國之忠旣不可以戶說而經營遼事者多著於闔外而沒於朝內畢力于一人而齟齬于衆口衆手猶幸其遺文尚在可以因其言而思其事因其事而思其身之所處也憶昔當東事初起時孝廉上公車者多聞風南下視公請纓出關真有樂死惡生之笑經營十載變起倉猝公求死不得而自歸于司敗旁觀者又執繩墨以議其後其于遼左情形旣非克知灼見而邊臣違合之故

朝臣思成樂敗之私是非倒持功罪凌奪皆置不道
千載而下安所傳信公之文其可少哉蓋公之文非
詞章之文而經濟之文也非口談經濟之文而目見
之足踐之手畫之金城方略聚米山川之文也其可
以告無罪于先王推赤心于萬世者也其言在卽其
事在其事在卽其身在此而謂不見于言可乎其言之
見於雜著者十之二見于職方者十之三見于遼事
者十之五予之所述舉其大者而已舉其身名所係
不致顛倒溺没于青史者而已公三子和鼎和斗和

京更代左右于行伍鈴柝之間共相區畫故于其文
叙次無訛檢括不漏及公沒後和鼎和斗又以十年
飲血之痛勾稽餘剩蒐集散逸發明當日成敗利鈍
朝臣邊臣掣肘誤國之故故于遼事獨詳而公所以
竭志畢命于遼事者亦若燭照而數計至于務兼六
職事係九邊驅馳中外言有相關者何一非本諸閱
歷饒刻腸胃以出而可以詞章兩字概之乎其他表
啓全法歐蘇序記極似考工論事如陳同甫則又辭
章之爲見而公所爲不足言者和鼎和斗皆從子

遊以予與公相知最深不以予之無文而屬之爲序
逾年不敢下手所不敢辭者與天下後世不以文視
火東之文而已其平生志業氣節詳于和鼎所誌紀
事而公之壻侯硯德狀之同邑黃陶菴記之鹿城歸
元恭又傳之皆可以採補國史予無容更贅至于公
之著述不一而所註離騷周禮及幾何算法等書則
又其忠孝至性及經濟根本所在亦當使天下見之

蠲荒錄序

朱元裕

今夫國之所重者惟民民之所輸者惟賦有民斯有
賦而賦累則民貧民貧則賦益累必至之勢耳余筮
仕得蒲蒲固賦累民貧之區也其地僻處西陲邪附
萬山之足城如彈丸田皆石鹵兼多虎狼出没人稱
畏途余自九月蒞任時值積雨破壁頽垣一望蕭條
人星烟火杳不可得爲之按籍則丁散戶亾矣核課
則地荒糧欠矣周眎郊原荆蕪滿目間有土堽穴處
之民類俱鶉衣鵠面日採苦蕪療饑及奉檄催科惟
見盈庭環泣嗚呼蒲民何一困至此哉余承乏斯吏
敢不博詢其所苦狀而若浮糧一節特其尤者蒲有

荒地無隱地有包糧無匿糧今不與拯焚而轉爲擠
溺譬諸人得疴羸之症元氣允耗又加以無名疽瘡
將一潰不復起吁可哀矣余安忍矚嚙不吐疾眎蒲
民之死耶爰是誓諸 明神矢諸闔邑士庶不憚剪
棘履畝以清勘也不辭枯淚灑血以力籲也始自己
未仲冬以迄辛酉之夏幾越三載其間具詳者八駁
訊者七造冊出結者二踏丈者三司道府廳轉詳者
九撫院總憲大部
題請議覆者六然後特奉

俞旨此糧得豁噫難矣幸矣余乃進蒲民而告之曰
此

朝廷覃被之恩也此各憲非常之惠也此爾士民無
望之福也獨余不敏不能爲公家集流移闢藜莽而
徒請除額賦上損天庾罪奚辭耶雖然民瘼固

國本攸關一方亦

九重所注近如雲中饑饉屢發帑金賑濟而歷歲積
逋並現年地丁房稅均賜蠲豁無非軫念民力長養
不盡仰見

聖天子子愛元元至意而親民若有司反如吳越人之視肥瘠余小臣所斷斷不敢出者矣况今日蒲之疾苦非止一症丁徭偏累故戶口日消流亾不歸故包賠株害衣食不足故士不興文教而民輕犯法凡此有得專之有司者有不得專之有司者余位卑力薄第盡其所可爲而以不得專者仍望諸朝廷解澤與各憲推恩保茲殘邑而已若從此類廣之則凡天下之疾苦如蒲者豈少哉余因感而敬志之

同善錄序

汪 价

先王制禮有四曰冠婚喪祭今世俗無論豐嗇必修享祀而冠禮幾廢而不行至若葬爲人道之終婚爲人道之始其禮尤重而其費爲尤難故有孝子而不能葬其親慈父而不能婚其子者比比然矣有仁人者起而飲助之以樂觀其成此甚盛德也吾友金子渭師爲子魚先生之孫每事皆繩祖武戊午年五十親朋醵金以壽渭師辭曰吾祖痛先人之不祿年七十而不受里人之祝我父母酷遭國變余苟活以延

先祀草土餘生敢當賀乎因貯之公橐用備周恤名
曰同善里中人死無以歛及築塘修路渭師皆出同
善銀以行善事一日浦子非瑕語及孫石甫先生爲
程孟陽先生愛婿與金氏三世通門至今暴露淺土
吾子獨無意乎渭師憮然曰是余之責也夫吾祖亦嘗
葬其先師徐公子小子敢忘家法卽出同善銀付其
長子夢吉爲窀穸之需而葬之孟陽夫人與孝直孝
朔之墓傍與外氏同阡陌其魂氣可相依也越明年
高師約非瑕輩及孟陽之曾孫于禮同往展墓歸享

餽餘于留光僧舍語次渭師曰于禮爲孝吉之孫孟
陽先生之玄孫也孝直孝朔俱無後而孝吉止此孤
孫松圓詩老其不絕者如綫耳于禮逾壯未婚萍梗
飄落虞山錢牧翁不惜重貲偵得以歸屬之吾邑張
子石先生而子石先生又屬之我其百年伉儷又余
之責也夫石父仲子若連爲武科而以貧死有女幼
而流落廝養于西關陸氏渭師念故人之女謀所以
贖之非瑕曰子以其財我以其力倘得贖歸卽以配
于禮可也夢吉以年齒恐不相侔渭師曰吾祖繼娶

嘉慶縣志 卷之五
吾王母張太夫人少吾祖者二十年克持家柄生吾
父與吾叔子姓繁昌今于禮與孫女適符其數誠良
匹也非瑕因竭蹶而歸其女渭師卽屬之執柯以婚
于禮嗟嗟吾邑所稱四先生者婁李二公之子皆死
于兵其後或微或絕獨唐氏之裔孫頗衆而亦未有
顯者孟陽宗人凋喪僅存一未室之笄鰥乃得渭師
爲之作配以綿其血食殆天之祐我詩人而不令爲
若敖之鬼也異日者于禮生子若孫寢昌以熾其無
忘金氏雲天之誼哉非瑕著之詩歌一時闕若韓吳

定遠徐誠公王翰臣諸先輩俱屬和之而予得爲之
序

資治通鑑補序

嚴衍

余年四十有一始得肆力于通鑑全書自是以來無
日不通鑑也怒而讀之躍然喜矣憂而讀之欣然樂
矣躁而讀之悠然恬矣寧有終日不食之時未有終
食不讀之時也客或問曰子何所爲而好之若是余
曰僕亦何所爲哉世嗜酒色者愈溺愈深浸淫成疾
而不知悔也余之于史亦若是則已矣然則能記誦

乎曰余資鈍不能記誦亦不求記誦也不能記誦又不求記誦則好之何益曰惡是何言也子見夫人于飲食朝而餐晝而饑矣晝而餐暮而饑矣夫豈以飽之旋饑而謂飲食之無益於人也然其爲益亦可得而言乎曰譬如飲水冷暖自知譬如食蜜其芳自喻吾亦何能語子雖然可得而舉似者大約有二一日尚論尚論者取古人言行謀爲而斷其成敗危者使平易者使傾此以古事質之古人也一日反觀反觀者取古人善惡是非而勘我得失見賢思齊見不賢

內省此以古事質之吾心也上下千古其人雖遠吾如登其堂焉吾如見其面焉吾如披其胸焉吾病愚則凡明者皆吾師也吾病怯則凡勇者皆吾師吾病懶則凡敏者皆吾師也吾病褊吾病吝吾病不斷吾病器小而易盈則凡廣大者好施者果毅而淵深不測者皆吾師也不然有人焉如吾愚如吾怯如吾懶如吾褊且吝如吾不斷如吾器小而易盈吾見其人如見吾焉一見而愧再見而悔三見而痛心切骨夜半長喟則亦吾師也故有時欣然解頤有時渥然汗

下有時頂門一針有時股後一策所以反覆纏綿暫
舍而不能也雖然書不讀不知其善書不熟讀寢處
而沈酣焉亦不知其病余于此書始讀之但覺宏深
廣肆如臨海望洋未能見其畔岸也再讀之始得窺
其堂奧窮其源委見去取之謹嚴義例之精密褒譏
得失以發後人之志考較同異以辯前人之非有如
范曄所謂體大而思精者既三讀之四讀之時覺百
中一漏全璧微瑕迺緝歷朝舊史而一一對勘之見
備者固十之七八遺者亦十之二三甚則前後不符

彼此相戾以至魚魯傳訛賢愚失實徃徃有之况通
鑑之作託始于三晉之濫封以正名分也漢魏之際
獨非名分攸關乎乃帝魏而黜漢至以諸葛入寇爲
辭蓋謂昭烈之于漢族屬疎遠不能稽其世次耳然
春陵非遠裔哉光武可以繼西京之統昭烈何不可
以續東洛之祧不惟此也周社雖亾秦命未集昭襄
雖強猶齊楚耳而遽以紀年朱溫毒浮于地敬瑄貽
殃萬民是梁晉之罪甚于黃巢世有魯連必當蹈海
矣而儼然帝之唐漢之興彼善于此然南唐西蜀華

姓棊分葬不兼夏難稱率土郭柴繼統其人華矣加
惠蒼黎其政善矣北略至關南侵及江其地廣矣要
之北漢未亾則亦猶之蜀漢也故周赧入秦七雄分
據改稱前列國唐昭隕洛五代迭興改稱後列國漢
呂唐武皆宇宙異常之變而大書紀年王莽之篡雖
黜其帝號而稱名亦猶大書紀年是皆以正朔歸之
也故二媪之紀皆稱附載王莽之紀年號細書此紫
陽氏筆削之旨亦不肖衍竊取之義也請更言其概
朝綱國政輯之每詳而家乘世譜輯之或略然略者

固略矣而詳者亦未必皆詳偉人宏議記之較備而
隻行微言記之或少然少者固少矣而備者亦未必
盡備事多提其大綱刪其節目乃節目過刪而大綱
亦或不明文多錄其體要剪其枝葉乃枝葉過剪而
體要亦多不暢至觀其所載之人顯榮者多而遺逸
則鮮矣方正者多而俠烈則鮮矣丈夫者多而婦女
則又鮮矣方內者多而方外者絕不及矣余以爲士
之窮通命也季孟居三卿之中別顏閔在徒步之列
顯者豈必盡足迷晦者豈必無可稱乎人雖微也道

則尊矣吾補之緩急亦人所時有士方在困厄得一
援手便可白骨生肉彼施施者乘堅策肥觀人入穴
而嬉笑自若獨有人焉奮義慷慨探沸湯而出燐雞
視彼無氣無骨者何天壤哉吾補之風咏遊女雅傷
棄婦聖人猶不盡刪况或以幽閒之姿樹淑慎之範
或以婉孌之質矢泉壤之誠誦其遺編聞其餘烈謂
不足以風乎吾補之道何往而不在如謂六經之外
無復妙理聖教之外無復異人則天地生物亦僅生
其大常無奇如水寒火熱木然石堅者而已矣何以

復生溫泉寒火不燼之木溫柔之玉也哉彼二氏之
祖盡性至命幾欲與尼父駮駕卽其後瑰奇卓越冲
虛恬澹之流亦足破醒迷情振起末俗吾補之溫公
又以爲子不語怪凡事涉神異悉刪而不取然怪之
興必有所由神降于莘石言于晉未必非有國者之
炯鑒故余亦間取其有關興廢者補之使學者欲考
興亾則觀政于朝欲知淳薄則觀風于野欲樹宏猷
則法古人之大節欲脩細行則拾往哲之餘芳論事
者因其大綱以詳其委曲談文者因其體要以擷其

菁華人無隱顯道隆者爲師行無奇平濟物者爲尚
丈夫而婦女可醜也婦女而丈夫可學也遊于方之
內者我觀其禮遊于方之外者我觀其意亦何人非
我師何事非我資哉若夫編年之書始于左氏紀傳
之體闢自馬遷二者異製而同功通鑑之編年亦已
踵左氏而大暢其風矣余又從十七史中節取古人
之遺芳逸美堪爲師法者或于其進身之始或于其
謝事之年薨卒之日略叙生平以倣子長之例使一
書之中而立傳編年其體兩備蓋始事于萬曆之乙

卯告成于崇禎之戊寅二十餘年之中精神無他用
也夏以油紙藉臂而書汗流自頂至踵不暇扇也冬
則硯凍未融必火烘日曷而書之不敢輟也余豈好
勞而爲此哉誠欲求爲君實之功臣耳尸子有云屠
人割肉則知牛少長弓人斃筋則知牛少長雕人裁
骨則知牛少長若以此問聖人聖人豈能知之夫聖
人之不知固不以是貶聖然豈可謂屠人弓人雕人
之知不足以補聖人所未及哉今使余與溫公比德
繫功與劉范諸君子程書較藝誠不敢望其後塵至

若因其成書而正其小失補成大觀則病十七史之浩瀚者樂通鑑之簡嚴而病通鑑之闕略者又樂余之補正溫公復起當必收余爲弟子矣雖然在昔溫公奉詔編集置局崇文院得自選官屬如劉放劉恕范祖禹趙君錫輩皆博學洽聞識該古今之士也而盡爲之佐乃溫公進通鑑表猶云臣骸骨癯瘁目昏視近齒牙無幾神識衰耗目前所爲旋踵遺亾臣之精力盡于此書況予孱劣無助惟一談子允厚爲我參較他書考訂得失然欲以二人之手目綜理一千

三百六十二年之事良有苦心矣歲在甲申宋元二史亦復告竣繕寫成帙而訂正之功尚有所待談子久困于病獨幼子恒分典較閱前程如海茫乎未有涯涘而余髮已皤皤矣此余之所以撫編長歎也況此書未就憂在難成此書旣就憂在難守子孫之賢不肖未可知一難守也兵戈水火之不可防二難守也官府有力者之借觀以致遺缺三難守也三者之中有一于此則余三十年之苦心盡付東流矣余貧士也鐫刻非所敢謀凡好古而主斯文之任者不能

無厚望焉

加編錄序

陸龍其

予蒞嘉之二年奉部議以催科不力罷黜既謝事乃進其民謂之曰吾爲吏無狀罷黜固宜但願爾民繼自今以往早完官課無或後時耆民郁所學進曰吾儕小民非不知急公之義也往者故明之時吾嘉之完課常爲諸邑先吏於茲者皆獲上考豈昔之民良而今之民頑耶蓋昔賦輕而今賦重一以康熙十二年之會計與萬曆四十七年之賦役全書較之加

增者蓋九萬有奇而自十二年以後軍興之所增者不在焉此民所以困而賦所以逋豈其甘爲頑民哉因以其所輯加編錄示予予閱之喟然嘆息無以對也夫主持國計者未有不知民力之當恤也特以一事偶加未必病民不知今歲加若干焉加者不可復減後者又復議加積而計之民其能堪乎叢爾嘉定其土瘠民貧較之明季日甚而賦之加多如此其死於催科與流離失所者可勝計耶且夫九萬之中如地畝危厘之鏗三庫四部折色之增猶爲他邑所同

若官布折色之驟增至二萬八千有奇省衛行月之驟增二萬六千有奇則嘉定所獨也他邑之增不至如嘉定之多而猶不堪命然則嘉定之民日困逋日積何怪也方且流離轉死之是懼而何暇顧其官之考成哉長此不已吾不知數年之後更當何如矣或曰子不知今之軍需孔急耶朝廷固無日不以百姓爲念苟四方底定自然漸次減除方將捐蘇松之浮糧去沿海之坍荒復九分考成之舊法豈特如萬曆所行而已哉子何憂焉而今則非當言之時也然予

又有說焉夫民之困憊有旦夕不能待之勢而恤民者亦當隨時而爲之計故四方底定仁政盡行固斯民萬世之福也卽以目前計之亦宜斟酌于緩急之間調劑其輕重之平去其太甚而救其顛沛庶幾寬一分民受一分之惠焉則是編也固仁人憂國者所宜急進矣

聞邑侯尚齒旌節序

汪 价

山陰聞侯來尹我邑伏觀

聖人之宮鞠爲茂草心爲之惻毅然起而光復之金碧

璀璨煥乎收觀歲乙丑上元祗遵典制宜行鄉飲酒
禮本學師儒上其事於侯曰謹案古者七十而致仕
老於鄉里恒知鄉人之賢者就而謀之延爲賓介而
與之飲酒邇年以來雖推舉耆宿而未見有冕服國
老爲之正賓茲有進士許公自俊初應博學宏詞出
宰聞喜爲天下廉官第一今年八十有四引年歸里
齒德俱尊克光斯典侯於是躬式其廬請爲大賓公
固辭凡三請而後赴公玄端緇帶升階就位堂廡之
下間歌合作侯揚觶揖賓齊肺席中啐酒席末爲歌
小雅鹿鳴之詩獻酬旣畢公與衆賓望

闕拜舞謝恩公之子若孫及門弟子數十人翼之而出
儼若神仙園橋而觀者大悅邑向有貞烈祠頽廢已
久聞侯爲之捐貲葺治適有節婦許氏十八歸馮十
九而寡撫女守貞者五十餘載氏卽進士許公之胞
妹蒙憲榮旌檄行祠祀邑之大夫士會議卽於許公
賓飲之次日恭送木主人祠至日華旛丹旒鼓吹喧
闐主者飾綵亭錦障前導而迎之婦孺擁觀隘塞衢
路以主位序列寶龕之內俎豆苾芬與諸女英歲饗

有司之羣祀行將烏頭綽楔以受

天朝之譽命觀者莫不嘖嘖嘆羨以爲高陽氏蘊玉先生一男一女毓秀清楣兄爲廉官妹爲節婦且同年月生存死沒並被

國恩又得賢侯闡明風教於新葺廟宇之後首舉尚齒旌節之典連璧齊芳一門光寵誠

熙朝之異數而海壤之榮觀也余乃拜手濡毫而登之於策

感應篇翼訓

聞在上

從來人性本善其或習染之遷流則間出於惡古之聖人教之以禮樂董之以刑威其意總欲人去惡以從善猶懼冥頑者之未能盡格也以惠迪從逆降祥降殃之理筆之於經使人知王法之外有帝心之降監與鬼神之彰瘴凜凜乎其不爽也故釋氏著厥果報而老氏章其感應大率三教聖人之意其望人遷善敏德蓋同出於一原者也余奉

簡命宰膠膠濱海劇邑也其風俗朴茂而剛悍余兢

兢懼弗克勝二載以來不敢以武健刻急爲治區區
望民爲善不爲惡之心自盟幽獨可質明神每遇月
吉率師儒講十六諭於學宮而不自揣固陋著勸民
約言十則俾之家喻而戶曉蓋亦拳拳乎體太上之
心而約略示其感應於數端之中也春間以濬河事
常過槎溪多士來謁者俱彬彬乎質有其文而楊子
西來修髯偉貌衣冠楚楚余接其談論望其眉宇蓋
莊莊乎有道君子也近出其令似戴仁所刻感應篇
翼訓一編相眎余讀之終篇其詞愷惻而古博其徵
引事類不襲前人唾餘而又不出臆見令讀之者足
以感發善心而惕其逸志誠有用文章也顧余思之
戴仁青年好學似當研窮經生家言以捷取科名何
暇旁及乎黃老之言而詮解之訓釋之縻其歲月窮
其心思是則有故蓋戴仁當讀禮之時身未離乎苦
次何心於伊唔咕嗶乃取太上之成言前代諸家之
註釋去其蕪蔓存其簡要殆體愛親之心以示福善
禍淫之旨於書卷其孝子之志也夫

...

...

...

...

...

...

...

...

碑記

陸侯清廉書院碑記

許自俊

今上十有四年侯以進士出宰嘉定時海內用兵二
東告匱嘉邑政煩賦重吏茲土者如束濕薪豪與猾
寅緣爲奸民在水火中望賢令如望母焉公爲理學
名家素以三不負自矢甫下車立却千金節嚴一介
專與民休養未期月勞者息寃者理煩者簡苛者除
剔奸梳弊神若堯羊蒲辱復收仁懷馴雉農無寒泉
之嘆士無入爨之吟邑以大治魯人鸞鄭人誦漁陽



歌冀北謠紛然雀起爲數百年來所未有
嚠民日夕焚香告天曰公實生我俟三年有成當使黃金賤如土矣
守正不阿與時相忤連及盜案落職自朝及野無不寃之嚠民罷市巷哭者經旬萬姓號天遮公無路
大中丞累疏代請公得失泊如不事請託終不可回
父老相聚而泣曰自公撫我所省白折之濫派歲以萬計所省河工之苛歛歲以萬計所省諸色之乾沒歲以萬計所省徵科之敲朴日以千計所省牙差之騷擾日以千計所省訟牒之羈縻日以千計至今

狐不晝現鳥不夜啼蝗不入境鶚不入泮嚠民臥貼席者兩歷春夏矣一旦聽我公去奉埋羊封鮓之慈親挈衣縞緝纊之賢配蕭然行李一棹烟波嚠之民能不肝腸寸裂乎相與卜邑西數武建院樹能言片石以銘其恩萃當車赤子之心鏤空谷白駒之愛萬年俎豆四季蒸嘗將在斯矣夫澤及于民而祀之百代報功之典也德加于民而懷之三代直道之行也社賽樂公祠禋石相召伯其棠經時勿剪羊公淚石隔世猶斑今嚠數十萬家家有生位一十八鎮鎮有

私祠其爲報功直道也多矣何必璽書褒美秩宗請命哉竊有慨焉蘇文忠公謂韓昌黎之精誠可以開衡岳之雲驅潮州之鱷而不能格皇甫鎛李逢吉之忌公之所能者天也公之所不能者人也夫天視天聽實惟下民公之得天者厚有陰德者必享大年有惠政者必膺後祿他日嚶民邀公之庇郊騶野繭黍稷芄芃吹幽擊鼓荔丹蕉黃相與觴公于長生之宇下公亦應遙醉各天用拜手爲記公諱龍其字稼書當湖人庚戌進士

聞邑侯重建學宮碑記

許自俊

昔魯臧伯謂凡物不足以講大事其材不足以備器用則不舉焉古之賢大夫必因三才而敷五教蘇文忠公言事有見爲迂濶而難行其實不可一日廢者如今之學校是也因三才者何上乘乎天運下診乎地脉中審乎人心也今

上御宇二十有三載歲在闕逢困敦陽氣方升三方靖亂四海消兵投戈講藝矢其文德此文明利見時也天開上元盛德在水圖書燦于東井奎婁見於營室

嘉在吳東門上臨斗柄此文昌出震時也嘉庠自逋
案以後子佩星希宮墻草茂久之風雨漂搖榱崩棟
折狐兔宅之令此者征科孔棘不暇修舉廢墜我侯
蒞止身凜四知崇厲六行化行三年而絃歌四起鶉
聲變於泮林侯請廣額應鄉舉者七十二人此人倫
之大可興也因乎三才而大工將作器用不足侯集
邑之紳衿而告之曰邑之民力竭矣此時議捐議募
是說鈴也計嘉之征繕惟河工一役用一可以緩二
昔民力民財並用今用民財以寬民力上不苛而

不怨工不煩而用不乏乃請於大吏曰可於是諏日
而經營之又患典簿非人未免吏侵什八而工隱什
七是借叢也於是舉邑之封君耆碩十有二人俾其
分曹稱事以襄厥役自春徂秋閱六月而作者以立
廢者以舉腐者以去新者以增當八月朔律臨南呂
卦占在豫先丁三日奉主入廟竹苞松茂矢棘翬飛
巍巍乎大成之殿已成矣廣文畢公以西陵名士初
來振鐸諸生景從共襄休美一時園橋而觀者衣冠
鱗集歡呼雷殷僉曰大道之行也與三代之英今日

復觀鄉校崔嵬金題玉鳥賢大夫之功也所以成
聖朝之化也自此庶而富富而教將見海隅日出之邦
漸遊春臺焉余更有頌者舜舞干格苗時雍風動武
脫劍而祀拜受丹書漢二祖歌大風而閉玉關祀孔
子以太牢臨雍而拜師歷東西兩漢迄乎荒蒞僻壤
文章節義積四百餘年而不衰豈非立學之効乎今
聖天子崇儒重道已有真儒廉吏出而應其求他日采
芹于澤官揚鱣于矍圃爲斯世白麟青鶴朱草黃雲
其在濟濟多士哉于是援筆爲之記

重修城隍廟記

許自俊

邇者永清大定載輯干戈天子命官封祀天下名山
大川此卽有虞格苗柴望及于山川成周歸牛放馬
遍祭羣神意也然畿甸要荒則賢有司之事耳夫八
蜡不修五祀不舉謂之瞑國故務民之義莫先于崇
社稷古者五岳視三公四瀆視諸侯自秦變封建爲
郡縣後三代分土而祀視五等之爵以公侯伯爵京
畿郡縣城隍之神典重矣神乃吏之鐘鼓不應則傷
事吏乃民之風雨不節則無功先王黜陟幽明交相

爲助也向以貪殘在位虐民慢神致幽明怨恫旱潦
爲災金木交困今碩鼠旣去祥鸞來儀我聞侯甫下
車首議修學宮次卽議修神廟務民義也豈與浮圖
金碧招提土木費民財以邀淫福者同年而語哉夫
邑城隍伯爵也白虎通謂隍者長也與邑令同長民
也夫諸侯危社稷則變置早乾水溢則變置社稷變
之爲言更新也我聞侯潔已愛民政通人和格于上
下召伯甘棠郇伯陰雨不愧古循良民慶更新矣乃
年來五穀不登四民失業饑饉薦臻寇盜竊發舊染
積氛憂我慈母城隍之神與有責焉我侯合一邑之
人心以崇其廟貌豐其俎豆則赫赫厥聲濯濯厥靈
行將相我侯以大其純嘏錫茲馘穀矣彼窮鄉僻壤
尚且祈穀祈年迎虎迎猫以奉其先農矧通都大邑
之神廟乎則此一舉而大本以立大政以行大功以
成三善備矣民有不樂勸哉

蕭都監土地祠碑記

錢顧琛

邑之南翔鎮有蕭都監土地祠者相傳爲漢相國鄼
侯所血食也余稽祀典有功德於茲土者則祀之鄼

侯未嘗身歷槎溪著有功德何由世世廟食不衰余不敢信以爲然但邑之南境數十里內漢初功臣若紀王信曲逆侯平梁王越樊將軍噲無不祠祀一方則余又不敢疑其爲非是歲癸亥廟宇鼎新里人徵余一言以記謂神之舊祠不一皆絕遠市闌且卑庫湫隘不足以妥神靈順治年間里人每夜聞騶從傳呼聲有吳聖昭者城歸甚晚路過戴氏園見有都監司燈籠前導隨從執火把者無數後戴子樓燕歸亦目覩之因歸語家人其室人彭氏力贊子樓捐地建

祠以俎豆之子樓歿彭氏苦節守貞二十年來足不履家園亦未嘗一至廟中祈福庚申戴氏被盜前一日廟僧夢都監勅部下往護彭節婦母令罹盜兇鋒盜來時若有叩節婦門者曰強盜至矣節婦驚避出戶賊已從屋下林立庭中竟奔節婦房競取其貲節婦向不出戶昏黑中不識門徑時若有人翼之以行者呼家人羣起逐之盜遁去時縱火焚其廬火亦不救自滅此雖節婦之水操足以感動神祇故神爲之默祐然亦足以見神之能爲一方禦災捍患福善禍

淫信而有徵矣。余聞其言，因思聖王之以神道設教，無非欲人曉然於禍福之報，歷歷不爽，因之樂爲善而懼爲不善也。今都監之默祐節婦，陰殛強徒，如是是誠足以享一方之血食矣。余故樂爲之記，以勸世之爲善獲福者。

義耆郁所學減賦碑記

許自俊

古者摩崖泐石，記功德以傳後世。固居高位得志於時者之所爲也。若墨台公子延陵季子讓位，違時風，師百世荒山片石，至今稱之。此不軒冕而貴，不社稷

而崇者也。至於匹夫建功而不受賞，布衣抱德而不顯爵，若魯仲連、郭林宗而後，忠孝節義之流，每於古巷幽巖之下，記載貞珉，埋滅而不章者多矣。所賴孝子順孫及采風表微之賢大夫相與崇勵，末俗激揚青雲，使後之人聞而興起耳。以視吾邑郁無文翁真其人也。其爲人也少，負至性奇才，宗族稱孝，鄉黨稱弟，留心經濟，深鑒劭邈，經緯之志，華皓不衰。博學多聞，少壯不得志於名場，隱柱下吏，慨然有東漢諸名士風。鼎革後，江南逋案大起，禍及士紳，幾乎焚林竭

澤賢有司不能救翁延主戶曹多歷年所衆椽聽風
旨焉翁經營慘淡多所全活挽回國恩而人不知致
有訾之者而翁不辨再追赦逋人在焦釜中翁承旨
將順陰爲補救而網小解後復額減每歲布墊三千
水脚萬兩當事知翁能聘修邑乘主賦役翁剔歷新
舊數額羅陳燭照計浮派以九萬零捐貲刊爲一書
以貽後賢雖不能盡守故額而濩薪不至再浚寒泉
不至復冽不可謂非龍門一柱也此真有功於一邑
也不與折漕諸君子相後先哉夫庶民有善恨人不

齒之今立德立功而又立言非三不朽乎爲而不有
行而不知功成而不居此留侯之善藏其用也攷之
祭義及小雅有能爲民捍災救患者則祀之楚茨大
田諸篇先農先穡之教民耕稼者則春秋報賽之茲
都人士公呈爰及郡縣大夫之批入忠孝祠公道彰
彰矣胡不可鐫之石以勸而必待軒冕而貴社稷而
崇乎則魯連郭泰居何等也夫先農先穡一胼胝老
農昔賢公卿何以拜敵之乎是爲之記

邑侯陸公稼書解官日記

汪价

當湖陸使君令驟一載竟以清去邑之人如哺兒失乳罷市巷啼奔號乞命於大府之門者數千人大府允題還職卒格於部議勢不得留於是鄉士大夫相向歔歔莫可如何農哭於野賈哭於市販夫牧豎哭於道路丁巳三月二十日大府遣官來攝縣事使君將出署一時扶杖之老中角之童村姬里嫗充滿街衢擁入公廨號哭而留使君者不下數萬人境內皆結綵棚焚香燃燭自城邑以及鄉鎮各謀祠祀使君花幡仙仗鼓吹喧轟迎長生主位而奉歸本境者紛

然四出又有男負耕具女負織具塞城之四門自卯至酉人情洶沸使君不得行乃出而慰諭之曰長吏受譴朝聞夕去法也諸父老憐而留我情也三尺具在誰敢以私情扞國法卽須臾止解舍無益諸父老愛我其無滯吾行矣衆人益挽車轍不忍舍哭泣之聲上徹霄漢嗟嗟民情若此其爲感恩痛切者無論已若夫胥史輿僮素爲姦利今且束於章程饑而供役羣不逞之徒以力行暴使君至而劓之以法閭左風清凡此皆宜怨咨其上幸其速去乃亦仰天而呼

涕泗霑臆則其爲三代之公洵不泯矣介史氏曰廉吏可爲而不可爲見之楚人愴慨之歌太史公作列傳傳循吏而不傳廉吏蓋以廉吏者天之所忌而世俗之所不喜也雖然使君清風兩袖但收萬姓數行之淚載歸故鄉雖鬱林之石廬江之土千秋標令不足多也

竟 是山記

陸元輔

凡人性各有所近性之所近而嗜好出於其中則所見無非是物矣故庖丁之解牛非養生也而道家以

此得養生擔夫爭道公孫大娘舞劍器非書法也而藝家以此得書法蓋性之所近而心聚焉心之所聚而形成焉事理固然無足惟者孔子曰知者樂水仁者樂山仁者知者豈能日徜徉於波流之間登躋於巉巖之上以是爲愉快哉蓋智者之性有似於水仁者之性有似於山故澹然而清凝然而峙者時與目遇淒然而鳴響然而答者時與耳遇變動而不抵鎮靜而有常者時與神遇則雖端居一室與徜徉波流登躋巉巖固不異也况物形之類于山水者介乎前

其愉快身可已耶。今夫天下之山至於終南而觀止矣。然昔之人有以終南爲仕宦捷徑者，徒弄猿鶴而受責於太行之靈，是其心神耳目役役有爲，豈復知有所謂山也哉。而金陵東山塊然一土阜耳，高人逸士往往攜友追遊，樂之終身不厭，故樂與不樂在乎性之靜躁，而不在乎山之是非也。吾師李二華先生，天姿醇謹，承其曾叔祖惕菴公、父華璧公之家學，又生于神廟盛時，及見邑中唐叔達、婁子柔、程孟陽、徐汝廉、王晉卿、高叔英、嚴永思，談厚君諸先生與遊，故

自少至老，一以聖賢爲師，非言勿言，非行勿行，非書勿書，而浮雲之富貴，毫不以動其懷。小子嘗日侍函丈，益乎可親，如春山之明媚也；凜乎可畏，如秋山之肅穆也。先生其有仁者之心乎？宜其起居食息所見無非山焉，而宅之東北隅，適有累土以成山之形者，觸目會心，遂名之曰竟。是山植木其巔，種蔬其麓，於時登臨於時游憩，蓋不知先生之非山與山之非先生也。崇禎間，嘗與錢越凡、林孝尼、蘇長侯兄弟從此山攀援而上，四顧郊原，人物殷繁，室廬密比，有太平

之遺風曾几何時而滄桑變易向之風物已不可再
覩卽同遊諸子亦凋零過半矣而先生與此山獨巋
然如魯靈光之僅存非至靜何能如此乎然是山也
峙練祁之陽爲新涇里之望歷經陸馳車馬水通舟
楫達官大賈之過其下者不知凡幾矣未聞有以山
擬之而暫爲之停驂輟棹者先生乃樂而忘疲與世
俗異故知其有仁者之心也山之得名王巖兩先生
叙之已悉余故不言而記先生之性與山相近者如
此同里門人陸元輔拜手謹記

上谷宗祠記

計東

自嘉定侯給諫起東公於天啓初年首攻客魏論客
氏不宜再入宮奉嚴旨譴歸直聲動天下於是我東
南人士咸依嘉定侯氏爲人宗而公之祖大叅公考
贈給事公先以政事名德顯公之子二瞻先生通政
公文節公公之孫海內稱六侯者記原文中幾道研
德雲俱智含公之曾孫武功相繼以忠孝大節文章
經術顯於是我東南人士稍知讀書論交矜行誼者
莫不益嘖嘖稱嘉定侯氏云而茲祠之建則當嘉定

兵燹之後二瞻先生湛族殉難既久幸存廢宅而記
原特爲請之守令得以歲時率子姪奉蒸嘗存數世
不絕之一綫蓋海內所稱六侯幾道雲俱以兵死文
中智含研德先後以疾病患難死卽武功亦天死今
獨記原巋然存海內推碩果焉東今者于中元之日
偶客游僑寓祠旁親見記原率令子天存及研德令
子大年兩幼子棠萊並濟濟跪奠拜祝於堂中喟然
三歎以爲當疇昔兵燹騰蹕時二瞻先生不惜湛族
殉大節雖洿宮若平陵公無憾焉初不意今日子姓

尚得雍雍然修祀事於斯堂若此也嗚呼卽給諫公
首劾客魏時其意計豈復及死生患難其被禍豈望
出楊左諸公下父子兄弟世世相勉以忠孝大義不
復爲世俗子孫血食之謀趨兵火棄肝腦如飴矣而
天佑善人俾其後人仍得以椒醕蔬菓歲時無廢祀
爲之門生後進者徘徊歎泣於其傍而不忍去不可
謂天之無意於忠孝之家積善之後也禮大夫祀祖
禰公家三世爲大夫合祀當數世且太宗小宗別子
攝祀諸議記原研德與其友人陸翼王輩辨之尤詳

故侯氏宗祠之制悉與朱子宋文憲公考論尤合不
具論抑余所尤歎異者不特爲侯氏之丈夫子者世
世以節義文章顯當世乃其婦人若給諫公配龔夫
人下及文中妻夏幾道妻姚雲俱妻龔智含妻盛俱
能以節烈皎然不辱其家門從祀祠中爲天下婦女
師法則侯氏之祖功宗德益遠矣是不可以無記康
熙乙卯中元日撰

重建貞烈祠記

歸莊

易曰有夫婦然後有父子有父子然後有君臣詩始
關雎書美釐降故夫婦人倫之首天地之大義也漢
劉向始采古賢婦人分賢明母儀婦順諸條目著列
女傳其後歷代史家有紀載朝廷有旌典所以厚人
倫勵風化也嘉定風俗淳厚女子之以節烈名者多
有自洪武以來得十三人嘉靖己未邑宰李君資坤
始建貞烈祠歲時致祭後祠日圯壞崇禎間有烈婦
金氏奉旨旌表于是其父醫官金成祖請于邑宰
謝君三賓完祠之故而耐金氏焉乙酉之亂祠復毀
後十年乙未有周氏姑媳譚氏徐氏及其孫女周氏

以貞孝先後旌獎于是貞母之子諸生周鼎鉉捐貲
修復貞烈祠因進其所親於列金成祖之子南菴及
諸烈女之後咸出資助成之六月經始八月訖工而
祠宇一所仍紀諸烈女事跡刻之以傳此雖爲其先
世及親黨然綱常天下之綱常非一家之私也貞烈
之廟煥然改觀其于風化不無小補况夫婦之義通
于君臣王蠋之言誰不聞之倘有良心不昧者見烈
婦之祠而思忠臣之義則此祠之修復又豈特小補
而已哉雖然今忠臣祠廟所在皆有而見者漠然乃

欲其覩烈婦而思忠臣何其迂哉顧萬分之一終不
能無望于今之人也故因周金兩君之請而爲之記

聞邑侯重修烈女祠記

許自俊

夫人生五倫皆起於夫婦大易所以謹陰節之貞也
自有仍氏盡義存孤而後竒情至性恒出於婦人趙
姬藏子於褱中齊婦哭夫于城下楚嬖之奏錦瑟共
姜之賦栢舟化石飛霜矢三從之不貳綠衣黃綬志
九死以無他以至魯陶之孤琴十載戴媽之去燕三
章皆所以補天常而植人紀風化之所從來遠矣我

嘉邑風俗淳古家修內則昔文學周聖瞻因其家節
孝出于一門奉憲修建烈女一祠春秋崇祀之後之
真孝真節爲官司所采風者皆入其中配享焉自此
化行俗美踵芳紹烈木主森羅爲一邑禮教之原本
日久而風雨漂搖宮墻頽敗廢而不修久矣今聞侯
蒞任四年八廢俱興力行教化予亾妹十八而嫁十
九而孀遺腹生女守貞五十餘年歿歸同穴家貧力
乏旌表久湮國人哀之蒙儒學掌教畢公任公准通
庠王晦金塾等公呈爲之公舉於聞侯侯轉詳郡郡

轉詳藩臺章公以其事請于督府王公蒙批節婦許
氏勵節青年完貞白首鏡分鸞影夢杳熊祥捐庚刲
股以格天抗志全身以就穴久湮勁節宜亟妥靈如
詳先行入祠亾妹得以配享其中皆我侯表幽之仁
也予見榱桷將崩舊垣全圯恐廟貌不光非所以奉
明禋而薦馨香也與廟主周君金君孝子胡君商所
以鼎新之蒙邑侯捐俸二十兩爲首唱外甥唐淵以
幼孤遵奉孀母命捐資竭力以襄厥功此係國典民
彝不同梵宇淫祠不可以募助也凡在祠有子有孫

者願各輸物力以終盛舉嗚呼春雨秋霜誰無水木
之思暮鼓晨鐘共發薰蒿之念他日所司每行時祭
生芻一束榮於金碑石窳之封絮酒三行芬於玉露
瓊漿之賜使賢婦幽靈欣欣天壤爲孝子慈孫不亦
愉快乎其有裨於人心風俗豈小補哉

嘉邑自常宗熙甫振興古業以來代有文人故世
稱得文章正傳者必推嘉定茲所採拾僅見一班
竊欲効當日象三謝先生裁定邑之各公文集梓
行傳世簿書委疊在上有志而未之逮也

山陰聞
在上識

重修文廟碑記

宋德宜

皇上以神聖文武纘承大寶誕敷文教嚮用儒術臨御
之二十三年苞蘖剷除彘弓衅甲扶桑出日之表
納土置郡六服內外悉王悉臣清和咸理年穀順
成於是循虞周盛軌柴望岱宗
躬詣闕里釋奠
先師兼留
御蓋以示隆重

親灑宸翰題萬世師表榜大成殿并頒行州郡其學

宮有廢壞者所司葺治自昔詰王尊師訪道稽古
右文罕有儷斯者也而嘉定邑侯聞君重修文
廟於時適成嘉定居吳郡東偏其木工質重人物
近朴野然昏喪賓祭動引古禮士大夫喜談節概
卑榮利文章師承王常宗歸太僕雖制舉業皆有
根氏羞爲剽賊塗飾之言居官任職所至有聲蹟
伉直骨鯁仗節死綏之士歷歷可覩記邇者稍稍
陵替鄉里暴桀子弟公行不軌黠者舞智御人獄
訟繁滋土氣亦浸長華競矣然其間多振拔克自

樹立鏃礪名行切劘古文辭猶能不墮其家法豈
獨其土風然哉夫亦甄陶乎禮樂之場厭飫乎仁
義之圃漬於肌膚骨理之深故歷久而猶有存小
變而能不失其正與然則聞君學校之整頓又可
旦夕緩與先是學宮修者屢矣官斯土者有哲有
愚日久廢弛丹堊漫漶棟榱崩陁土雨旁風神棲
露宿聞君一下車進諸生吳克俊等問狀亟奏記
臺使者得塘夫銀若干兩庀材鳩工不一假手推
舉耆儒有學行者程嘉賓趙萼顏儀金望等十二

人裹糧襍被晨夜督護相度周匝綜理微密材良
甃堅釘鉸漆髹精緻華好侯不時巡省調度悉心
諮訪工善役勤費減功倍未半歲大成殿落成雕
甍畫棟銀榜璇題跂棘翬飛星輝霞爛雄敞宏麗
有加於舊其餘工作次第告竣廟貌以妥庶祀以
秩講肄有堂齋宿有所春秋上丁祝嘏陳獻登降
興俯肅肅雝雝皆中儀式飲射讀法以時具舉經
術於是乎明王政於是乎備嘉之人士其務沐浴
至教涵泳聖涯敦本尚實抱質懷文勿替舊服仰

副令君作人之雅意余將從容觀

昭代文治之成焉侯律已以潔肅下以威撫衆以慈
他政卓卓可紀者多其以是爲先務可謂知政本
也已

聖天子振興於上司牧得如侯十許輩率先奉行於下
斯世斯民欲不回心向道返朴還淳不可得也然
則嘉邑其卽成周二南風化之首與余自官禁近
以至承乏政府違里門幾三十年而侯之政聲籍
籍都下聞之甚悉今予友孝廉趙俞孫致彌國子

生侯開國先後至京邸以碑記請爲撮其大指如
右聞侯名在上浙之山陰人佐之者教諭畢天庾
訓導任國鑄經始是年之三月竣於冬之仲月凡
重建

先師廟禮門鄉賢祠名宦祠魁星閣若干楹仰高坊
一座增修兩廡櫺星門明倫堂若干楹工料以緡
計共費三千有奇趙俞云

修建城隍廟碑記

繆彤

先王制爲祀典自郊天以下方丘祭地以及山川社
稷日月靈星五祀不廢井霽八蜡兼及貓虎甚盛舉
也至若郡邑之有城隍神不列於壇墀而以其廟祀
之城隍之文僅見諸大易爲他籍所不載大抵建置
疆域設爲神祇以與爲守令者分理陰陽均有夫守
土之責者也故有司初蒞任必齋宿於廟朔望則恭
謁與神申誓以保釐斯民無僭忒也嘉定爲吳之巖
邑東枕大海西抱婁淞二江其人民聚處斥鹵之鄉

期於兵稜不興雨暘時若實惟神明是賴邑之神廟
向稱魏煥積久頽廢風侵雨蝕蟲蟻鼠穿金壁無光
垣墉不備叢脞因仍聊塞故事無有起而整飭之者
茲幸山陰聞戾來尹斯土首葺學宮以崇文教次修
闕廟以建武功隨卽鳩工庀材以興隍廟之役選耆
碩之有才幹秉公矢慎者董之崩陲者植之使起腐
泥者易之使新卑痺者拓之使豐黜晦者緘之使米
增埤式廓倍於曩昔視其桂棟森如也視其蘭椽翼
如也視其星甍玉砌秩如也高峩爽磴菴藹崧龍有

天宮帝闕之思焉神固封有伯爵如五嶽三公四瀆
諸侯之例近日真人府以神有嘉惠於嚳奏請加爵
爲公天曹符命宜亦信而有徵夫一邑之內令以治
陽神以治陰其政理有相通者聞公秉史雲之清節
展元琰之竒猷爲民利者罔不疏爲民蠹者罔不剔
恩無不罔化無不覃郇雨文膏翔洽四境蒼黔謳而
頌之督撫旌而異之輦穀之上交口而賡颺之由是
神於冥漠之中潛孚默贊乃得人餘年豐訟止盜息
嚳人士遊於熙皞之天其風可懷也今歲陽月廿四

日爲侯之誕辰五鄉之人感侯之德持蹄酒菽麥而
祝於堂上者趾相錯也次日卽爲神之誕辰五鄉之
人感神之德持寓錢寶馬而祝於廟中者又趾相錯
也此時正當廟宇落成之日賢侯與明神陰相匡助
以登斯民於衽席而其降誕又適同時於以受六百
里之晉祝而享俎豆於萬年者無不同也海邑英譚
人皆傳爲異事余因得拜手而爲之記

雜識

潮陽令陳君陳曾孫麒官者名時雍字堯民陳世馨
之子一日十行秀外惠中與年俱進親朋鄉黨以
爲許衡解縉之再見年十六忽病及亾而無形有
聲日在父母之側能聞其語言先見其衣履其父
每出必送之門歸則隨以入其母時氏卽時侍御
孫女病床二載危在旦夕一日思食甜瓜甫念覺
脇間塊然按之卽瓜也見一黑衣童冉冉遠去伊
母嘗之異香滿室病遂立愈一侍婢名彩鳳者病

三瘡以餘瓜餌之瘡亦立愈人稱為孝鬼云

朱貞一字元伯應試南闈考官泊舟燕子磯夜有傳

呼山上曰今科第幾名為嘉定朱貞一聞者殆千

人羣駭其無稽而考官陰志之必不令其言之驗

已而填榜共戒不錄嘉定朱姓卷及榜發而貞一

中式名次宛如所云蓋貞一為蘇州府學生卷無

嘉定字故得錄事紀金陵瑣事

書目

每懷錄 朝鮮采風偶錄 俱孫致彌 貽績堂集

顏鑄 鳳阿詩集 侯開國 得筆齋稿 顏鑄 公

歸集 陳紹馨 西來集 杜詩筏喻 俱楊世清

學古十函 學易折衷 月蟬筆露 西留詩草

俱侯沄 寄笠詩文草 侯靜妻盛氏 德徵錄 殷

開之 人林題目 三儂嘯旨 三絕倒 俱汪价

東臯詩文草 握靈本草 雜症圓機 傷寒滙

編 十劑新箋 萬全備急方 俱王翊 野老閒

言 俞嘉客 加編錄 郁所學 歷代史論 朱偉功

行錄廣義 李葆奇 感應篇翼訓 楊志達

書目

